

# Jisas Kraiské Luk viyaatakan kundi

## Taale ani kundi ma vé

Jisas Kraiské Luk viyaatakan nyéngaamba anga vénangwa. Jisas dé Israelsat, nak gaayé du dakwat waak Satanna taambamba kéraakwá du wa. Jisas déku jémbaa baasnyé ye yaké yandékwa sapak du dakwat anga wandén, "Gotna Yaamambi wa wunat wakwa Gotna yéku kundi gandéndu gandéndakwat kwayewuténngé." Naandén. (4:18 ma vé.) Késpulak nakpulak vakmi du dakwaké yaandéka yaatakwa wani du dakwaké Jisas sémbéraa yate det yé kun yandén. Wanngé Luk asapéri kundi wa saapéndékwa.

Jisas yéku yapaté yandéka de déku du dakwa déké mawulé yate dusék takwasék yandarén. Maria dé kéraalén sapak du dakwa mawulé tawulé yandarén. (1:42-48, 2:10 ma vé.) Jisas Gotna gaayét waáréndén sapak mawulé tawulé yate asa dusék takwasék wa yandarén. (24:52 ma vé.)

Ani muséké Luk dé nakurak male wa saapéndékwa. Nak nyéngaamba yamba kwaae wa. Maria Jisas kéraalén sapak du dakwa ras yéku yapaté yandarén. Jisas Samaria duké, yaange yén nyaanngé, lambiyakén muséké waak gwaaménja kundi kwayéndén. Jisas takis kéraaran du Sakiusale kundi bulndén. Luk male wa wanngé saapéndékwa.

Gorale kundi bulte dat waatakunangwa yapatéké, Gotna Yaamambina jémbaaké, Got du dakwa yan kapéremusé yasnyéputindékwa yapatéké, dakwasé yan yapatéké waak Luk némaamba kundi wa saapéndékwa.

Luk nyéngaa nak waak viyaandén. Wani nak nyéngaaké anga wanangwa, "Jisasna kundi kure yén dunyansé yan jémbaa. Wani dunyanséké anga wandakwa: Aposel." Naanangwa. Wani nyéngaamba Jisas Gotna gaayét waaréndéka déku dunyansé yan muséké wa Luk saapéndékwa.

*Tiofilus Jisaské vékuséknndénngé Luk ani kundi viyaatakandén*

1-3 Néma du Tiofilus, ménéké ani kundi viyaatakawutékwa. Méné anga vékusék-ménéngwa. Du ras nanale yaréte nakpulak apanjémba wa yandarén. Yandaka nak du wani jémbaa baasnyé ye yandaka vétake wani jémbaa yapékandaka vété wani jémbaaké nanat kundi tiyaandarén. Wunga vékusékte anga waak wa vékusék-ménéngwa. Késépéri du wani jémbaaké saapéte nyéngaamba kundi viyaatakaké mawulé yandarén. Yate de nanat taale wan duna kundi pulak kundi viyaatakandarén. Wunga wa vékusék-ménéngwa. De wunga yandarén pulak, wuné waak wani muké viyaaké mawulé yawutékwa. Méné kurkale vékusékménénngé wuné yékunmba viyaataka-kawutékwa. Késépéri apu wani muséké kurkale vékuséknngé watake det waatakuwutén. Waatakwe bulaa vékusékte

kurkale vékulakate yé kunmba viyaataka-kawutékwa.<sup>4</sup> Viyaa-takawutu méné kurkale vékusék-ngaménénéngwa. Wani muséké ménat wakwasnyéndarén kundi wan papukundi yamba wa. Wan yéku kundi wa. Yi wan wanana wa.

*Jon yaaké yakwanngé Gotna kundi kure gaayakwa du wandén*

<sup>5</sup> Herot Judiana néma du téndén sapak Gotna gaamba jémbaa yakwa du nak téndén. Déku yé Sekaraia. Dé Abiyana kém̄ba wa téndén. Déku taakwa léku yé Elisabet lé Aronna kém̄ba télén. <sup>6</sup> Talimba Aron Gotna gaamba jémbaa yakwa akwi dunyanséna néma du wa téndén. Te kiyaandéka déku gwaal, waaranga, maandéka, bakamu, bakamu, de waak Gotna gaamba jémbaa yakwa du tékésndarén. Bét Néman Du Gotna ménimba yéku musé yakwa du taakwa wa yarémbérén. Bét déku apakundi kurkasale vékulakate wandékwa pulak yate bét kapérandi musé yamba yambérékwé. <sup>7</sup> Lé nyaan yamba kéraalékwe wa. Yaléka bét kapmang yarémbérén. Nyaan yamba wa. Bét aanyapa yan wa.

<sup>8</sup> Nak nyaa Sekaraia béré Gotna gaamba jémbaa yakwa duna jémbaa yandarén. <sup>9</sup> Yate Gotna gaamba jémbaa yakwa akwi dunyan yan pulak yate deku jémbaaké kundi bulte wandlerén, Sekaraia Néman Du Gotna gaamba wulaae yéku yaama yakwa musé tundu yaasnyé waaréndénnge. <sup>10</sup> Wandaka wulaandéka yéku yaama yakwa yaasnyé yaalakwa nyaan de akwi du dakwa kaapamba jaawuwe téte Gorét waandlerén. <sup>11</sup> Waandaka Sekaraia awulamba téte

véndén Néman Du Gotna kundi kure gaayakwa du nak yéku yaama yaalakwa yaasnyé tékwa jaambéna yékutuwa sakumba téndéka. <sup>12</sup> Vétake vat naae asa wup yandén.

<sup>13</sup> Yandéka Gotna kundi kure gaayakwa du dat anga wandén, “Sekaraia, wup yambak. Got ména kundi wa vékundén. Vékutake wa wandén, ména taakwa Elisabet dunyanngu nyaan kéraalénngé. Kéraalu méné déku yé Jon waakaménéngwa. <sup>14</sup> Ména taakwa wani nyaan kéraalu méné késépéri du dakwale guné mawulé tawulé yate dusék takwasék yakangunéngwa. <sup>15</sup> Wani nyaan aasana biyaamba wayéka randu Gotna Yaamambi déku mawulémba wulaae rakandékwa. Dé wain kulak waangété gu waak katik kaké dé. <sup>16</sup> Dé Gotna ménimba néma du wa tékandékwa. Téndu guné déké mawulé tawulé yate dusék takwasék yakangunéngwa. Dé wandu talimba Gorét kuk kwayén késépéri Israelsé deku Néman Du Gotna kundi nakapuk vékukandakwa. <sup>17</sup> Dé Gotna yém̄ba kundi kwayétan du Elaija téte apamama yan pulak, dé téte wunga apamama yakandékwa. Yate dé wandu aapambéré deku nyambaléké mawulé tawulé yandaru Gotna kundiké kuk kwayékwa du nak mawulé vékute Gotna kundi vékukwa du dakwa yakwa pulak mawulé tawulé yakandakwa. Dé taale yéte wandu du dakwa yékunmba vékulakate Néman Du yaaké yandékwangé kaavérékandakwa.” Naandén Gotna kundi kure gaayakwa du.

<sup>18</sup> Wunga wandéka Sekaraia dat wandén, “Aané taakwale aanyapa yaténmba yénḡa pulak ye wani kundiké waké wuté, Yi wan wanana

wa?” <sup>19</sup> Naandéka dé Gotna kundi kure gaayakwa du wa wan, “Wuné Gotna kundi kure gaayakwa duna néma du nak anana. Wuna yé Gebriel. Wuné Gotna ménimbq téwutékwa. Téwutéka Got wunat wandéka wa déku kundi kure gaayawutén. Dé wandéka wuné yéku kundi ménat waké watake gaayawutén. <sup>20</sup> Bulaa ma véku. Méné wuna kundi yamba vékuménéngwe wa. Bulaa méné kundi bulkapuk yarékaménéngwa. Yaréménu wawutén akwi musé yaakandékwa. Yaandu wani nyaa wuna kundi sékéréndu méné nakapuk kundi bulkaménéngwa.” Wunga watake yéndén.

<sup>21</sup> Sekaraia Gotna kundi bulndakwa gaat wulaae bari yaalakapuk yandéka du dakwa kaapamba téte déké kaavététe vékulaka vékulaka naandarén. <sup>22</sup> Yandaka dé kukmba kaapat yaale dele kundi bulké yapatindén. Yandéka wa vésékndarén. Dé Gotna gaamba yéngan pulak ye nak pulak mu nak véndén wa. Wunga vésékndaka kundi bulké yapatiye dé kundi bulké yate déku taambat male yandén.

<sup>23</sup> Dé nyaa ras yare déku jémbaa yasékéyaktake déku gaayét waambule yéndén. <sup>24</sup> Ye yaréndéka kukmba déku taakwa Elisabet nyaan ralén. <sup>25</sup> Rate baapmu taambak léku gaamba ralén. Rate walén, “Talimba wuné nyaan kéraakapuk kwawitakwa kwaawutéka du dakwa wunat wasélékndarén. Yandaka wuné wup nékéti yawutén. Bulaa Néman Du Got wunéké mawulé sémbéraa yate wa wunat yékun yandén.” Naalén Elisabet.

*Gotna kundi kure gaayakwa du Mariat wandén*

<sup>26</sup> Elisabet nyaan raléka baapmu taambak kaayék nakurak (6) yandéka Got wandéka déku kundi kure gaayakwa du nak déku yé Gebriel Nasarerét gaayandén. Nasaret Galilimba wa téndékwa. <sup>27</sup> Wani nyaa taakwa nak léku yé Maria wamba yarélén. Talimba lé duwale yamba kwaalékwe wa. Talimba léku aapa aasa Josepna kémale wa kundi gindarén, lé kukmba Josepké yélénngé. Josep talimba tan néma du Devitna kémba wa téndén.

<sup>28</sup> Got wandéka Gebriel gaaye Mariat wandén, “Nyéné yaro? Néman Du Got nyénéké mawulé sémbéraa yate nyénale randékwa.” <sup>29</sup> Wunga wandéka wani kundi vékute wani kundiké vékusékngapuk ye wup yate vékulaka vékulaka naalén. <sup>30</sup> Yaléka lat wandén, “Maria, wup yamarék. Got nyénéké mawulé tawulé yandékwa. Yate nyénat yékun yandékwa. <sup>31</sup> Ma véku. Nyéné nyaan re du nyanngu nyaan nak kéraae déku yé Jisas waakanyénéngwa.

<sup>32</sup> Dé néma du wa tékandékwa. Apa tapa yapékakwa du Got dat wakandékwa, ‘Méné wuna nyaan wa.’

Wunga watake Néman Du Got wandu déku gwaal waaranga maandéka bakamu bakamu De-  
vit néma du téte Judaséké vétendén pulak,  
wa dé néma du téte deké vékandékwa.

<sup>33</sup> Dé néma du apapu apapu tékandékwa Israel du dakwaké.

Téte deké kurkale vésék naakandékwa apapu  
apapu.”

Naandén Gebriel.

**34** Wandéka Maria dat walén, “Yéngä pulak nyaan raké wuté, du kumbikapuk yawuténmba?”

**35** Naaléka wandén,

“Gotna Yaamambi nyénéké gaayakandékwa.

Gaayandu Got nyénat mayé apa kwayékandékwa.

Kwayéndu nyaan re kéraakanyénéngwa.

Kéraanyénu wani nyaanngé wakandakwa, ‘Dé wan yéku nyaan wa. Wan Gotna nyaan wa.’

Wunga wakandakwa.

**36-37** “Ani kundi waak ma véku. Got akwi musé yaké apa yandékwa. Nyéna kémna taakwa nak Elisabetké wandarén, ‘Wan nyaan kéraakapuk yakwa taakwa.’ Wunga wandaka aanyapa yaléka Got wandéka nyaan ralékwa. Baapmu taambak kaayék nakurak (6) wakwa lé nyaan raléka.” **38** Wunga wandéka Maria wa wan, “Wa vékuwutén. Wuné Néman Du Gotna jémbaa yakwa taakwa a. Wunat waménéngwa pulak Néman Du yakandékwa. Wan yékun wa.” Wunga waléka wani du Gotna gaayét waambule yéndén.

### *Maria Elisabet véké yélén*

**39** Maria yaré yaré naae musé asé kéraae Judana némbumba tékwa gaayé nakét bari yélén. **40** Ye Sekaraiana gaat wulaae Elisaberale kundi bullén. **41** Bulléka Elisabet Mariana kundi vékuléka léku biyaamba ran nyaan génén. Géndéka Gotna Yaamambi Elisabetna mawulémba wulaae ran. **42** Wulaae randéka lé némaanmba waate walén, “Got nyénat wa yékun yandén. Yi wan wanana wa. Nyénat yékun yandén musé nak taakwat yékun yandén musat wa taalékéran. Got nyéna biyaamba

rakwa nyaanét waak wa yékun yandén. <sup>43</sup> Nyéné wuna Néman Duna aasa wa ranyénéngwa. Nyéné wunéké yaanyénén wan yékun wa. <sup>44</sup> Nyéné yaae wunale kundi bulnyénénga wuné nyéna kundi vékuwutéka wuna biyaamba rakwa nyaan dusék yate géndéka vékuwutén. <sup>45</sup> Nyéné Néman Du Gotna kundi yékunmba wa vékute wanyénén, ‘Wandén pulak yakandékwa. Yi wan wanana wa.’ Wunga watake nyéné mawulé tawulé yate yékunmba rakanyénéngwa.” Naalén Elisabet.

### *Mariana Gwaaré*

<sup>46</sup> Maria wani kundi vékutake gwaaré anga waalén:

<sup>47</sup> Wuné mawulé tawulé yate Néman Duna yé kavérék-wutékwa.

Got wunat yékun yate wuné déku taambamba wa taakandén.

Taakandéka wuné déké mawulé tawulé yawutékwa.

<sup>48-49</sup> Wuné néma taakwa yamba yé wa.

Wuné baka taakwa rate déku jémbaa yakwa taakwa wa rawutékwa.

Rawutéka dé yéku musé yapékarékwa du rate wunéké wa vékulakandén.

Vékulakate dé apa tapa yakwa du rate wunat néma musé wa yandén.

Yandénngé bulaa, sérémaa waak, akwi du dakwa wakandakwa, ‘Got Mariat wa yékun yandén. Yi wan wanana wa.’

<sup>50</sup> Gotna kundi yékunmba vékukwa du dakwaké Got mawulé sémbéraa yandékwa.

Bulaa, sérémaa waak, wunga pulak yakwa du dakwaké mawulé sémbéraa yakandékwa.

51 Got apamama yate késépéri apanjém̄ba yandékwa.

Dé wandéka deku sépé deku musé aséké vékulakate deku yém̄ba kavérékngwa du dakwa yaange yéndakwa.

52 Dé wandéka nak ge nak gemba tan néma du baka du téndakwa.

Wandéka baka du dakwa néma du dakwa téndakwa.

53 Musé asé kure yarékapuk yakwa du dakwat yéku musé kwayéndékwa.

Asapéri musé asé kure yaran du dakwat wandéka musé asé kapuk ye baka yéndakwa.

54-55 Talimba Got Abrahamét, nana nak gwaal waaraŋga maandéka bakamat waak anga wandén, ‘Guné Israel du dakwa, gunéké mawulé sémbéraa yate bulaa, sérémaa waak, gunat yé kun yakawutékwa.’ Wunga watake wani kundiké vékulakate déké jémbaa yakwa Israel du dakwat apapu apapu yé kun yandékwa.

56 Maria wani gwaaré wunga waatake Elisaberale yarélén. Baapmu kupuk yare léku gaayé t̄ waambule yélén.

### *Elisabet Jon kéraalén*

57 Kukmba Elisabet nyaan kéraala sapak yaandéka nyaan dunyanngu kéraalén.

58 Kéraaléka Elisabetna kém léku gaayé du dakwa waak vékute lale mawulé tawulé yate dusék takwasék yandarén. Yate wandarén, “Néman Du Got Elisaberét yéku musé wa yandén.” Naandarén.

<sup>59</sup> Nyaa taambak kaayék vétik (7) yéndéka kaayék kupuk yambanmba du dakwa yaae jaawundarén, déku kém du, ‘Gotna du’ naate, wani nyaanna sépé sékumuké. Jaawundaka déku sépé sékwe wani nyaanna yé Sekaraia waaké mawulé yandarén. Sekaraia déku aapaná yé wa. <sup>60</sup> Yandaka déku aasa lékét walén, “Yamba yé wa. Déku yé Jon waakanangwa.” Naalén.

<sup>61</sup> Wunga waléka lat wandarén, “Talimba béná dukém̄ba nak wani yé yamba waandakwe.”

<sup>62</sup> Wunga watake déku aapa Sekaraiat waatakundarén. Sekaraia wayéka kundi bulkapuk yaréndéka dat taambat yate anga waatakundarén, “Kamu yé waaké nané dat?” <sup>63</sup> Wunga wandaka taambat yate det wandén nyéngaq kwayéndarénngé. Wandéka kwayéndaka nyéngaamba viyaatakandén, “Jon déku yé.” Wunga viyaatakandéka de akwi vékulaka vékulaka naan.

<sup>64</sup> Yandaka déku kundi bari yé kun yandéka Sekaraia nakapuk kundi bulndén. Bulte Gotna yé kavérékndén. <sup>65</sup> Yandéka de wani gaayémba rakésén du dakwa asa wup wa yandarén. Yandaka wani muséké saapé yé yaayandarén, Judiana némbumba tékwa akwi gaayémba. <sup>66</sup> Yandaka wani kundi vékwan du dakwa vékulaka naandarén. Néman Du Got wani nyaanét mayé apa wa kwayéndén. Wunga vékute vékulaka vékulaka naate wandarén, “Sérémaa wani nyaan némaan ye yéngä pulak du téké dé?” Naandarén.

**67** Gotna Yaamambi wani nyaanna aapa Serakiana mawulémba wulaae randén. Randéka Gotna kundi anga wandén:

**68** Nané Israel du dakwa, nana Néman Du Gotna yé kavérék-nganangwa.

Nanat yé kun yaké wa gaayandén.

Gaaye dé nanat Satanna taambamba kéraakandékwa.

**69** Dé wa wandén, apamama yate nanat yé kun yana du nanéké yaandénngé.

Gotna jémbaa wani yatan du Devitna kém̄ba wa yaalakandékwa.

**70-71** Talimba Got wandéka déku yémba kundi kwayétan du ani kundi wandarén, “Nanéké kalik yakwa du nana maama waak nanat viyaandékngé mawulé yandaru Got kéraakandékwa nané déku taambamba.”

**72** Got talimba nana gwaal waarranga maandéka bakamat anga wandén, “Wuné gunéké mawulé sémbéraa yakawutékwa.

Yate gunat wuné yé kun yakawutékwa. Yi wan wanana wa.” Naandén.

**73-74** Wani kundi Got nana gwaal maandéka waarranga bakamu Abrahamét wa wandén.

Wandén pulak ye dé nanat yé kun yate nana maa-mana taambamba nané kéraakandékwa.

Kéraandu déké nané yéku jémbaa yate déké katik wup yaké nané.

**75** Yate nané ani képmaamba yatéte akwi nyaaa déku kundi kurkasale vékute yéku musé male yakanangwa.

Yate déku ménimba yé kunmba yaté kanangwa.

<sup>76</sup> Wani kundi watake Sekaraia déku nyaanét  
anga wandén:

Méné wuna nyaan, sérémāa du dakwa ménéké  
wakandakwa, “Néman Du Gotna yém̄ba  
kundi kwayékwa du wa.” Naakandakwa.

Méné taale yéte Néman Duna yaambu kutlaakét  
yéménu wunga wakandakwa.

<sup>77</sup> Méné wunga yate déku du dakwat  
wakaménéngwa, de yan kapérandi musé  
yasnyéputiye de kéraae déku taambamba  
taakaké yandékwannngé.

<sup>78-79</sup> Asapéri du dakwa kapérandi musé yate de  
ganngungamba téndakwa.

Te sérémāa lambiyak-ngandakwa.

Nana Néman Du Got nanéké mawulé sémbérga  
yate wa wandén, wani wandén du  
déku gaayém̄ba re ani képmaat nanéké  
gaayandénnngé.

Gaaye nané kéraae yéku yaambumba  
taakakandékwa, nané nakurakmawulé  
yate Gorale yé kunmba rananénngé.

Wunga wandén Sekaraia.

<sup>80</sup> Kukmba wani nyaan Jon némaan yandéka  
déku mawulé yé kunmba téen. Dé du yarékapuk  
talimba yaréndén. Yaréte Israel du dakwat Gotna  
kundi wanda sapakngé kaavéréndén.

## 2

### *Maria Jisas kéraalén*

<sup>1</sup> Wani kwaaré Romna néma du déku yé  
Sisar Ogastus genge gaayéna képmaamba tékwa

du dakwana néma du téte wandén, déku du déku képmaamba tékwa akwi du dakwana yé viyaawuré-ndarénnégé. <sup>2</sup> Talimba akwi du dakwana yé yamba viyaatakandakwe wa. Wani jémbaa taale baasnyé yandaka Kwirinius dé Romna néma duké jémbaa yate Siria provinsmba néma du téndén.

<sup>3</sup> Akwi du dakwa deku gwalepanget yéndarén, deku yé viyaaké. <sup>4</sup> Josep Israelna néma du Devitna kém̄ba wa téndén. Devitna gwalepange Betlehem wa. Betlehem Judia distrikmba tékwa. Josep Galili distrikmba tékwa gaayé Nasaret taakatake déku kém̄na gwalepange Betlehemét yéndén. <sup>5</sup> Bét déku aasa aapa wakandéng-ndarén taakwale yémbérén Betlehemét, bérku yé viyaatakaké. Wani taakwana yé Maria wa. Lé nyaan biyaa ralén.

<sup>6-7</sup> Némaamba du dakwa wulaandaka saayénga vékulékndéka bét ye saambake taaléké yapatimbérén. Bét taalé yamba yé wa. Yandéka lé nyaan kéraaké yépm̄aa vékwe bulmakau kwaandakwa gaat wulaalén. Wulaae léku léwinyan wamba kéraalén. Kéraae laplapét saaplén. Saape bulmakau kakwa mikwamba waambitakaléka kwaandén.

*Gotna kundi kure gaayakwa dunyansé sipsipké kaave véran dunyansat kundi kwayéndarén*

<sup>8</sup> Wani gaan du ras nak taalémba deku sipsipké kaave véréndarén. Wani taalé Betlehem tékwanmba téndékwa. <sup>9</sup> Kaave véréndaka Néman Du Gotna kundi kure gaayakwa du nak Gotna gaayémba gaaye téndéka néma yaa pulak

kalkal naae yaae det kaaléndén. Kaaléndéka vétake asa wup wa yandarén. <sup>10</sup> Yandaka Gotna gaayémba gaayakwa du det wandén, “Guné wup yaké yamarékate. Ma véku. Yéku kundi wakawutékwa. Akwi du taakwa ani kundi vékute mawulé tawulé yate dusék takwasék yakan-dakwa. <sup>11</sup> Bulaa taakwa nak nyaan kéraalén wa Devitna gaayémba. Wani kéraalén nyaan guné Satanna taambamba kéraae gunat yékun yaké yakwa du wa. Wani Got wan du Krais. Wani nana Néman Du. <sup>12</sup> Bulaa ye vékangunéngwa wani nyaan. Aasa laplapét giye bulmakau kakému kan mikwamba waambitakaléka wa kwaandékwa. Ye wawutén pulak vétake vékusék-ngangunéngwa wuna yéku kundiké.” Naandén.

<sup>13</sup> Wandéka Gotna kundi kure gaayakwa dunyansé rékaamba bari gaaye wani duwale téndarén. Téte gwaaré anga waandarén:

<sup>14</sup> Got anjoré déku gaayémba rate yékun wa yandén.

Déku yé kavérék-nganangwa.

Got mawulé tawulé yandékwa du dakwa yénga yékunmba téndaru ani képmaamba.

Wunga waandarén.

### *Sipsipké kaavérān du Jisas véké yéndarén*

<sup>15</sup> Wani dunyan wunga gwaaré waatake de yaasékatake waambule waarendarén Gotna gaayét. Waarendaka sipsipké kaavérān dunyansé deku kapmang bulte wandarén, “Ma yékwak Betlehemét. Ye Néman Du wan nyaannge waake vékanangwa.” <sup>16</sup> Wunga watake bari yéndarén. Ye gaayémba saambake Maria ambét Josep, wani

nyaan waak véndarén. Nyaan bulmakau kakému kan mikwamba kwaan. <sup>17</sup> Nyaan vétake Gotna kundi kure gaayakwa du wani nyaanngé wandén pulak saapéndarén du dakwat. <sup>18</sup> Wandaka vékute akwi vatvat naate wandarén, “Yéki. Wan yénga pulak musé dé?” Naandarén.

<sup>19</sup> Wunga wandaka Maria sipsipké kaavéran duna kundi vékute léku mawulémba vékulakarélén.

<sup>20</sup> Sipsipké kaavéran dunyansé waambule yéte Gotna yé kavérékte déké mawulé tawulé yan-darén. Yate wandarén, “Néman Du Got nanat kundi wandéka vékutake nané wani musé akwi wa vénanén.” Naandarén.

### *Déku yé Jisas waatakandarén*

<sup>21</sup> Nyaa taambak kaayék vétik (7) yéndéka kaayék kupuk yambanmba, “Gotna du” naate wani nyaanna sépé sékundarén. Sékwe déku yé Jisas waandarén. Talimba Maria nyaan raka-puk yalén sapak Gotna kundi kure gaayakwa du wa wani yé lat wandén.

### *Simeon ambét Ana Jisas vémbérén Gotna gaamba*

<sup>22</sup> Maria nyaan kéraae Moses kwayén apakundi wakwa pulak yaké mawulé yalén, léku sépé Gotna ménimba nakapuk yé-kun yandénngé. Yatake nakurak baapmu pulak yéndéka Josepale Jerusalemét yémbérén. Néman Du Gorét kwayéké watake Jisas kure yémbérén Jerusalemét. <sup>23</sup> Néman Du Gotna apakundi nak anga wandékwa. “Du dakwa kéraandara akwi léwinyan Gorké ma kwayéndarék.” Naandékwa.

<sup>24</sup> Néman Du Gotna apakundi nak waak anga wandékwa, “Du taakwa bérku dunyanngu nyaan Gorké kwayéte bét déké nyaamiyo vétik viyaae ma kwayémbérék. Nyaamiyot kwayékapuk ye nyaamiyo pulak apit ma kwayémbérék.” Naandékwa. Maria ambét Josep wani kundi wandékwa pulak wunga yaké watake yémbérén Jerusalemét.

<sup>25</sup> Wani sapak du nak déku yé Simeon dé Jerusalemma yaréndén. Dé yéku yapaté male yate dé Gorale kundi bulkwa du wa yaréndén. Got Israel du dakwat yé kun yanda sapakngé wa kaavéréndén. Gotna Yaamambi déku mawulém̄ba wa wulaae ran. <sup>26</sup> Talimba Gotna Yaamambi Simeonét anga wandén, “Méné bari kiyaakapuk ye rate vékaménéngwa Néman Du Got wani wan du Krais.” Wunga wandéka dé wani muséké kaavéréndén. <sup>27</sup> Gotna Yaamambi déku mawulém̄ba wulaae rate wandéka Gotna kundi bulndakwa néma gaat wulaandén. Wulaandéka Jisasna aasa aapa bét Jisas kure wulaambérén, Gotna apakundi wandékwa pulak léwinyanét yaké. <sup>28</sup> Kure wulaambéréka Simeon wani nyaan kéraae déku taambamba kure téte, Gotna yé kavérékte anga wandén:

<sup>29-30</sup> Néman Du, talimba waménén kundi bulaa a sékérékndékwa.

Wa vewutén bulaa nanat yé kun ye nané kéraae Gotna taambamba taakaké yakwa du.

Bulaa wuné ména jémbaa yakwa du  
wunat waménu mawulé tawulé ye  
kiyaakawutékwa.

31 Ani duwat wa waménén, dé wani jémbaa yandu akwi taalémba tékwa du dakwa véndarénngé.

32 Gaan yaa vérékte kaalékwa pulak ani nyaan nak gaayé du dakwana mawulémba kaalékandékwa.

Kaaléndu de Gorké yé kunmba vékulaka-kandakwa.

Vékulakate Israel du dakwa deku yé kavérék-ngandakwa.

**33** Jisasna aasa aapa Simeon wan wani kundiké vékulaka vékulaka naambérén. **34-35** Naambéréka Simeon Gorét waatakundén, bérét yé kun yandénngé. Waatakutake wani nyaanna aasa Mariat anga wandén:

Ma véku. Got wa wandén, ani du jémbaa yandu némaamba Israelsé dat kuk kwayéndaru, némaamba Israelsé déku kundi vékukandakwa.

Dé Gotna jémbaa yandu némaamba du dakwa dat kuk kwayékandakwa.

Kuk kwayéndaru ras du dakwa kuk kwayén du dakwana mawulé vékusék-**ngandakwa**.

Du ras dat kapérandi musé yandaru véte apakangél vékute bérukanyénéngwa.

Naandén Simeon.

**36-37** Aanya pa taakwa nak léku yé Ana, Gotna kundi bulndakwa néma gaamba ralén. Lé Fanuelna takwanyan wa. Aserna kémba ralén. Lé Gotna yém̄ba kundi kwayékwa taakwa wa yarélén. Talimba du kumbilén. Kumbiye raléka kaa taambak kaayék vétik (7) yéndéka léku du kiyaan. Kiyaandéka kaa késépéri (84)

wa kwawitakwa kwaalén. Kwaate Gotna kundi bulndakwa gaamba yarélén. Yaréte wani gaa yamba yaasékolékwe. Wunga yate gaan nyaa Gorale kundi bullén. Nakurak apu nakurak apu wa kakémuké yaakére Gorale kundi bullén.

<sup>38</sup> Simeon kundi wasékéyakndéka Josep ambét Maria wayéka wunga témbéréka lé yaae wani nyaanét véte Gotna yé kavéréklén. Kavérékte Jerusalemmba tan du dakwat walén, wani nyaanngé. Talimba Got wa wandén, du nak yaae de kéraae déku taambamba taakandénngé. Talimba wandén kundi sékérékndénngé Ana wani sapakngé kaavérékwa du dakwat walén.

### *De Nasarerét waambule yéndarén*

<sup>39</sup> Néman Du Gotna apakundi wandékwa pulak yasékéyaktake Jisasna aasa aapa dé Nasarerét nakapuk waambule kure yémbérén. Nasaret Galili distrikmba tékwa. <sup>40</sup> Wani nyaan wa némaan ye mayé apa kéraandén. Yandéka déku mawulé yékun yandéka késépéri musé aséké vékutépak naandén. Got déké kurkale véte dat yékun yandén.

### *Jisas naléwuré biyaku du téte Gotna kundi bulndakwa néma gaamba randén*

<sup>41</sup> Akwi kaa Jisasna aasa aapa Jerusalemét yémbérén Pasova waandakwa sapakna kakému kaké. <sup>42</sup> Jisasna kaa tambavétik maanmba kaayék vétik (12) yandéka bét dé kéraae kure sékét yéndarén, akwi kaa yambérén pulak.

<sup>43</sup> Kukmba Pasova waandakwa sapakna kakému kandarén nyaa késndéka de deku gaayét

yéndakwa yaambumba waambule yén. Yéndaka Jisas Jerusalemmba yarépékandén. Yaréndéka déku aasa aapa yamba vékumbérékwe. <sup>44</sup> Bét bérku mawuléké anga wambérén, “Jisas aana kémale wa yéndékwa.” Wunga watake bét nyaa nakurak yaambumba yémbérén. Ye garambu yaap rate yaambumba yén bérku kém bérku du dakwat waatakumbérén déké. <sup>45</sup> Waatakutake dé vékapuk ye déké waakmbérén. Waake waake waakpatimbérén. Waakpatiye Jerusalemét waambule yémbérén, déké waake véké. <sup>46</sup> Ye nyaa kupuk déké waakmbérén. Waake kukmba vémbérén dé Gotna kundi bulndakwa néma gaamba randéka. Dé nak duwat Gotna kundiké yakwasnyékwa néma dunyansale rate deku kundi vékute det késpulak nakpulak muséké waatakundén. <sup>47</sup> Yate deku kundi vékusék naate sékmba sékmba we kaatandéka déku kundi vékurən dunyan vatvat naate vékulaka vékulaka naandarén.

<sup>48</sup> Déku aasa aapa dat véte vékulaka vékulaka naambérén. Yate déku aasa dat walén, “Wuna nyaan, kamuké méné aanat wunga yo? Aané ména aapale wup yate ménéké akwi gaayém̄ba waaktén.” Naalén.

<sup>49</sup> Wunga waléka bérét wandén, “Kamuké béné waakék? Wuné wuna aapanā gaamba rawutékwa. Wan yékun wa. Yéngā béné amba rawutékwangé yamba vékusék-mbénéngwe?” Naandén. <sup>50</sup> Wunga wandéka bét wani kundina waambu yamba kurkale vékusék-mbérékwe wa. <sup>51</sup> Yambéréka dé bérale nakapuk waambule ye Nasaretmba saambakndarén. Saambake yaréte

dé bérku kundi vékute wambérén pulak yandén. Yandéka déku aasa wani muséké léku mawulémba taake yaréte vékulaka vékulaka naalén.

<sup>52</sup> Jisas némaan yandéka déku mawulé vékuték vékuték naandéka késépéri musé aséké vékusék naandén. Got, du dakwa waak, de akwi déké mawulé tawulé yandarén.

### 3

*Baptais kwayékwa du Jon kundi kwayéndén  
(Mt 3:1-12; Mk 1:2-8; Jo 1:19-28)*

<sup>1-2</sup> Taiberius Rommba néma du asapéri (14) kaa téndéka nak kaa Got Jonét kundi kwayéndén. Wani sapak Taiberius Rommba néma du tépékaandéka Pontius Pailat Judia distrikna néma du téndén. Wani sapak Herot Galili distrikmba tékwa du dakwaké néma du téndéka, déku aanyé Filip Ituria distrikmba tékwa du dakwaké, Trakonitismba tékwa du dakwaké waak wa néma du téndéka Lisanias Abilene distrikmba tékwa du dakwaké wa néma du téndén. Yandaka Anas ambét Kaiafas Gotna gaamba jémbaa yakwa akwi dunyanna néma du wa témbérén. Wani sapak Sekaraiana nyaan Jon, dé du yarékapuk taalémba yaréndéka Got dat wandén. <sup>3</sup> Wandéka Jon déku kundi vékutake Jordan kaambélé yékwānmba yeté yaayatéte du dakwat anga wandén, “Guné yangunén kapérandi musé asé yaasékangunu wuné Gotna yém̄ba gunat baptais kwayékawutékwa. Guné Gotna yém̄ba wunga baptais kéraangu guna kapérandi mawulé yasnyéputi-kandékwa.” Naandén Jon.

<sup>4</sup> Jon wunga yandénngé talimba Gotna yém̄ba kundi kwayétan du déku yé Aisaia Gotna nyénḡaamba anga viyaatakandén:

Du nak a waakwa du yarékapuk taalémba.

Waate anga wandékwa, “Néman Duna yaambu ma kutngunék.

Kutngunu yaambu yékunmba kwaakandékwa déké.

<sup>5</sup> Akwi jaangu képmaat ma vaae yambapngunék, yaambu jaangu daawulikapuk yandénngé.

Akwi néma némbu akwi makal némbu waak ma kurkale vaangunék, yaambu wutép wurékapuk yandénngé.

Rangwa yan yaambu ma kutngunu yaambu kayéndéng yéndék.

Matu rakwa yaambu matu ma kéraasolangunu yaambu yékunmba randék.

<sup>6</sup> Wunga yangunu akwi du dakwa vékandakwa det yékun yandénngé Got wani wan du.”

Wani gwaaménja kundi talimba Aisaia wa viyaatakan. Du dakwana mawulé yékun téndu, de Jisas yaamuké yékunmba vékulaka-réndarénngé, wa wani kundi viyaatakandén.

<sup>7</sup> Du dakwana mawulé yékun téndénngé Jon det kundi kwayéndén. Késépéri du dakwa Jon det baptais kwayéndénngé yaandaka det anga wandén, “Guné kapére mawulé yakwa du dakwa wa. Got néma kot vékute néma du randa nyaa a yaandékwa. Wani nyaa Got du dakwa yandarén kapéremuséké rakarka yakandékwa. Wani nyaaké vékulakate guné, dunyansé yaawi tundaka yaange yékwa kaambe pulak, wa wunéké

yaange a yaangunéngwa. <sup>8</sup> Wunéké yaambak. Guné taale yangunén kapérandi musé yaasékatake yéku musé male ma yangunék. Yangunu nak du dakwa véte wakandakwa, ‘De kapérandi musé yaasékatake bulaa yéku musé male wa yandakwa.’ Naakandakwa. Guné guna mawulémba anga wangunéngwa, ‘Nané Abrahamna gwaal waarranga maandéka bakamu a téñangwa. Dé Gotna ménimba yéku musé yakwa du téndén pulak nané waak Gotna ménimba yéku musé yakwa du dakwa a téñangwa.’ Wunga wate paapu wa yangunéngwa. Guné yéku musé yamba yangunéngwe wa. Got mawulé yamu-naae wandu ani matu du saakwe Abrahamna gwaal waarranga maandéka bakamu téngunéngwanngé Got yamba vékulakandékwe wa. Yangunéngwa muséké wa vékulakandékwa.

<sup>9</sup> “Gwaaménja kundi nak wawutékwa. Du nak sék vaakukapuk yakwa miyéké vékulakate kwandang kéraae wani miyé vélékandékwa. Véle yaamba tukandékwa. Bulaa wani gwaaménja kundiké ma vékulaka. Bulaa Got déku kundi vékukapuk yakwa du dakwat wani yandarén kapérandi musé yakata-kandékwa. Yakatandu de yaa apapu yaanpékatékwa taalat yékandakwa.” Naandén.

<sup>10</sup> Jon wunga wandéka de vékute wup yate dat waatakundarén, “Nané kamu yaké nané?” <sup>11</sup> Wunga wandaka det wandén, “Guné laplap vétik kure re guné laplap rakapuk du dakwat ma kwayéngunu. Guné kakému ras taakatake guné kakému kapuk yan du dakwat ma kwayéngunu.”

Naandén.

<sup>12</sup> Wani kundi wandéka de takis kéraakwa du ras déké yaandarén, det baptais kwayéndénngé. Yaae dat wandarén, “Néma du, méné Gorké nanat wakwasnyé-ménéngwa. Nané kamu yaké nané?” <sup>13</sup> Wunga wandaka det wandén, “Guné Romna gavman gunat wan pulak male takis ma kéraangunu. Yate yéwaa kusonaae kéraaké yambak.” Naandén.

<sup>14</sup> Wani kundi wandéka waariyakwa du ras dat waatakundarén, “Wa nané yéngä pulak dé? Nané kamu yaké nané?” Wunga wandaka det wandén, “Guné du dakwat mayé apa yate deku yéwaa baka kéraaké yambak. Guné du dakwat papukundi wate deku yéwaa kéraaké yamarék. Guné jémbaa ye wani kéraangunén yéwaaké mawulé ma yangunu.” Naandén.

<sup>15</sup> Jon wunga yate wunga wandéka akwi du dakwa vékulaka vékulaka naate deku mawulém̄ba wandarén, “Jon wan nanat yékun yandénngé Got wan du Krais dé wani dé, kapuk dé yéngä pulak du dé?” Naandarén.

<sup>16</sup> Wunga vékulakandaka Jon det anga wandén, “Wuné gunat Gotna yém̄ba baptais kwayékawutékwa. Wuna kukmba yaaké yakwa du wan néma du wa. Wuné baka du a téwutékwa. Déku mayé apa wa wuna mayé apat taalékérān. Baka du téwutékwanmba, yéngä pulak ye déku jémbaa yaké wuté? Dé néma du randéka wuné déké jémbaa yaké yapatiwutékwa, wuné baka du téwutékwanmba. Wuna kukmba yaaké yakwa du Gotna Yaamambi gunat kwayékandékwa. Guna kapérandi musé kéraae yaamba tukandékwa.

**17** Dunyansé wit géle yéku wit sék kutpévéte gérindakwa. Gérisotake yéku wit sék gaamba taakate apa vaanjatindakwa. Yandakwa pulak wuna kukmba yaaké yakwa du wunga yakandékwa. Dé déku du dakwa kéraae kure ye déku gaayémba taakatake, kapérandi musé yan du dakwa kéraae yaanpékatékwa yaamba vaanjanda-kandékwa.” Naandén.

**18** Jon wani kundi du dakwat kwayéte Gotna kundi ras waak kwayéndén, deku mawulé yékun téndénngé.

### *Herot wandéka Jon kalapusmba taakandarén*

**19** Galilimba tékwa du dakwana néma du Herot déku aanyé yaréndéka dé déku taakwa kéraandén. Léku yé Herodias. Késépéri kapérandi musé ras waak yandén. **20** Yandéka Jon dat waarundéka Herot dé ani kapérandi musé waak yandén. Dé wandéka déku dunyansé Jon kalapusmba taakan-darén.

### *Jon Jisasét Gotna yémba baptais kwayéndén (Mt 3:13-17; Mk 1:9-11)*

**21-22** Talimba Herot Jonét kalapusmba taakandarénngé wakapuk yandéka, wani sapak Jon déké yaan akwi du dakwat Gotna yémba baptais kwayéndén. Kwayétake Jisasét waak Gotna yémba baptais kwayéndén. Kwayéndéka téte Gorale kundi bulténdéka nyét kepukandéka Gotna Yaamambi nyaamiyo pulak ye Jisaské gaayandén. Gaayandéka kundi nak Gotna gaayémba anga wan, “Méné wuna nyaan wa. Ménéké néma mawulé wa yawutékwa. Ménéké wuna mawulé yékun yandékwa.” Naandén.

*Jisasna gwaal waaraanga maandéka  
bakamuséna yé*  
*(Mt 1:1-17)*

<sup>23</sup> Jisasna kaa 30 yandéka déku jémbaa baasnyé yandén. Du dakwa déké anga wandarén, “Wan Josepna nyaan wa.” Naandarén.

Josep wan Helina nyaan wa.

<sup>24</sup> Heli wan Matatna nyaan wa.

Matat wan Livaina nyaan wa.

Livai wan Melkina nyaan wa.

Melki wan Janaina nyaan wa.

Janai wan Josepna nyaan wa.

<sup>25</sup> Josep wan Matatiasna nyaan wa.

Matatias wan Amosna nyaan wa.

Amos wan Nahumna nyaan wa.

Nahum wan Eslina nyaan wa.

Esli wan Nagaina nyaan wa.

<sup>26</sup> Nagai wan Matna nyaan wa.

Mat wan Matatiasna nyaan wa.

Matatias wan Semenna nyaan wa.

Semen wan Josekna nyaan wa.

Josek wan Jodana nyaan wa.

<sup>27</sup> Joda wan Joananna nyaan wa.

Joanan wan Resana nyaan wa.

Resa wan Serubabelna nyaan wa.

Serubabel wan Sealtielna nyaan wa.

Sealtiel wan Nerina nyaan wa.

<sup>28</sup> Neri wan Melkina nyaan wa.

Melki wan Adina nyaan wa.

Adi wan Kosamna nyaan wa.

Kosam wan Elmadamna nyaan wa.

Elmadam wan Erna nyaan wa.

<sup>29</sup> Er wan Josuana nyaan wa.

Josua wan Elieserna nyaan wa.  
Elieser wan Jorimna nyaan wa.  
Jorim wan Matatna nyaan wa.  
Matat wan Livaina nyaan wa.  
<sup>30</sup> Livai wan Simeonna nyaan wa.  
Simeon wan Judana nyaan wa.  
Juda wan Josepna nyaan wa.  
Josep wan Jonamna nyaan wa.  
Jonam wan Eliakimna nyaan wa.  
<sup>31</sup> Eliakim wan Meleana nyaan wa.  
Melea wan Menana nyaan wa.  
Mena wan Matatana nyaan wa.  
Matata wan Natanna nyaan wa.  
Natan wan Devitna nyaan wa.  
<sup>32</sup> Devit wan Jesina nyaan wa.  
Jesi wan Obetna nyaan wa.  
Obet wan Boasna nyaan wa.  
Boas wan Salmonna nyaan wa.  
Salmon wan Nasonna nyaan wa.  
<sup>33</sup> Nason wan Aminadapna nyaan wa.  
Aminadap wan Atminna nyaan wa.  
Atmin wan Arnina nyaan wa.  
Arni wan Hesronna nyaan wa.  
Hesron wan Peresna nyaan wa.  
Peres wan Judana nyaan wa.  
<sup>34</sup> Juda wan Jekopna nyaan wa.  
Jekop wan Aisakna nyaan wa.  
Aisak wan Abrahamna nyaan wa.  
Abraham wan Terana nyaan wa.  
Tera wan Nahorna nyaan wa.  
<sup>35</sup> Nahor wan Serukna nyaan wa.  
Seruk wan Reuna nyaan wa.  
Reu wan Pelekna nyaan wa.

Pelek wan Eberna nyaan wa.  
 Eber wan Selana nyaan wa.  
<sup>36</sup> Sela wan Kainanna nyaan wa.  
 Kainan wan Arpaksatna nyaan wa.  
 Arpaksat wan Siemna nyaan wa.  
 Siem wan Noana nyaan wa.  
 Noa wan Lamekna nyaan wa.  
<sup>37</sup> Lamek wan Metuselana nyaan wa.  
 Metusela wan Enokna nyaan wa.  
 Enok wan Jaretna nyaan wa.  
 Jaret wan Mahalalelna nyaan wa.  
 Mahalalel wan Kenanna nyaan wa.  
<sup>38</sup> Kenan wan Enosna nyaan wa.  
 Enos wan Setna nyaan wa.  
 Set wan Adamna nyaan wa.  
 Adam wan Gotna nyaan wa.

## 4

### *Satan Jisasna mawulé yakwe véndén (Mt 4:1-11; Mk 1:12-13)*

<sup>1</sup> Gotna Yaamambi Jisasna mawulémba wulaae rate apamama yandéka dé Jordan kaambélé yaasékatake yéndén. Yéndéka Gotna Yaamambi wa dat kure yén du yarékapuk taalat. <sup>2</sup> Kure yéndéka dé wani taalémba nyaa dumi vétik (40) yaréndéka Satan déku mawulé yakwe véndén. Wani sapak dé kakému yamba kandékwe. Ye wani nyaa yéndéka kukmba wa Jisasét kaandé yan. <sup>3</sup> Yandéka Satan dat anga wandén, “Méné anga waménéngwa, ‘Wuné Gotna nyaan a.’ Wunga wate bulaa wani muséké wunat ma wakwasnyéménu. Ma waménu de ani matu

waalakwe kakému yandaru. <sup>4</sup> Yandaru wuné ve wakawutékwa, méné Gotna nyaan wa.” Wunga wandéka wandén, “Yamba wa. Wani muséké ani kundi Gotna nyéngaaamba wa kwaakwa: Du dakwa kakémuké male vékulakate de kurkale katik téké daré. Wani kundi vékute matu kakému yandénngé katik waké wuté.” Naandén.

<sup>5</sup> Jisas wani kundi wandéka Satan dat kéraae kure waarendén. Kure waare dat ani képmaamba tékéskwa akwi gaayé bari wakwasnyéndén.

<sup>6</sup> Wakwasnyéte dat anga wandén, “Got wandéka ani képmaamba tékwa akwi gaayé, wani gaayémba yarékwa akwi du dakwa akwi salmu walmu waak wan wuna taambamba wa randakwa. Wuné wani musé du nakét kwayéké mawulé ye wa dat kwayékawutékwa, dé déké néma du randénngé. Wuné wani musé ménat kwayékawutékwa. <sup>7</sup> Méné kwaati séte wunéké waandé daate wuna yé kavérékménu, wuné ménat kwayékawutékwa. Kwayéwutu méné deku néma du rakaménéngwa.” <sup>8</sup> Wunga wandéka wandén, “Yamba wa. Gotna nyéngaaamba ani kundi wa kwaakwa: Méná néma du dé Got nakurak wa. Méné déké waandé daate dat ma waataku. Déku yé male ma kavérék. Wani kundi vékute wuné ménéké katik waandé daaké wuté. Yate méná yé katik kavérékngé wuté.” Naandén.

<sup>9</sup> Jisas wani kundi wandéka Satan dat kéraae kure yéndén Jerusalemét. Kure ye waare dé Gotna kundi bulndakwa néma gaana saambumba taakandén. Taakatake dat anga wandén, “Méné anga waménéngwa, ‘Wuné Gotna nyaan a.’ Wunga wate méné ma késéke daawuli.

**10-11** Wani muséké ani kundi wa kwaakwa Gotna nyéngaamba:

Got déku kundi kure gaayakwa duwat wandu de ménéké yé kunmba vékandakwa.

Méné deku taambamba yé kunmba rakaménengwa.

Ye ména maan matumba katik viyaaké méné.

Méné wani kundi vékute késéke daawuliye yé kunmba raménu akwi du dakwa vétake anga wakandakwa. Méné Gotna nyaan wa.”

Naandén. **12** Wunga wandéka wandén, “Yamba wa. Wani muséké ani kundi Gotna nyéngaamba wa kwaakwa: Got nakurak wa ména Néman Du. Dé apamama yate ménat yé kun yandu méné waangété du yakwa pulak katik yaké méné. Wani kundi vékute wuné katik késéke daawuliké wuté.” Naandén.

**13** Wunga wandéka Satan nak jémbaa yandénngé Jisasét yamba wandékwe wa. Ye dat yaasékate anga wandén, “Nak nyaa waambule yaakawutékwa. Nakapuk kalmu wuna kundi vékuké dé?” Naatake yéndén.

*Jisas Galilimba jémbaa baasnyé yandén  
(Mt 4:12-17; Mk 1:14-15)*

**14** Gotna Yaamambi Jisasna mawulémba rate mayé apa kwayéndéka Galilit nakapuk waambule yéndén. Yéndéka wani taalémba tékwa akwi gaayémba du dakwa déké bul yé yaayandarén.

**15** Dé Gotna kundi bulndakwa gaamba wulaate du dakwat Gotna kundi kwayéndén. Kwayéndéka vékute de akwi Jisasna yé kavérékndarén.

*Nasaretsé Jisasét kuk kwayéndarén  
(Mt 13:53-58; Mk 6:1-6)*

<sup>16</sup> Jisas Nasarerét yéndén. Talimba makalnyan yare aasa aapale wani gaayét yéndén. Ye yare némaan ye wani gaayé yaasékatake yéndén. Wani sapak Nasarerét waambule ye wani gaayémba yaréndén. Yare yaap yaré nyaa Gotna kundi bulndakwa gaat wulaandén. Akwi yaap yaré nyaa yandén pulak ye Gotna kundi bulndakwa gaat wulaandén. Wulaae re Gotna kundi nyéngaamba véte waké waarape téndén. <sup>17</sup> Téndéka Gotna yémba talimba kundi kwayétan du Aisaia viyaan nyéngaa kure yaae dat kwayéndarén. Kwayéndaka lékwe véndén ani kundi viyaatakandéka kwaandéka. Vétake det anga wandén:

<sup>18</sup> Néman Du Got wunat wa wandén, wuné déku kundi musé asé kure rakaپuk du dakwat kwayéwuténngé.

Watake déku Yaamambi tiyaandéka wuna mawulémba a wulaae rakwa.

Got wunat wa wandén, wuné yaae ani kundi det kwayéwuténngé.

De kalapus pulakmba kwaakwa du dakwa bulaa yé kun tékandakwa.

De ménimbo pulak yan du dakwa bulaa kurkale vékandakwa.

Kaangél kurkwa du dakwa bulaa nakapuk katik kaangél kurké daré.

<sup>19</sup> Bulaa Néman Du Got du dakwat yé kun yakandékwa.

<sup>20</sup> Jisas wunga watake wani nyéngaa nakaپuk valambare wani gaaké séngitékwa duwat

kwayéndén. Kwayétake randén, wani kundi det yakwasnyéké. Randéka wani gaamba rakésén du dakwa akwi dat male véndarén. <sup>21</sup> Véndaka det anga wandén, “Bulaa Gotna nyéngaamba kwaakwa kundi wa sékérékén. Yandéka wa véngunén.” <sup>22</sup> Naandéka de wani kundi vékutake vatvat naate déku kundiké vékulaka vékulaka naan. Yate wandarén, “Yéki. Wa yéku kundi wa wandékwa.” Naatake anga wandarén, “Wani du wan Josepna nyaan wa. Yéngä pulak ye dé wani yéku kundi wato?” Naandarén.

<sup>23</sup> Wunga wandaka Jisas det anga wandén, “Kalmu guné apapu wangunéngwa kundi wunat anga waké guné? ‘Dokta, ménékét ména sépé ma yé kun yaménék.’ Wunga wate kalmu anga waak waké guné? ‘Kaperneammba yaménén jémbaa wa vénanén. Yaménén pulak ménékét ména gwalepangemba yatéte ma yaménu.’ Naanguna kundi wa waambule anga wawutékwa. <sup>24</sup> Guné a wawutékwa. Gotna yém̄ba kundi kwayékwa dunyan deku gwalepangemba yatéte kundi kwayéndaka deku gaayém̄ba tékwa du dakwa deku kundi vékumuké kalik yandakwa. Yi wan wanana wa.

<sup>25</sup> “Ma véku. Talimba Gotna yém̄ba kundi kwayétan du Elaija yaténdéka Israelmba du kiyaan kwawitakwa asa wa yarékésén. Wani sapak yaténdaka kaa kupuk baapmu taambak kaayék nakurak (6) maas yamba viyaae. Yandéka akwi gaayém̄ba néma kaandé yan. <sup>26</sup> Yandéka Got Elaijat yamba wandékwe, dé ye Israelmba yarékéskwa du kiyaan kwawitakwasat yé kun yandénngé. Got Elaijat wandén, dé ye

nak taalémba yarékwa kwawitakwat nak yé kun yandénngé. Lé Saidonmba tékwa gaayé Sarefatmba yarélén.

<sup>27</sup> “Ani kundi waak ma véku. Gotna yém̄ba kundi kwayékwa du nak waak déku yé Elisa, dé yaréndéka lepro yan dunyan asa wa yarékésén Israelmba. Yaréndaka Elisa det yamba kururéndékwe. Nakurak duwat male kururéndén. Wani du Siria du wa, déku yé Naman. Wan Israel du yamba yé wa.” Naandén Jisas.

<sup>28</sup> Gotna kundi bulndakwa gaamba ran du dakwa Jisas wan kundi vékutake anga wandarén, “Jisas wunga wate wa nanat waarundén wa.” Wunga wate asa rakarka wa yandarén. <sup>29</sup> Ye waaraape Jisasét kulkiye gaayé yaasékatake kaapat témbét-sangwandéndarén. Deku gaayé anjoré némbu nakmba tén. Téndéka Jisas témbére dé wani némbuna jaangwat kure yéndarén. Dé wani jaangumba vaanjandaké watake kure yéndarén. <sup>30</sup> Kure ye wunga yaké yapatindarén. Dé deku nyéndémba ye gwaande de yaasékatake dé wa yén.

*Jisas wandéka kutakwa kulure kure yatan du  
yé kun yandén*  
(Mk 1:21-28)

<sup>31</sup> Jisas Kaperneamét daawulindén. Wani gaayé Galili distrikmba tékwa. Daawuliye saambake yaréndén. Yare yaap yaré nyaas Gotna kundi bulndakwa gaamba wulaae du dakwat Gotna kundiké yakwasnyéndén. <sup>32</sup> Mayé apale wa det Gotna kundi kwayéndén. Kwayéndéka

vékute vatvat naate vékulaka vékulaka naandarén.<sup>33</sup> Yaréndäka kutakwa kulure kure yatékwa du nak wani gaamba randén. Randéka dat kure yatékwa kutakwa némaanmba waalén.<sup>34</sup> Waate anga walén, “Méné Nasaret du Jisas, nanat kamu yaké méné yaak? Nanat yaavan kurké méné yaak kapuk? Méné a vésékwutékwa. Méné Gotna yéku laku du wa.” Naalén.

<sup>35</sup> Wunga waléka lat wandén, “Nyéné kundi bulké yambak. Wani du yaasékatake ma yaale yaange yényénu.” Naandéka wani du taakuso-rakléka képmaamba vaakétndén. Vaakétndéka dat yaavan kurkapuk yaasékatake yélén.<sup>36</sup> Yéléka akwi du dakwa vétake vatvat naate dekét deku kapmang bulte wandarén, “Yéki. Ani du yénga kundi dé wo? Dé du dakwat kulure kure yatékwa kutakwat wandéka wani du dakwa yaasékote yaange yéndakwa. Néma du rate apamama yakwa du wa.” Naandarén.<sup>37</sup> Wunga wandaka wani taalémba tékéskwa akwi gaayémba Jisaské kundi saapé yé yaayandarén.

*Jisas Saimon Pitana naakumot kururéndén  
(Mt 8:14-15; Mk 1:29-31)*

<sup>38</sup> Jisas waarape Gotna kundi bulndakwa gaa taakatake Saimonna gaat wulaandén. Saimonna naakumo néma baat yandéka kwaalén. Kwaaléka Jisasét wandarén, dé yaae lé kururéndénngé.<sup>39</sup> Wandaka wulaae lé kwaanale téte wandéka wani baat késén. Yandéka wani taakwa bari waarape kakémü kéraae det kwayélén.

*Jisas némaamba du dakwa wa kururéndén  
(Mt 8:16-17; Mk 1:32-34)*

**40-41** Garambu nyaa daawulindéka yaap yaré nyaa yéndéka baat yakwa du dakwa nyambalé, sépémaalé maan taamba kapére yan du dakwa nyambalé, kutakwa kulure kure yatékwa du dakwa nyambalé waak wa Jisaské kure yéndarén. Kure yéndaka dé déku taamba wani du dakwa nyambalésémba kutndéka de nakapuk yékun yandarén. Yandaka késépéri du dakwat kulure kure yatan kutakwasat wandéka yaalandarén. Yaale yéte dat wandarén, “Méné Gotna nyaan wa.” Wunga wate wa vékusékndarén. Dé Got wan du Krais wa. Wunga vékusékndaka det némaanmba wandén, “Wani muséké saapéké yambak.” Wandéka yaange yéndarén.

*Jisas yeayé yaayatéte Gotna kundi kwayéndén  
(Mk 1:35-39)*

**42** Ganmbamba waarape wani gaayé yaasékatake du dakwa yarékapuk taalat yéndén, Gorale kundi bulké. Yéndéka du dakwa déké waake yéndarén. Ye dé ve wandarén, “Méné nanale yaré. Nak gaayét yéké yambak.”

**43** Naandaka det anga wandén, “Wuné nak gaayét ye Gotna kundi kwayékawutékwa, Got néma du rate du dakwaké véké yandékwangé. Got wani jémbaa yawuténngé wa wandéka yaawutén.”

**44** Naatake Galili distrik yaasékatake ye Judia distrikmba saawe yéte Gotna kundi bulndakwa gaamba du dakwat Gotna kundi kwayétendén.

## 5

*Jisas du rasét wandén dale yéndarénngé  
(Mt 4:18-22; Mk 1:16-20)*

<sup>1</sup> Nak nyaa Jisas Genesaret néma gu kwaawuna wutépmba téndéka asa du dakwa wa yaae dale jaawuwe téndarén, Gotna kundi vékuké. <sup>2</sup> Jisas te véndén bot vétik néma gu kwaawuna wutépmba rambéréka. Gukwami wurékwa dunyan de takamba wa bot yaasékatake aaswut yakwasnyéréndarén. Yakwasnyéréndaka véndén deku bot rambéréka. <sup>3</sup> Vétake bot nakmba waaréndén. Wani bot wa Saimonna bot wa. Waare rate Saimonét wandén, dé bot valuwindu ayélap yépulak naandénngé. Wandéka valuwindéka ye awulaka botmba rate wutépmba tékésén du dakwat Gotna kundi yakwasnyéndén.

<sup>4</sup> Kundi bulsekéyaktake Saimonét anga wandén, “Bot ma nyéndé néma gu kwaawut kure wulaae méné ména dunyansale guné aaswut vaanjande guné gukwami wuréké ya.” Naandén. <sup>5</sup> Wunga wandéka anga wandén, “Néman Du, gaan nané néma jémbaa wa yananén. Ye gukwami yamba wurénangwe wa. Waménéngwanngé vékwe wa aaswut nakapuk vaanjanda-kawutékwa.” <sup>6</sup> Wunga watake aaswut vaanjande asa gukwami wa wuréndarén. Wuréndaka aaswut tékngé tékngé yan.

<sup>7</sup> Yandéka nak botmba rakésén dunyanét waandarén, de yaae kutndarénngé. Waandaka yaandaka bot vétikmba kéraasangwandé-ndarén kwaami. Yandaka bot véréti gumba daawuliké yan. <sup>8-10</sup> Yambéréka vétake gukwami némaamba wuréndarénngé vékulakate Saimon Pita, dale botmba rakésén dunyan waak vatvat naandarén. Sebedina nyaan vétik Jems ambét Jon bét waak vatvat naan. Bét Saimonale

jémbaa yatémbérén. Vatvat naae Saimon Jisasna maanale kwaati séte dat anga wandén, “Néman Du, wuné kapéremusé yakwa du a. Méné wuné yaasékatake ma yé.” Naandéka dat wandén, “Méné wup yaké yambak. Méné gukwami wuréménén pulak méné wuna jémbaa yate du dakwa kéraakaménngwa, de wuna jémbaamba yaalandarénngé.” Naandén. <sup>11</sup> Naandéka de botmba ye bot wutéprmba témbétsotake deku musé asé akwi yaasékatake dale yéndarén.

*Jisas wandéka lepro yan du nak yé kun yandén  
(Mt 8:1-4; Mk 1:40-45)*

<sup>12</sup> Jisas ye gaayé nakmba randén. Lepro yan du nak wani gaayémba yaréndén. Déku sépé waasémama wurésapén. Wani du Jisasét vétake yaae kwaati séte waandé daate dat anga wandén, “Néman Du, wuné yé kun yawuténngé méné mawulé yamunaae ma waménu wuné yé kun yakawutékwa.” Naandén. <sup>13</sup> Naandéka dat taamba kutte wandén, “Yé kun yaménénngé wa mawulé yawutékwa. Méné ma yé kun ya.” Naandéka wani lepro késndéka wani du yé kun yan. <sup>14</sup> Yandéka dat wandén, “Ma véku. Ménat yawutén muséké nak du wat waké yambak. Méné Gotna gaamba jémbaa yakwa duké ye déku ménimba téménu dé ména sépat vékandékwa. Véndu méné yé kun yaménénngé talimba Moses wan pulak Gorké kwaami ma kwayéménék. Kwayéménénu du dakwa véte lepro késndéka yé kun yaménénngé wa vékusék-*ngandakwa*.” Wunga wandéka yéndén.

**15** Jisas wunga yandéka genge gaayémba asa du dakwa wa déku mayé apaké kundi bulndarén. Yate asa du dakwa wa Jisaské yaandarén, Gotna kundi vékute Jisasét waatakundaru dé sépémaalé kapére yan du dakwat kururéndénngé. **16** Yaandaka apapu det yaasékate dé du yarékapuk taalémba yéte Gorale kundi bulndén wamba.

*Jisas wandéka maan kapére yan du yékun yandén*

(Mt 9:1-8; Mk 2:1-12)

**17** Nak nyaa Jisas du dakwat Gotna kundiké yakwasnyé-téndéka de Farisi du ras, apakundiké vékusékngwa du ras, wunga rakésndarén. Wani dunyansé Galili distrikmba tékwa akwi gaayé, Jerusalem, Judia distrikmba tékwa ras gaayé waak, ge gemba yaandarén. Yaae rakésndaka Néman Du Gotna mayé apa Jisasna mawulémba wulaae téndéka baat yakwa du dakwa, sépémaalé kapére yan du dakwat waak kururéndén.

**18** Yandéka du ras maan taamba kapére yan du nak jaambémba yaate yaandarén. Yaate yaae gaat wulaae Jisas téndénmba taakaké mawulé yandarén. **19** Yandaka némaamba du dakwa téndaka taalé vékulékén. Vékulékndéka kure wulaaké yapatindarén. Yaambu yamba yé wa. Yandéka gaamba waare nak sakumba ayéláp péraalékundarén. Péraae wani du kwaan jaambémba baangwit téwaakwe wani yaambumba dé jaambale kusandandarén du dakwana nyéndémba. Kusande Jisasna saawimba taakandarén. **20** Taakandaka Jisas vététe anga vékusékndén. Deku mawuléké

wandarén, dé wani duwat kururémuké apa yandékwānngé. Wunga vékute wani duwat wandén, “Wuna du, yaménén kapérandi musé wa yasnyéputiwutén.” Naandén.

<sup>21</sup> Jisas wani kundi wandéka de apakundiké vékusékngwa dunyan, Farisi dunyan waak deku kapmang bulte anga wandarén, “Yéngä pulak du dé wani du? Du dakwa yakwa kapérandi musé wan Got male wa yasnyéputikwa. Wani du wa wakwa, ‘Wuné yandén kapérandi musé wa yasnyéputiwutén.’ Dé baka du wunga wate wa Gorét wasélékndékwa wa.” Naandarén.

<sup>22</sup> Naandaka Jisas deku mawulé vékusékte wa det anga wandén, “Kamuké guné guna mawuléké vékulako? Guné wunga yaké yambak. <sup>23-24</sup> Wuné Duna Nyaan ani képmaamba téte yandarén kapérandi musé yasnyéputimuké wa apamama yawutékwa. Guné wani muséké yamba vékusék-ngunénngwe wa. Yandén kapérandi musé yasnyéputiwuténngé wate baka kundi wuté wak, kapuk néma kundi wuté wak? Dé waarape yéndénngé wamunaae wan néma kundi waké wuté kapuk? Guné wuna mayé apaké yékunmba vékusék-ngunénngé wa wuné ani kundi bulaa dat wakawutékwa.” Naatake maan kapére yan duwat wandén, “Méné ma waarape ména jaambé kéraae kure ména gaat yéménék.” <sup>25</sup> Naandéka akwi du dakwana ménimba bari waarpndén. Waarape kwaandén jaambé kéraae kure Gotna yé kavéréklaakét yéndén déku gaat.

<sup>26</sup> Yéndéka akwi du dakwa vétake vatvat naandarén. Naate Gotna yé kavérékndaka deku mawulé géndéka, anga wandarén, “Yéki. Bulaa

nakpulak néma musé nak a vénanén.” Naandarén.

*Jisas Livait waandén dale yéndénngé  
(Mt 9:9-13; Mk 2:13-17)*

<sup>27</sup> Kukmba Jisas ye véndén takis kéraakwa du nak takis kéraandékwa gaamba randéka. Wani duna yé Livai wa. Vétake Jisas dat anga wandén, “Méné ma yaa wunale.” <sup>28</sup> Naandéka waarape akwi musé asé yaasékatake Jisasale yéndén.

<sup>29</sup> Livai ye déku gaamba kakému rékaamba yaakéndén Jisaské. Yaakétake wandéka de takis kéraakwa dunyansé késépéri, kapérandi musé yakwa dunyan késépéri, Jisasna dunyansé waak, wunga kandarén kakému béraley sékét. <sup>30</sup> Karéndaka de Farisi dunyan ras, deku jémbaamba gwaande apakundiké vékusékngwa dunyan ras, de Jisasna dunyansat waarute anga wandarén, “Kamuké guné takis kéraakwa dunyan, kapérandi musé yakwa dunyan ras waak, guné dele kakému kulak ko?” Naandarén.

<sup>31</sup> Naandaka Jisas det gwaaménja kundi nak anga wandén, “Yékunmba yatékwa du dakwa doktaké yamba yéndakwe wa. Baat yakwan, sépémaalé maan taamba kapére yan du dakwa male wa yékwa doktaké. Yéndaka dokta deku sépé kururéndékwa.” <sup>32</sup> Naatake wandén, “Wuné du dakwana kapérandi mawulé wa kururéwutékwa. Kapérandi mawulé vékukwa du dakwa yandarén kapérandi mawulé yaasékatake wunéké yaae wuna kundi vékundarénngé wa gaayawutén. Yéku mawulé vékukwa du dakwaké yamba vékulakawutékwe wa.” Naandén Jisas.

*Jisas kakému yaakétnakwanngé wandén  
(Mt 9:14-17; Mk 2:18-22)*

<sup>33</sup> Dunyan ras yaae Jisasét anga wandarén, “Baptais kwayékwa du Jonna dunyan Gorale kundi bulké yate de késépéri nyaa kakému yaakétnakwa. Yaakéré baka yaréte Gorale kundi bulndakwa. Farisi dunyan wunga male yandakwa. Ména dunyan wunga yamba yandakwe wa. De akwi nyaa kakému kulak kandakwa. Kamuké daré ména dunyan kakému yaakérkapuk yo?” <sup>34</sup> Naandaka Jisas det gwaaménja kundi nak anga wandén, “Du nak taakwa kéraaké yandu du dakwa mawulé tawulé yatéte kakému yaake kaké daré, kapuk wandu de kakému yaakérké daré? Wa kakandakwa. Taakwa kéraaké yakwa du dele sékét yaréndu wa mawulé tawulé yatéte kakandakwa. <sup>35</sup> Kukmba dunyan ras yaae wani du kure yéndaru, wani sapak wa de déku du dakwa déké mawulé sémbéraa yate kakému katik kaké daré. Wuné wuna dunyansale wayéka yaréwutéka wa mawulé tawulé yate kakému kan-dakwa.” Naandén.

<sup>36</sup> Wani kundi watake det gwaaménja kundi vétik waak anga wandén: “Du dakwa kulé laplap tambék sékwe kéraae jaangwa laplapmba tékwa yaambu yamba taake yatépéndakwe wa. De kulé laplap tambék sékwe kéraae jaangwa laplapmba tékwa yaambumba taake yatépé-munaandaru, wa bét vétikmba gérikngambérékwa. Kulé laplap jaangwa laplapale katik yékun yaké dé.

<sup>37</sup> “Dékény kaa viyaae révéndarén meme sépémba kulé wain kulak katik wukaasandaké

daré. Wunga yamunaandaru wani meme sépé jaangwa ye pungndu kulak akwi yékéraakkandékwa. Yékéraandu wani meme sépé katik yékun yaké dé. <sup>38</sup> Kulé meme sépémba wukaasanda-ndaru kulé wain kulak wa yékunmba tékandékwa. <sup>39</sup> Talimba yandarén wain kulak kakwa du taale dé kulé wain kulak kaké kalik yakandékwa. Yate anga wakandékwa, ‘Talimba yandarén kulak wan yékun wa.’ Naate wa talimba yaténdén muséké wa mawulé yandékwa.” Talimba yatan duna kundi vékukwá du Jisasna kulé kundi vékuké kalik yandaka wa wani gwaaménja kundi wandén wunga.

## 6

### *Yaap yaré nyaaké Jisas wandén (Mt 12:1-8; Mk 2:23-28)*

<sup>1</sup> Yaap yaré nyaaké Jisas déku dunyansale sékét wit tékéskwa yaawi nakmba yéndarén. Yététe déku dunyan wit sék kaké we wit kumbu ras taakwe deku taambat léwaakite wit sék kan-darén. <sup>2</sup> Kandaka Farisi dunyan ras vétake det anga wandarén, “Guné wit kumbu taakwe taambat léwaaki-ngunéngwa, yaap yaré nyaamba. Nana apakundi anga wandékwa, ‘Guné yaap yaré nyaamba jémbaa yaké yambakate.’ Wani apakundi yamba vékungunéngwe wa. Guné wit kumbu taakwe taambat léwaakite wa guné jémbaa wa yangunéngwa, yaap yaré nyaamba. Wa kapérandi yapaté wa yangunéngwa.” Naandarén.

<sup>3-4</sup> Naandaka Jisas det anga wandén, “Talimba nana gwaal waaraanga maandéka bakamu

Devit yan muséké Gotna nyéngaamba wa viyaatakandarén. Wani kundiké yamba vékulaka-ngunéngwe wa. Talimba Devit déku dunyansale kaandé yandéka dé Gotna kundi bulndakwa gaat wulaae wani gaamba jémbaa yakwa duwat waatakundén, Gorké kwayéte taakandarén kakému det kwayéndarénngé. Waatakundéka kwayéndaka Devit wani kakému déku dunyansat kwayéndéka de akwi kandarén. Wunga yate nana apakundi yamba vékundakwe wa. Nana apakundi anga wandékwa, ‘Gotna gaamba jémbaa yakwa du male wa Gorké kwayéndarén kakému yéngä kandaru. Nak du wani kakému katik kaké dé.’ Wunga wandéka Devit déku dunyansale wunga yandaka deké anga yamba wangunéngwe wa, ‘Wan kapérandi musé wa yandarén.’ Wunga wakapuk ye nanat kamuké guné anga wo? ‘Guné nana apakundi vékukapuk yate kapérandi musé wa yangunén.’ Guné wunga wate yamba kurkale vékusék-ngunéngwe wa.”<sup>5</sup> Naatake det anga wandén, “Wuné Duna Nyaan yaap yaré nyaana néma du a rawutékwa. Wuné du dakwana jémbaaké yi naawutu wa de yaap yaré nyaamba yi naawutén pulak yéngä yandaru.” Naandén Jisas.

*Yaap yaré nyaamba Jisas wandéka taamba lin du yékun yandén*

*(Mt 12:9-14; Mk 3:1-6)*

<sup>6</sup> Nakapuk, yaap yaré nyaamba Jisas Gotna kundi bulndakwa gaat wulaae du dakwat Gotna kundi kwayétendén. Wani gaamba yékutuwa saku taamba lin du nak wa vérán.<sup>7</sup> Randéka

de apakundiké vékusékngwa dunyan, Farisi dunyan waak, wani gaamba rate vésék naaréndarén Jisasét. Yate deku mawulémba anga wandarén, “Jisas yaap yaré nyaamba wani duwat kalmu kururéké dé kapuk? Dat kururémunaae, wa nana apakundiké kuk kwayékandékwa. Wunga yandu dé kotimnganangwa.” Naandarén. <sup>8</sup> Naandaka dé déku kapmang wa vékundén awula deku mawulémba wandarén kundi. Vékutake taamba lin duwat wandén, “Ma waarape yaae amba té.” Naandéka waarape téndén. <sup>9</sup> Téndéka Jisas det anga wandén, “Wuné gunat waatakukwate yawutékwa. Nana apakundi yénga dé wo? Yaap yaré nyaamba nané yéku musé yaké nané, kapuk kapérandi musé yaké nané? Yaap yaré nyaamba kiyaaké yakwa du dakwat yé kun yaké nané, kapuk det viyaandékngé nané?” Naandén. <sup>10</sup> Wunga watake det nak nak yaasatiyaale vétake wani duwat wandén, “Ména taamba ma kayéndéng.” Naandéka déku taamba kayéndéngndéka wa nakapuk yé kun yan. <sup>11</sup> Yandéka de asa rakarka wa yandarén. Yate dekét deku kapmang bulte wandarén, “Nané Jisas yénga pulak yaké?” Naandarén.

*Jisas wakandéng-ndéka déku dunyan déku jémbaa yandarén*

*(Mt 10:1-4; Mk 3:13-19)*

<sup>12</sup> Wani sapak Jisas dé Gorale kundi bulké némbat waarendén. Waare gaan Gorale kundi bulndén. Bulréndéka ye yé gérén. <sup>13</sup> Yé gére nyaa yaalandéka déku dunyansat waandéka yaandarén. Yaandaka du tambavétik maanmba

kaayék vétikét (12) wa wakandéngndén, déku kundi kure yékwa dunyan téndarénngé. <sup>14</sup> Deku yé anga wa:

Saimon. Déku nak yé Jisas wa kwayén, Pita.

Saimonna waayéka, Andru.

Jems.

Jon.

Filip.

Bartolomyu.

<sup>15</sup> Matyu.

Tomas.

Alfiusna nyaan, Jems.

Saimon. Dé talimba genge gaayémba yéte wandén, “Nak képmaana du nana néma du téndénngé kalik yawutékwa.” Naandén.

<sup>16</sup> Jemsna nyaan, Judas.

Judas Iskariot. Kukmba wa Jisas maamat kwayéndén.

*Jisas némaamba du dakwat kururéndén  
(Mt 4:23-25)*

<sup>17</sup> Jisas déku dunyanale sékét daawuliye yéku viyaatakan taalé nakmba téndarén. Déku dunyan késépéri dale sékét téndaka némaamba du dakwa wa de waak yaae tén. De Jerusalem, Judia distrikmba tékwa nak gaayé, Tair, Saidonmba waak yaandarén. Tair, Saidon waak bét solwara wutépmba tékwa. <sup>18</sup> Wani du dakwa ras Jisasna kundi vékuké yaandarén. Ras du dakwa baat yandéka ras sépémaalé, maan taamba kapére yandéka Jisas det kururéndénngé wa yaandarén. Wani du dakwa rasét kutakwa wa kulure kure

yaténdaka de waak yaandarén. Yaandaka kutakwa wandéka yaange yéndaka de wani du dakwa yékun yawuran.<sup>19</sup> Yaandaka wandéka wa védarén. Jisasna mayé apa némaan yandéka dé det kururéndén. Wunga véte dé akwi pulak det taamba kutndénngé mawulé yandarén.

*Ras mawulé tawulé yandaru ras  
géraakandakwa*

(Mt 5:1-12)

<sup>20</sup> Jisas déku dunyansat vététe det wandén, “Guné musé asé kapuk du, guné Gotna kémba téngunéngé Got néma du rate gunéké yékunmba védékwa. Véréndékwannngé guné mawulé tawulé yéngé yangunu.

<sup>21</sup> “Guné bulaa kaandale yarékwa du, sérémaa kakému némaamba kakangunéngwa. Kaké yan-gunéngwanngé mawulé tawulé yéngé yangunu.

“Guné bulaa géraarékwa du, sérémaa waangikanganéngwa. Waangiké yan-gunéngwanngé mawulé tawulé yéngé yangunu.

<sup>22</sup> “Ma véku. Wuné Duna Nyaan rawutéka guné wuna jémbaamba wa yaalangunén. Du ras wunat maama yate gunéké kalik yate gunat anga wakandakwa, ‘Guné kapérandi musé yakwa du wa.’ Wunga waké yandakwanngé guné mawulé tawulé yéngé yangunu. <sup>23</sup> Talimba wani duna gwaal waaraṅga maandéka bakamu de Gotna yém̄ba kundi kwayétan dunyansat wunga yaavan kutndarén. Det wunga yaavan kutndarénnngé vékulakate de gunat wunga yaavan kutndaru guné mawulé tawulé yéngé yangunu. Sérémaa Got gunat yékun yakandékwa, déku

yémba kundi kwayétan dunyansat yékun yandén pulak. Yandu guné dale yékunmba yarésékéyakngangunéngwa. Yarésékéyakngé mawulé yate guné mawulé tawulé yénga yangunu.

**24** “Guné némaamba yéwaa kure yarékwa du, bulaa yéku musé kéraasotake yékun yaréngunéngwa. Sérémaa kapérandi musé gunéké yaandu guné katik kurkale yaréké guné.

**25** “Guné kakému kate biyaa sékérékndéka yarékwa du, bulaa kurkale kangunéngwa. Sérémaa kapérandi musé gunéké yaandu kaandale yarékangunéngwa.

“Guné waangikwa du, bulaa dusék yangunéngwa. Sérémaa kapérandi musé gunéké yaandu guné némaamba géraakangunéngwa.

**26** “Du dakwa akwi guna yé kusondaru ma jéraawu yangunék. Talimba guna gwaal waaranga maandéka bakamu papukundi watan duna yé kavérékndarén. Bulaa a tékwa du guna yé kavérékndarú kalmu guné waak papukundi waké guné? Bulaa a tékwa du guna yé kavérékmunaandarú kukmba kapérandi musé gunéké wa yaaké yakwa.” Naandén Jisas.

### *Maamaké mawulé yandarénnngé Jisas wandén (Mt 5:38-48)*

**27** Wani kundi watake Jisas det anga wandén, “Guné, wuna kundi vékukwa du, gunat wawutékwa. Guné guna maamaké ma néma mawulé yangunék. Gunéké kalik yakwa duwat ma yékun ya. **28** Gunat kapérandi kundi wakwa duké Gorét ma waatakungunék, det yékun yandénngé. Gunat kapérandi musé yakwa

duké Gorét ma waatakungunék, det yéku mawulé kwayéndénngé. <sup>29</sup> Dunyan ras guna yékuwa saku kupmimba viyaandaru waalakwe akituwa sakwat ma kwayé viyaandaru. Guné det waambule viyaaké yambak. Dunyan ras guna laplap kéraandaru guné laplap nak waak ma kwayé. <sup>30</sup> Dunyan ras guna muséké waatakundaru guné wani musé ma kwayé. De guna musé kéraandaru, guné wani musé waambule kwayékata-ndarénngé waaké yambak. <sup>31</sup> Nak du gunat yé kun yamuké mawulé yangunéngwa pulak, det wunga ma yé kun yangunék.

<sup>32</sup> “Kapérandi musé yakwa du dakwa, yéku musé yakwa du dakwa, akwi du dakwa de deku du dakwaké mawulé yandakwa. Guné guna du dakwaké male mawulé yamunaae, guné kapérandi musé yakwa du dakwat katik taalékéraké guné. Guné wunga male yangunu Got wunga yangunéngwanngé, ‘Wa yé kun wa,’ katik naaké dé. <sup>33</sup> Akwi du dakwa waambule yakatate yéku musé yandakwa, det yéku musé yakwa du dakwat. Guné gunat yéku musé yakwa du dakwat male yéku musé yamunaae wa guné kapérandi musé yakwa du dakwat katik taalékéraké guné. Guné wunga yangunu Got wunga yangunéngwanngé, ‘Wa yé kun wa,’ katik naaké dé.

<sup>34</sup> “Akwi du dakwa, kapérandi musé yakwa du dakwa waak, de nak du dakwat musé kwayéte deku mawuléké anga wandakwa, ‘De nanat wani waambu waambule tiyaakandakwa.’ Naandakwa. Guné wunga musé kwayéte wani kundi

wate, guné kapérandi musé yakwa du dakwat katik taalékéraké guné. Guné wunga male yamu-naangunu, Got wunga yangunéngwanngé, ‘Wa yé kun wa,’ katik naaké dé.

**35-36** “Guné kapérandi musé yakwa du dakwa yakwa pulak yaké yambak. Guné det taalékére anga yangunék. Guné guna maamaké waak ma néma mawulé yangunék. Yate det ma yé kun yangunék. Ye guné det musé asé kwayétake wani musé nakapuk waambule kéraaké vékulakaké yambak. Guné wunga yangunu apa tapa yakwa du Got gunéké anga wakandékwa, ‘Wa wuna nyambalésé wa yarékésndakwa.’ Naate gunéké kurkale vékandékwa. Yandu guné yé kunmba yarésékéyak-ngangunéngwa. Guna aapa Got mawulé sémbéraa yandékwa, déké vékulaka-kapuk yate kapérandi musé yakwa du dakwaké. Dé deké mawulé sémbéraa yandékwa pulak, guné waak deké mawulé ma sémbéraa yangunék.” Naandén Jisas.

*De du dakwat bari kotimngapuk yamuké Jisas wandén*

*(Mt 7:1-5)*

**37** Wani kundi watake Jisas det anga wandén, “Nak du dakwa yan muséké vékulakate guné kot vékukwa néma du pulak deké ye det bari anga wambakate, ‘Wani du dakwa wan kapérandi musé yakwa du dakwa wa.’ Wunga yakapuk yangunu wa Got yangunén muséké vékulakate anga bari katik waké dé, ‘Guné kapérandi musé yakwa du dakwa wa.’ Wunga katik waké

dé. Guné wani du dakwat wunga bari wakapuk ye wani yandarén kapérandi muséké katik vékulakaké guné. Wunga yangunu Got yangunén kapérandi musé yasnyéputiye wani muséké naka-puk katik vékulakaké dé. <sup>38</sup> Guné nak du dakwat yékun yaké wate det musé asé ma kwayéngunék. Kwayéngunu Got gunat yékun yate gunat kwayékandékwa. Kwayéngunu Got gunat yakélak yakélak katik yékun yaké dé. Kwayéngunu wa Got gunat némaamba yékun yakandékwa. Yékun yandu guné yékunmba yarésékéyakngangunéngwa. Guné nak du dakwat yékun yangunéngwa pulak, Got gunat yékun yakandékwa.” Naandén.

<sup>39</sup> Wani kundi watake Jisas det ani gwaaménja kundi wandén, “Méni kiyaan du nak baan méni kiyaan duwat yaambu wakwasnyéké dé, kapuk? Yamba wa. Dat wakwasnyéké watake ye bét véréti kavérémba vaakérkambérékwa. <sup>40</sup> Skulkwa nyambalésé de baka du wa yaréndakwa. Det yakwasnyékwa du, de deku néma du wa téndakwa. De det yakwasnyéndaru kurkale skule sérémaa wani nyambalésé det yakwasnyan du pulak wa néma du tékandakwa.” Naandén.

<sup>41</sup> Wani gwaaménja kundi watake Jisas det anga wandén: “Nak du dakwa yan kapérandi musé wa ménimba wulaae rakwa makalkéri musé pulak wa. Yangunén néma kapérandi musé wa ménimba rakwa néma baangé pulak wa. Kamuké guné nak du dakwana ménimba wulaae rakwa makalkéri musé véte gunékét guna ménimba rakwa néma baangé yamba véngunéngwe? Wunga yate guné nak du dakwa

yan kapérandi muséké wate guné yangunén néma kapérandi muséké yamba vékulaka-ngunéngwe wa. <sup>42</sup> Guné néma kapérandi musé yatake kamuké guné ayélapkéri kapéremusé yan du dakwat anga wo? ‘Guné kapérandi musé wa yangunén. Guné kurkale yaréngunénngé wuné gunat yé kun yakawutékwa.’ Guné wunga waké yambak. Guné kapérandi musé yatake wunga wangunu, wa paapu yakwa du wa guné. Taale guné yangunén néma kapérandi muséké ma kuk kwayéngunu. Kwayétake guné ayélapkéri kapéremusé yan du dakwat yénga yé kun yangunu.” Naandén Jisas.

*Jisas gwaaménja kundi wandén sék vaakukwa miyéké*

(Mt 7:16-20; 12:33-35)

<sup>43</sup> Wani kundi watake Jisas det anga wandén: “Ani gwaaménja kundi nak ma vékungunu. Yéku miyém̄ba kapérandi sék yamba vaakundékwe wa. Kapérandi miyém̄ba yéku sék yamba vaakundékwe wa. <sup>44</sup> Nané miyé sékét véte anga wanangwa, ‘Wani miyé yéku miyé wa. Ani miyé a kapérandi miyé a.’ Naanangwa. Anga vékuséknangwa. Raamény baangwimba nané miyé sék yamba gélénangwe wa. Kapérandi waaramba nané yéku miyé sék yamba gélénangwe wa.

<sup>45</sup> “Bulaa wani kundiké ma vékulaka. Nané miyé sékét véte miyéké wanangwa. Miyéké vénangwa pulak wa nak du dakwana jémbaa véte deku mawuléké vénangwa. Yéku duna mawulémba yéku mawulé male yaalandéka yéku kundi bulte yéku musé yandakwa. Kapérandi

duna mawulémba kapérandi mawulé male yaa-landéka kapérandi kundi bulte kapérandi musé male yandakwa.” Naandén Jisas.

*Du vétik gaa kurénngé Jisas wandén  
(Mt 7:24-27)*

<sup>46</sup> Jisas anga wandén: “Guné wunat anga wangunéngwa, ‘Méné, nana Néman Du wa.’ Wunga wate wuna kundi yamba vékungunéngwe wa. Kamuké guné wunga wate wuna kundi vékumuké kalik yo? <sup>47</sup> Wunéké yaae wuna kundi vékute wawutékwa pulak yakwa du dakwa wan ani du pulak wa. <sup>48</sup> Dé yéku gaa kaaké we néma kwaawu vaandén. Vaae matu taakumba kwaat taawundén. Taawutake yéku apamama yan gaa kutndén. Kutndéka maas viyaae kwayé kwe wani gaamba viyaandéka wani gaa yamba vaakére wa. Yéngä ye vaakétndék? Néma jémbaa ye yéku gaa kutndénmba. <sup>49</sup> Wuna kundi baka vékute wawutékwa pulak yakapuk yakwa du dakwa de wan ani du pulak wa. Dé gaa bari kurké watake apamama yakapuk bumbu képmaamba kwaat waayéngwandén. Kwaat yékunmba téndénngé vékulake matumba yamba vaandékwe wa. Yandéka maas viyaae kwayé kwe wani gaamba viyaandéka wani gaa bari vaakérén. Vaakétndéka kwayé wa kure yén wani gaa.” Naandén Jisas det.

## 7

*Jisas waariyakwa dunyanséna néma dumba  
jémbaa yakwa duwat kururéndén  
(Mt 8:5-13)*

<sup>1</sup> Jisas wani kundi wasékéyaktake Kaperneamét yéndén. <sup>2</sup> Wani gaayém̄ba Romna waariyakwa dunyanséna néma du nak yaran. Déku jémbaa yakwa duké asa mawulé wa yandén. Yaréndéka déku jémbaa yakwa duwat baat yan. Yandéka kiyaaké yandén. <sup>3</sup> Yandéka wani néma du vékundén Jisas wani gaayém̄ba yaréndéka. Vékutake Judana néma du rasét wandéka Jisaské yéndarén, dé wandaru dele ye déku jémbaa yakwa du kururéndénngé. <sup>4-5</sup> Yaae Jissasét anga wandarén, “Dé wani du dé yéku du wa. Dé nané Judaséké asa mawulé wa yandékwa. Dé nanéké Gotna kundi bulndakwa gaa kutndén. Kutndénngé méné déku duwat kururé-ménénngé mawulé yanangwa.” Naandarén.

<sup>6</sup> Naandaka Jisas deku kundi vékutake dele yéndén. Ye gaamba saambakngé yaténdaka waariyakwa dunyanséna néma du déku naawindu rasét wandéka de yaae Jissasét déku kundi anga wandarén, “Néman Du, wuné baka du a téwutékwa. Méné néma du wa. Wunga téte méné wuna gaat yaalaké yambak. <sup>7</sup> Wunga téménéngwanngé vékulakate wuné ménéké yamba yaawutékwe wa. Méné baka waménu wuna du nakapuk yékun yakandékwa. <sup>8</sup> Nak du wuna néma du téndékwa. Téte wandékwa pulak wuné yawutékwa. Wuné du nakét, ‘Méné ma yé,’ naawutéka yéndékwa. Du nakét, ‘Méné ma yaa,’ naawutéka yaandékwa. Wunémba jémbaa yakwa duwat, ‘Ani jémbaa ma ya,’ naawutéka wani jémbaa yandékwa. Méné yawutékwa pulak ma yaménu. Yate baka ma waménu wuna du

nakapuk yékun yakandékwa.” Naandarén.

<sup>9</sup> Wani duna kundi wunga wandaka vékutake Jisas vékulaka vékulaka naandén. Ye waalakwe déku kukmba yétékésén du dakwat anga wandén, “Dé wani du wunéké yékunmba vékulakandékwa. Wuné wawutu du dakwa yékun yamuké wa vékusékndékwa. Guné Israel du dakwa, guné wunéké ayélapkéri sékéyak wa yékunmba vékulaka-ngunéngwa. Rom du téndéka déku yéku mawulé wa guné Israel du dakwa guné yakwa yéku mawulat wa taalékéra-sandandén. Yi wan wanana wa.” Naandén. <sup>10</sup> Wunga wandéka waariyakwa dunyanséna néma du wandéka yaan wani dunyansé nakapuk waambule gaat yéndarén. Ye wulaae véndarén néma dumba jémbaa yakwa du nakapuk baat yéput ye randéka.

*Jisas wandéka kiyaan du nakapuk taamale waarapndén*

<sup>11</sup> Kukmba Jisas nak gaayét yéndén. Wani gaayéna yé Nain wa. Yéndéka du dakwa némaamba wa, déku dunyansé waak wunga dale sékét yéndarén. <sup>12</sup> Ye wani gaayéna aatmu pétém̄ba saambakngé yaténdaka kiyaan dunyangu nyaan nak yaate kure yaalandarén. Aasa nakurak dé male wa kéraalén. Nyaan ras yamba yé wa. Léku du dé talimba wa kiyaan. Wani gaayémba yarékésén du dakwa némaamba, wani taakwale yaandarén. <sup>13</sup> Yaandaka vétake Néman Du Jisas mawulé sémbéraa yandén wani taakwaké. Yate lat anga wandén, “Nyéno, géraaké yambak.” <sup>14</sup> Naatake ye kiyaee kwaan duna jaambémba kutndén. Kutndéka wani jaambé

yaatan dunyansé de wunga tékésén. Téndaka kiyaee kwaan duwat anga wandén, “Méno, wuna kundi ma véku. Ma waarap.” <sup>15</sup> Naandéka kiyaan du nakapuk taamale waarape rate bulréndén. Bulréndéka Jisas dé déku aasat kwayéndén.

<sup>16</sup> Yandéka akwi du dakwa bérute wup yandarén. Yate Gotna yé kusoréndarén. Kusote anga wandarén, “Gotna yém̄ba kundi kwayékwa du nak dé nanale a tékwa. Wa néma du wa. Bulaa Got dé a yaan, déku du dakwat yé kun yaké.” Naandarén.

<sup>17</sup> Watake Jisas yan muséké saapé ye yé yaayandarén. Yandaka de wani gaayale tékwa gaayém̄ba, akwi Judiana gaayémumbá waak, vékundarén Jisaské.

*Jon déku du vétik Jisaské yémbérénngé wandén  
(Mt 11:2-19)*

<sup>18</sup> Baptais kwayétan du Jon kalapusmba kwaandéka déku dunyan yaae dat wandarén Jisas yan muséké. <sup>19</sup> Wandaka Jon wandéka déku du vétik yaambéréka bérét anga wandén, “Béné ma yé Jisaské. Ye anga ma waatakumbénék, ‘Talimba Gotna nyéngaaamba viyaatakandarén, nanat yé kun yaké sérémaa yaaké yakwa duké. Wani du méné ani méné, kapuk wa nak duké kaavéréké nané?’ Dat wunga béné waké ya.” Naandén. <sup>20</sup> Wandéka bét ye Jisas yaranmba saambake anga wambérén, “Baptais kwayékwa du Jon aanat wandéka yaatékwa ménéké. Ani kundi ménat waatakuké yaatékwa: Talimba Gotna nyéngaaamba kundi viyaatakandarén, nanat yé kun yaké kukmba yaaké yakwa duké.

Wani du méné ani méné, kapuk wa nak duké kaavéréké nané?" Naambérén.

<sup>21</sup> Wani nyaa Jisas asapéri du dakwa baat yandaka, sépémaalé kapére yan du dakwat waak kururéndén. Yate wandéka de wani du dakwat kulure kure yatékésén kutakwasé de yaale yaange wunga yékéraan. Ménimbo yan du dakwa asa wa, wandéka nakapuk kurkale véndarén. <sup>22</sup> Jisas wunga yatéte Jonna du vétikét anga wandén, "Béné waambule ye béné wani vémbénén, vékumbénén muséké Jonét ma wambénu. Ménimbo yan du dakwa nakapuk véndakwa. Maan kapére yan du dakwa nakapuk yékun ye yeyé yaayandakwa. Lepro waasé yan du dakwa nakapuk yékun yandakwa. Waangété ye waan vékukapuk yan du dakwa nakapuk waan vékundakwa. Wani du dakwat akwi wa kururé-wuréwutén. Wuné wawutéka kiyaan du dakwa nakapuk taamale waarape yaréeskwa. Musé asé kure rakapuk du dakwat Gotna kundi wawutékwa. <sup>23</sup> Du dakwa ras wunéké anga wandakwa, 'Wa Got dat wa wandén, nanat yékun yandénngé. Yi wan wanana wa.' Naate wunga wate de wunéké yékunmba vékulakandakwa. Wunéké wunga vékulakakwa apu, de mawulé tawulé yéngä yandaru. Jonét wunga béné waké ya." Naandén Jisas Jonna du vétikét.

<sup>24</sup> Jisas wunga wandéka bét Jonna du vétik bét yén. Yémbéréka Jisas wamba rakésén du dakwat Jonngé anga wandén: "Guné du yarékapuk taalém̄ba ye, yéngä pulak du véké guné yék? Wimut kutndéka apamama yakapuk yate

viyékngwa séwaa pulak yakwa du véké guné yék, kapuk yénga pulak du véké? Jon wani séwaa pulak wunga yamba yé wa. <sup>25</sup> Yéku laplap saawan du véké guné yék, kapuk yénga pulak du? Jon wani du wunga pulak yamba yé wa. Yéku laplap saawukwa dunyan de néma duna yéku gaamba wa randakwa. <sup>26</sup> Gotna yém̄ba kundi kwayékwa du nakét véké guné yék, kapuk? Yi, Jon wan Gotna yém̄ba kundi kwayékwa du wa. Gunat wawutékwa. Dé néma du wa téndékwa. Gotna yém̄ba kundi kwayétan nak néma duwat wa taalékéra-sandandén. <sup>27</sup> Jonngé ani kundi Gotna nyéngaamba wa kwaakwa:

Got déku nyaanét anga wandén, ‘An wuna kundi kure yékwa du a.

Wuné wawutu dé taale yéte ména yaambu kurkandékwa.’

Nané wani kundi vékute vékuséknangwa. Jon wan Gotna kundi kure yaate taale yaakwa du wa. <sup>28</sup> Wunga vékusékte gunat wawutékwa. Jonna jémbaa ani képmaamba talimba tan duna jémbaat wa taalékéran. Taalékérandéka gunat yékun yaké yawutékwa jémbaaké yamba kurkasale vékundékwe wa. Yandéka de Gotna kém̄ba téte du dakwat yékun yaké yawutékwa jémbaaké vékuséknangwa du dakwa akwi deku yéku mawulé wa déku yéku mawulat taalékérasandan. Yi wan wanana wa.” Naandén.

<sup>29</sup> Wani kundi wandéka de takis kéraakwa du, wamba tékésén du dakwa waak wani kundi vékutake mawulé wa yandarén. Jon talimba det baptais kwayéndénngé wa Jisasna kundiké mawulé yandarén. Yate Gotna yé kavérékte anga

wandarén, “Déku kundi wan yéku kundi wa. Yi wan wanana wa.” <sup>30</sup> Naandaka de Farisi dunyan, apakundiké vékusékngwa dunyan waak de wani kundiké kalik yandarén. Gotna kundiké kuk kwayéndaka Jon det talimba baptais kwayékäpuk yandénngé Jisasna kundiké kalik yandarén.

<sup>31</sup> Wunga watake Jisas det anga wandén, “Bulaa a tékwa du dakwa yéngä pulak daré? Gunat wawutékwa. <sup>32</sup> Bulaa a tékwa du dakwa de aamemba kétikwa nyambalésé pulak wa yaténdakwa. De téte rasét waandakwa. Waate anga wandakwa,

Nané gwaaré waate kaang viyaananga guné yamba ketingunéngwe wa.

Nané mawulé sémbéraa yate géraananga guné yamba géraangunéngwe wa.

Guné nanale nakurakmawulé yamba yangunéngwe wa.

Wunga waakwa nyambalésé pulak, bulaa a tékwa du dakwa wunga wa yaténdakwa.

<sup>33</sup> “De Jonale nakurakmawulé yamba yandakwe wa. De wunale nakurakmawulé yamba yandakwe wa. Baptais kwayékwa du Jon yaae a kangunéngwa kakému kate a kangunéngwa wain kulak yamba kandékwe wa. Yandéka guné déké kalik yate anga wangunén, ‘Kutakwa déku mawulémba wulaae téndéka wa waangété wa yandékwa.’ <sup>34</sup> Wunga wangunéngä wuné Duna Nyaan yaae wuné a kangunéngwa kakému kate, a kangunéngwa wain kulak kawutékwa. Kawutéka wuné kalik yate anga wangunéngwa, ‘Ma véna. Wani du némaamba kakému kate némaamba wain

kulak wa kandékwa. Kate dé takis kéraakwa dunyanale yaréte, kapérandi musé yakwa ras dunyanale yaréte dele bulndékwa.<sup>35</sup> Naangunénga nak kundi wawutékwa. Got dé akwi pulak musé vékuwuréndén wa. Déku yapaté wa yéku yapaté wa. Yi wan wañana wa. Wani kundiké vékulakate guné aané déku du vétikngé ma yé kunmba vékulakangunék.” Naandén Jisas.

*Kapérandi musé yakwa taakwa yéku yaama yakwa gu sévilén Jisasna maanmba*

<sup>36</sup> Farisi du nak déku yé Saimon Jisasét wandén, dale kakému kandénngé. Wandéka ye wani duna gaamba wulaae rate kakému kandén. <sup>37</sup> Jisas Farisi duna gaamba rate kakému karéndéka lé kapérandi musé yakwa taakwa nak wani gaayémba yare vékulén. Vékutake matumba yandarén yéku botol kure yaalén. Yéku yaama yakwa gu wani botolmba tén. <sup>38</sup> Kure yaae Jisasna maanale kwaati séte géralén. Géraléka léku méniyangu Jisasna maanmba putangsan-dan. Putangndéka léku sémény némbat létéklén. Létéktake déku maanmba késépéri apu taama rénglén. Yate yéku yaama yakwa gu déku maanmba sévilén. <sup>39</sup> Séviléka vétake Jisasét wandéka wani yaandén Farisi du, déku mawuléké anga wandén, “Wani du Gotna yémba kundi kwayékwa du ramunaae akwi musé yésékte dat kurkwa taakwa waak vésékngatik dé. Lé kapérandi musé yakwa taakwa wa.” Naandén.

<sup>40</sup> Wani du wunga wandéka dat Jisas anga wandén, “Saimon, ménat nak kundi nak wak-wate yawutékwa.” Naandéka wandén, “Nanat

Gotna kundiké yakwasnyékwa du wa, ma wa.”  
**41** Naandéka ani gwaaménja kundi wandén: “Du vétik, du nakmba yéwaa kéraambérén. Nak du néma yéwaa (100 kina pulak) kéraan. Nak du ayélapkéri yéwaa (10 kina pulak) kéraan. Kéraambéréka kukmba kaavéndén wani du, déku yéwaa nakapuk waambule kwayémbérénngé.  
**42** Wani du vétik bét déku yéwaa nakapuk waambule kwayékataké yambérén. Yambéréka bérét anga wandén, ‘Yéngä yakét. Béno, tiyaaké yambak.’ Wunga wandénngé méné yéngä méné vékulako? Wani du vétikmba kandé yéwaa kwayén duké néma mawulé yaké ya?” **43** Naandéka Saimon wa wan, “Néma yéwaa kéraan du wa. Wunga vékulakawutékwa.” Naandéka Jisas wa wan, “Ména kundi yékun wa. Yi wan wanana wa.” Naandén.

**44** Wani kundi watake Jisas wani taakwaké waalakwe Saimonét anga wandén, “Ani taakwat ma vé. Wuné ména gaat yaalawutéka méné nana apakundi wakwa pulak yamba yaménéngwe wa. Ye gu ras yamba tiyaaménéngwe, wuna maan yakwasnyéwuténngé. Ani taakwa lékét léku méniyangwat wa wuna maan yakwasnyélén. Ye lékét léku némbat gu létéklén. **45** Méné wunat yamba taama réngménéngwe. Wuné amba yaale taale rawutéka wani taakwa wa yaae wuna maanmba taama réenglén, késépéri apu. **46** Méné wuna maakamba yéku gu yamba séviménéngwe. Lé wa sévin yéku yaama yakwa gu wuna maanmba. **47** Wunga yaléka ménat wawutékwa. Yalén kapérandi musé wa yakwasnyé-putiwutén.

Yakwasnyé-putiwutéka lé wunéké asa mawulé wa yalékwa. Ras du dakwa kapérandi musé ayélapkéri yandaka wani kapérandi musé yakwasnyéputiwutéka de wunéké mawulé ayélapkéri yandakwa.” Naandén.

<sup>48</sup> Wani kundi watake wani taakwat anga wandén, “Yanyénén kapérandi musé wa yakwasnyéputiwutén.” <sup>49</sup> Wunga wandéka dale sékét rate kakému karan dunyansé dekét deku kapmang bulte anga wandarén, “Wani yalén kapérandi musé wa yakwasnyé-putindékwa. Wan yénga pulak du dé?” <sup>50</sup> Naandaka Jisas wani kundi waambule wakapuk yate wani taakwat anga wandén, “Nyéna kapérandi mawulé kururékwate yawutékwá mayé apaké yé kunmba vékulaka-nyénéngá wa nyéna mawulé wa kururéwutén. Bulaa nyéna mawulé yénga yé kunmba téndu yé kunmba yénga yé nyénu.” Naandén Jisas lat.

## 8

### *Dakwa ras Jisasale ye yé yaayaténdarén*

<sup>1</sup> Kukmba Jisas asapéri gaayémba saawe yéndén. Yéte Got néma du rate du dakwaké kurkale véké yandékwangé du dakwat kundi kwayéndén. Déku dunyansé tambavétik maanmba kaayék vétik (12) wunga yéndarén dale sékét. <sup>2-3</sup> Dakwa ras waak dale sékét yéndarén. Talimba wani dakwa rasét wa baat yan. Rasét kutakwa wa kulure kure yatékésén. Yaténdaka wa Jisas wani dakwasat akwi kururéndén. Wani dakwasé dekét deku yéwaamba kwayéte

kakému kéraate yaakéte kwayéndarén, Jisas, déku dunyansat waak. Wani dakwa, nak Maria wa. Léké wandarén, “Wa Makdalamba yaan taakwa Maria wa.” Talimba lat kutakwa taambak kaayék vétik (7) wa kulure kure yaténdaka, Jisas wandéka lé yaasékatake yaange yéndarén. Nak taakwa Herotna gaaké séngitékwa du déku yé Kusa, déku taakwa wa. Léku yé Joana. Nak Susana wa. Dakwa ras waak sékét wunga wa yéndarén.

*Wit sék yaasnyan duké Jisas gwaaménja kundi wandén*  
*(Mt 13:1-9; Mk 4:1-9)*

<sup>4</sup> Asa du dakwa wa Jisaské yaae jaawundarén. Wani du dakwa genge gaayémba wa yaandarén. Yaandaka ani gwaaménja kundi wandén: <sup>5</sup> “Du nak déku yaawimba wit sék yaasnyéké yéndén. Ye yaasnyéndéka wit sék ras yaambumba vaakérén. Vaakétdaka du dakwa wa ye yé yaaate maanét vaankindarén yaambumba rakésén wit sék. Vaankindaka api wa yaae kéraae kawuran. <sup>6</sup> Wit sék ras matumba vaakérén, képmáa ayéláp tanmba. Matumba vaakére taakwe waare, képmáa rékandang yandéka méngi kurkasale kurkapuk ye wa bari rékáa ye kiyaandarén. <sup>7</sup> Wit sék ras néma waaramba vaakérén. Vaakére randaka raamény waara wa wuttépe waare taakatépan. <sup>8</sup> Wit sék ras yéku képmáamba vaakérén. Vaakére wamba re yékunmba wure waarendarén. Waare yéku sék vaakundarén rékaamba.” Naandén Jisas. Naatake anga wandén, “Guné vékusékngé

mawulé ye kurkale waan taake ma kurkale vékungunék.” Naandén.

*Jisas gwaaménja kundi det kwayéndékwannngé wa wandén*  
*(Mt 13:10-17; Mk 4:10-12)*

<sup>9</sup> Jisas det wani kundi wandéka déku dunyansé wani gwaaménja kundiké dat waatakundarén. <sup>10</sup> Waatakundaka det anga wandén, “Got néma du rate du dakwaké yékunmba vékandékwa. Véréndu de déku kém̄ba tékandakwa. Wani muséké talimba Got paakundén kundi wa. Paakutake wandén, guné bulaa wani musé vékute vénngé. Nak du dakwa véte katik vésékngé daré. Ve kurkasale katik véké daré. Kundi vékute wani kundiké katik vékusékngé daré. Yandarénngé wa ani gwaaménja kundi det wawutékwa.” Naandén.

*Jisas wani gwaaménja kundina wambukundi kaapa yandén*

*(Mt 13:18-23; Mk 4:13-20)*

<sup>11</sup> “Bulaa ani gwaaménja kundina wambukundi wakawutékwa. Anga wa. Wani wit sék wa Gotna kundi pulak wa. <sup>12</sup> Du dakwa ras Gotna kundi vékundakwa. Vékundaka Satan wa yaae wani kundi deku mawulémba kéraae kure yékwa. De Gorké kurkasale vékwe Gorké yéndakwa yaambumba yéndarénngé kalik yate, wa wani kundi kéraandékwa. Kéraae kure yéndéka wani kundiké wa yékéyaak yandakwa. Wani du dakwa de wan yaambumba vaakérén wit sék pulak wa.

<sup>13</sup> “Du dakwa ras Gotna kundi bari vékundakwa. Vékwe wani kundiké mawulé

yate mawulé tawulé yandakwa. Yate kurkasale yamba vékulakandakwe wa. Wani kundi deku mawulémba daawulikapuk yandéka de yé kunmba yamba vékulakandakwe wa. Yaténdaka vakmi ras deké yaandéka, Gotna kundi bari yaasékandakwa. Wani du dakwa de wan matumba vaakérén wit sék pulak wa.

**14** “Ras du dakwa taale Gotna kundi yé kunmba vékundakwa. Vékute de ani képmaana muséké male vékulakandaka deku mawulé yé waaké, salmu walmuké génngwa. Wani musé wa Gotna kundit taakatépékwa. Taakatépéndéka wani du dakwa Gotna jémbaa yamba yandakwe wa. Wani du dakwa de raamény waara téンmba vaakérén wit sék pulak wa.

**15** “Ras du dakwa de Gotna kundi kurkasale vékute, wandékwa pulak yate déku kundiké mawulé yandakwa. Yate déku kundi kurkale vékuréte, mawulé yaréte Gorké yéku jémbaa yapékaréndakwa. De wani du dakwa, wa yéku képmaamba vaakérén wit sék pulak wa.” Naandén Jisas det.

*Jisas gwaaménja kundi wandén yaa  
véréksondarén téwaayéké  
(Mk 4:21-25)*

**16** Jisas wani kundi watake anga wandén, “Ani gwaaménja kundi nak ma véku. Dunyan téwaayé yaa takngére kure ye sapngutakan-ndarén aké arulamba daré kusolatako, kapuk jaambé atndamba daré taako? Yamba wa. De jaambé taakumba wa taakandakwa, wani gaat wulaaké yakwa du dakwa téwaayé vérékte

kaaléndu de kurkasale véndarénngé. <sup>17</sup> Paakwe rakwa musé sérémaa vékangunéngwa. Yakélak wandarén kundi sérémaa kaapamba randu vékukangunéngwa. <sup>18</sup> Ma véku. Wani kundiké ma vékulaka naa. Guné yé kunmba vékulakate, wuna kundi kurkasale vékukangunéngwa. Wuna kundi yé kunmba vékukwa du dakwa de sérémaa Gotna kundi yé kunmba vékukandakwa. Wuna kundi yé kunmba vékukapuk yakwa du dakwa anga wandakwa, ‘Nané vékuwuran wa Gotna kundi.’ Wunga watake sérémaa de déku kundiké yékéyaak yatake baka rakandakwa.” Naandén Jisas det.

*Jisas déku aasa déku waayékanjeké wandén  
(Mt 12:46-50; Mk 3:31-35)*

<sup>19</sup> Wani nyaa Jisasna aasa déku waayékanje waak sékét déké yaandarén. Asa du dakwa wa yaae wulaandaka gaa taalé vékulékndéka de dé ténét wulaaké yapatindarén. <sup>20</sup> Yandaka dunyansé ras wa dat wan, “Ména aasa, ména waayékanje de a yaae angwandé kaapamba téte méné vékuate yandakwa.” <sup>21</sup> Naandaka det anga wandén, “Gotna kundi vékute wandékwa pulak yakwa du dakwa wan de wuna aasa, wuna waayékanje wa téndakwa.” Naandén Jisas det.

*Jisas wandéka néma wimut késén  
(Mt 8:23-27; Mk 4:35-41)*

<sup>22</sup> Nak nyaa Jisas bot nakmba déku dunyan sékét kure waaréndén. Waare det anga wandén, “Ma yékwak, néma gu kwaawuna nak sakwat.” Naandéka botmba yéndarén. <sup>23</sup> Yéréndaka, Jisas

yundé yandéka daae kwaaran. Kwaandéka néma wimut kutndéka gu waare botmba gwaande vékulékngé yan. Yandéka lambiyakngé yandarén. <sup>24</sup> Yate ye Jisasét sérkiyaaate anga wandarén, “Néma du, nané a lambiyakngwa.” Naandaka vélérkiyaae waarape wandéka wimut késndéka, gu daae yékunmba tén. <sup>25</sup> Yatake det anga wandén, “Wuné gunat yékun yaké yawutékwa mayé apaké guné kamuké guné yamba yékunmba vékulaka-ngunéngwe?” Naandéka de vatvat naate dekét deku kapmang bulte anga wandarén, “Yéki. Wandéka gu wimut waak déku kundi vékute wandékwa pulak yambérékwa. Wa yénga pulak du dé?” Naandarén.

*Jisas wandéka kutakwa kulure kure yatan du yékun yandén*

*(Mt 8:28-34; Mk 5:1-20)*

<sup>26</sup> Jisas déku dunyansale sékét botmba ye Gerasaséna taalémba saambakndarén. Wani taalé néma gu kwaawuna nak sakumba téndéka Galili distrik nak sakumba tékwa. <sup>27</sup> Wamba saambake bot taakatake néma gu kwaawuna wutépét wulaaké yaténdaka wani gaayémba yaan du nak Jisas véké yaandén. Talimba, wani du kutakwa kulure kure yaténdaka waangété yandén. Ye laplap yamba gindékwe wa. Baka male yaténdén. Bapmu bapmu baapmu wunga yaténdén. Gaamba yamba randékwe. Yamba wa. Dé wani kiyaandaka rémndarén kwaawumba male yaréndén. <sup>28-29</sup> Dat kulure kure yatékésén kutakwasé, dat apapu viyaandarén. Viyaandaka waangété yandéka dunyansé ras wa déku

maan taamba sen baangwit gindarén. Gitake dat véténdarén. Vétendaka wani sen béréIndéka kutakwasé dé kure yéndarén du yarékapuk taalat. Wani du wa Jisas véké yaandén. Yaandéka Jisas wa wan, dat kulure kure yatan kutakwasé yaange yéndarénnngé. Wandéka vékwe dat véte némaanmba waate dat kwaati se waandé daate dat anga wandén, “Jisas, méné anjorémba rakwa du Gotna nyaan wa. Méné wunat yéngä pulak yaké méné? Méné wunat kaangél tiyaaké yambak.”<sup>30</sup> Naandéka dat anga wandén, “Ména yé yéngä dé?” Waatakundéka wandén, “Wuna yé Késépéri wa.” Késépéri kutakwa kulure kure yaténdakwanngé wa wandén.

<sup>31</sup> Wani kutakwasé Jisasét anga waandarén, “Nané kapérandi taalat yéké kalik yanangwa. Ménat waatakunangwa. Nané wunga yénanénngé méné nanat waké yambak.” Naandarén dat.

<sup>32</sup> Téndarén némbumba baalé asa wa téte kakému katékésén. Katéndaka de wani duwat kulure kure yatékésén kutakwasé, Jisasét anga wandarén, “Méné nanat kewuréké mawulé yamunaae ma waménu, nané wani baaléna mawulémba wulaakanangwa.”<sup>33</sup> Wunga wandaka wandén, “Ma yaange yéngunu wunga.” Naandéka wani du yaasékatake ye baaléna mawulémba wulaandarén. Wulaae kulure kure yéndaka wani balémbalé néma némbuna kutmba yaange daae gumba vaakére kulak ke kiyaatondarén.

<sup>34</sup> Wani baaléké kaavéte séngitan dunyansé wunga yandaka vétake yaange yéndarén. Ye akwi

gaayémba yarékésén du dakwat wani muséké wayé yaayandarén. <sup>35</sup> Wandaka du dakwa wani musé véké yéndarén. Ye Jisas tanmba saambake kutakwa yaasékatake yén duwat védarén. Dé yéku mawulé vékwe laplap giye Jisasna maanale randéka védarén. Vétake wup yandarén. <sup>36</sup> Wup yandaka, Jisas wani musé yandéka vén gaayé wa det saapan, kutakwa kulure kure yatan du yékun yanngé. <sup>37</sup> Saapéndaka Gerasana taalémba yarékésén akwi du dakwa wup néketi ye Jisasét wandarén, de taakatake yéndénngé. Wandaka Jisas de yaasékatake yéké watake botmba waaréndén. <sup>38-39</sup> Talimba kutakwa kulure kure yatan wani du dat waate anga wandén, “Wuné ménale yéké mawulé yawutékwá.” Naandéka Jisas dat anga wandén, “Méné ma waambule yé ména gaayét. Ye Got ménat yékun yandénngé ma saapé.” Wunga wandéka dé gaayét waambule ye déku gaayémba yarékésén akwi du dakwat saapéndén, Jisas dat yandén muséké.

*Jisas taakwa vétikét kururéndén  
(Mt 9:18-26; Mk 5:21-43)*

<sup>40</sup> Jisas néma gu kwaawuna nak sakumba waambule ye saambakndéka akwi du dakwa déké kaavére dé vétake mawulé tawulé yandarén. <sup>41-42</sup> Yaténdaka du nak Jisaské yaandén. Déku yé Jairus wa. Dé wani gaayémba kwaakwa Gotna kundi bulndakwa gaana néma du téndén. Dé ye Jisasét waandé daae kwaati séte anga wandén, “Wuna takwanyan ani kiyaaké yarékwa. Léku kaa rékaamba yamba wa (12). Wuna nyaan nakurak male wa. Méné ma yaa

wunale sékét. Ye lé kururéménék.” Naandéka dale sékét yéndén.

**43-44** Jisas yéndéka asa du dakwa wa dale sékét yéndarén. Yaambu vékulékén. Yéténdaka taakwa nak Jisasna kukmba yaae déku laplap waambumba vatndékulén. Kaa késépéri (12) wa lé waaléramu yarélén. Némaamba apu wa doktaké yélén lé kururéndarénngé. Yéléka dokta yapatin. Yandaka wani taakwa Jisas kundi wandaka vékute lékét léku mawuléké anga walén, “Wuné Jisasna laplapmba vatndékumunaae, wuné nakapuk yékun yakawutékwa.” Naatake déku kukmba yaae déku laplap waambumba vatndékulén.

Wani taakwa wunga vatndékuléka waaléramu bari wurétékndéka nakapuk yékun yalén. **45** Vatndékuléka Jisas wa wan, “Wunat kandé vatndékwak?” Naandéka de akwi anga wandarén, “Nané yamba wa.” Wunga wandaka Pita wa wan, “Néman Du, asa du dakwa a ménale tékeskwa, ménényanyaweye. De ras ménat baka vatndéku daré yak, kapuk yénga véké?” **46** Naandéka Jisas wa wan, “Yamba wa. Nak baan nak wuna mayé apa kéraaké watake wa vatndékundén wunat. Yandaka vékuwutén wuna mayé apa ras yéndéka.” Naandén.

**47** Wunga wandéka lé wani taakwa léku mawuléké anga walén, “Jisas wuna mawulé vendén wa.” Wunga watake lé bérutéte yaae Jisas téna kápmaamba waandé daae kwaati sélén. Yate akwi du dakwana ménimba anga walén, “Kaa késépéri (12) waaléramu yare wuné yékun yaké watake wa taambat vatndékuwutén ménalaplapmba. Vatndékwe wa bari nakapuk yékun

yawutén.” <sup>48</sup> Wunga waléka lat anga wandén, “Nyéno, wuné nyénat kururéké yawutékwa mayé apaké yékunmba vékulakate wa bulaa nyénékét wa yékun yanyénén. Nyéna mawulé yéngä yékun téndu yékunmba ma yényénu.” Naandén.

<sup>49</sup> Jisas wayéka téte waténdéka du nak Jairusna gaamba yaandén. Yaae Jairusét anga wandén, “Ménä takwanyan wa kiyaan. Méné wani néma du yaandénngé waké yambak. Dé déku nak jémbaa yéngä yandu.” <sup>50</sup> Wunga wandéka Jisas wani kundi vékute Jairusét anga wandén, “Wup yaké yambak. Wuné lé yékun yaké yawutékwa mayé apaké yékunmba vékulakaménu ména takwanyan yékun yakalékwa.” Naandén. <sup>51</sup> Naatake ye wani duna gaamba saambake wandén, “Pita, Jon, Jems, guné léku aapa aasa waak, guné male wunale sékét wulaakkangunéngwa gaat. Nak du dakwa katik wulaaké daré.” Naandén. <sup>52</sup> Naandéka akwi wamba tékésén du dakwa wani takwanyanngé mawulé sémbéraa yatéte géraaténdarén. Géraandéka det anga wandén, “Géraaké yambak. Lé yamba kiyaee wa. Lé yundé wa kwaalékwa.” Naandén. <sup>53</sup> Kiyaasékéyaklén vétake wa wunga wandéka dat waangindarén. <sup>54</sup> Waangindaka dé wulaae léku taambamba kutte lat anga wandén, “Nyéno, ma waarap.” <sup>55</sup> Naandéka léku kwaminyan nakapuk waambule yaandéka bari waaraplén. Waarapléka Jisas det anga wandén, “Kakému ras ma kwayéngunu kalu.” <sup>56</sup> Naandéka bét léku aapa aasa lat vétake vatvat naambérén. Naambéréka bérét anga wandén, “Ani muséké nak du dakwat

waké yambak.” Naandén Jisas.

## 9

*Jisas déku dunyanét jémbaa kwayéndén  
(Mt 10:5-15; Mk 6:7-13)*

<sup>1</sup> Jisas déku dunyanét waandéka yaandaka det mayé apa kwayéndén, de wandaru akwi kutakwa yaange yéndarénngé. Nak mayé apa waak kwayéndén de wandaru baat yakwa du dakwa, sépémaalé maan taamba kapére yan du dakwat waak kururéndarénngé. <sup>2</sup> Kwayéte det anga wandén, “Guné ye du dakwat ma wangunék Got néma du rate deké yékunmba véké yandékwannngé. Yate guné de kururéché ya.” <sup>3</sup> Watake det anga wandén, “Guné ye yéyaayate rékaamba musé kure yéké yambak. Wani saawungunén musé male kwaandu guné yéké ya. Sétongunéngwa baangé, kaluwut, kakému, yéwaa, guné wani musé asé kure yéké yambak. Guné laplap vétik kure yémbak. Du dakwat yékun yangunu de gunat yékun yate wani musé kwayékandakwa gunat. <sup>4</sup> Gaa nakmba wulaae wani gaamba male guné yaréché ya. Naknga nakngat yéngunu taale yaréngunén gaamba yarékwá du wani muséké rakarka yamuké taale wulaangunén gaamba male guné yaréché ya. Yare wani gaayémba jémbaa yatake wani gaa yaasékatake guné nak gaayét yéké ya. <sup>5</sup> Guné gaayé nakét yéngunu wani gaayémba yarékwá du dakwa guna kundi vékukapuk yate, gunat kuk kwayéndaru, wani gaayé ma yaasékangunék. Yaasékaké yate guna maanmba kwaakwa baawu

yasnyéputitake guné yéké ya. Wunga yangunu de vétake wakandakwa, ‘Nané det kapére wa yananén. Sérémaa Got yananén kapéremusé yakata-kandékwa nanat.’ Naakandakwa.” Naandén Jisas.

<sup>6</sup> Wunga wandéka ye akwi gaayémba yeyé yaay-aténdarén. Yeyé yaayate Gotna kundi kwayéte baat yan du dakwa, sépémaalé kapére yan du dakwat waak kururé-wuréndarén.

*Herot Jisaské vékundén  
(Mt 14:1-2; Mk 6:14-16)*

<sup>7-8</sup> Galili distrik du dakwana néma du Herot Jisas yan jémbaaké kundi vékundén. Déku jémbaa yandéka du dakwa ras déké anga wandarén, “Wa baptais kwayétake kiyaan du Jon wa nakapuk taamale wa waarapndén.” Wandaka ras wa wan, “Wa talimba yatan du Elaija wa.” Ras wa wan, “Gotna yémba kundi kwayétan du nak wa talimba kiyaae bulaa wa nakapuk taamale waarapndén.” Wunga wandaka Herot wani kundi vékundén. Vékundékq déku mawulé kapére yandéka vékulaka vékulaka naandén. <sup>9</sup> Yate wandén, “Wuné wawutéka wa Jonna maaka sekundarén. Bulaa nak duké a kundi vékuvutékwa. Wani du kiya du dé?” Wunga wate dé Jisas véké wate mawulé yaréndén.

*Jisas némaamba (5,000) dunyansat kakému kwayéndén  
(Mt 14:13-21; Mk 6:30-44; Jo 6:1-13)*

<sup>10</sup> Jisasna dunyansé waambule yaae Jisasét yandarén akwi muséké wandarén. Wandaka de kure wani taalé yaasékatake dekét de male

Betsaidat yéndarén. <sup>11</sup> Yéndaka asa du dakwa wa wani muséké kundi vékutake déku kukmba yéndarén. Ye déké yaandaka dé vétake deké mawulé yate det wandén, Got néma du rate du dakwaké yékunmba véké yandékwannngé. Watake baat yan du dakwat kururé-wuréndén. <sup>12</sup> Garambu yandéka déku dunyansé yaae dat anga wandarén, “An du dakwa yarékapuk taalé a. Ma waménu ani du dakwa gaayémba ye kakému ras kéraae katakekét kwaandarék.” <sup>13</sup> Naandaka det wandén, “Det kakému gunékét guné wa kwayéké yakwa.” Naandéka wandarén, “Nané kakému rékaamba yamba yé wa. Makal bret taambak rakwa. Gumba kutndarén gukwami vétik wungat male rakwa. Nané ye wani du dakwaké akwi kakému ras kéraaanénngé méné mawulé yo, kapuk?” <sup>14</sup> Némaamba (5,000 pulak) du téndaka wa wunga wandarén. Dakwale nyambalésale waak némaamba wa téndarén wamba.

Jisasna dunyan wunga wandaka det anga wandén, “Det ma wangunu kémba kémba (50, 50) pulak kutetéke rakésndaru.” <sup>15</sup> Naandéka wandén pulak yandaka akwi du dakwa kémba kémba (50, 50 pulak) kutetéke randarén. <sup>16</sup> Rakésndaka Jisas makal bret taambak gukwami vétik wunga kéraae nyérét yaasore véte Gorét wandén, “Yéku musé a tiyaaménén. Yékun wa.” Naatake bret bulésote gukwami jémbusote déku dunyanét kwayéndén, de du dakwat muni waate kwayéndarénngé. <sup>17</sup> Kwayéndaka du dakwa de akwi kurkasale kandarén. Kandaka bret gukwami ras baka randéka kémbi tambavétik

maanmba kaayék vétik (12) waandandarén.

*Pita wa wan, "Jisas Got wan du Krais wa"*  
*(Mt 16:13-19; Mk 8:27-29)*

<sup>18</sup> Nak nyaa Jisas kapmang rate Gorale kundi bulréndén. Yaréndéka déku dunyansé déké yaandarén. Yaandaka det waatakundén, “Du dakwa wunéké yéngä daré wo?” <sup>19</sup> Wunga waatakundéka wandarén, “Ménéké ras wa wakwa, ‘Wa baptais kwayétan du Jon wa.’ Naandaka ras wa wakwa, ‘Wa talimba yatéte Gotna yém̄ba kundi kwayétan du Elaija wa.’ Naandaka ras wa wakwa, ‘Gotna yém̄ba talimba kundi kwayétan du nak kiyaae wa taamale waaraapndén.’ Naandakwa.” Naandarén. <sup>20</sup> Naandaka det wandén, “Wa guné? Wunéké yéngä guné wo?” Naandéka Pita wa wan dat, “Méné nanat yékun yaménénngé Got wan du Krais wa.” Naandén.

*Jisas kiyaae nakapuk taamale waaraapké yandékwannngé wandén*  
*(Mt 16:21-28; Mk 8:31-9:1)*

<sup>21</sup> Pita wunga wandéka Jisas déku dunyansat anga wandén, “Ma vékusék naangunu. Guné nak duwat anga waké yambak, ‘Jisas wan nanat yékun yandénngé Got wan du Krais wa.’ Wunga waké yambak.” <sup>22</sup> Naatake det anga wandén, “Wuné Duna Nyaan a téwutékwa. Wunat kapérandi musé yandaru Israelna néma dunyan, Gotna gaamba jémbaa yakwa dunyanna néma dunyan, apakundiké vékusékngwa dunyan, de wunga wunat kuk kwayékandakwa. Kwayéndaru wuné viyaandaru kiyaakawutékwa. Kiyaawutu nyaa

vétik yéndu kupuk yambanmba nakapuk taamale waarap-kawutékwa.” Naandén.

**23** Watake det akwi anga wandén, “Guné wunale yaate wuna jémbaa yaké mawulé yamunaae, anga ma yangunék. Apapu nyaa guna mawulé ma yaasékangunék. Yaasékate guné wunéké vékulakate anga ma wangunék, ‘Nané déku jémbaa yapéka-kanangwa. Yate nané kaangél kutte takwemimba kiyaamunaananu wa baka musé wa. Yéngä yakét. Wan néma musé yamba wa.’ Wunga wate wuna jémbaa ma yangunék. **24** Wunéké vékukwa du dakwa wuna jémbaa yaréndaru wuna maama det viyaamunaandaru de wunale yékunmba yarépéka-kandakwa apapu apapu. Wunéké vékulakakapuk yakwa du dakwa deku sépéché male vékute deku jémbaa male yamunaate wa lambiyak-ngandakwa. Wunale katik yarépékaké daré. **25** Ani képmaana musé asé kéraaké yakwa du dakwa, deku jémbaa male yamunaate, kiyaae yéngä pulak téké daré? Yamba wa. Kurkale katik téké daré. **26** De wuna kundi kalik yate wunat kuk kwayékwa apu sérémaa Duna Nyaan wuné waambule yaae det kuk kwayékawutékwa. Wani sapak wuné wuna aapamba mayé apa kéraae déku kundi kure gaayakwa dumba waak mayé apa kéraae nyaa yaalate kaalékwa pulak ye gaayakawutékwa. **27** Gunat a wawutékwa. Guné amba tékwa du ras wayéka kiyaakapuk téte vékangunéngwa, Got néma du rate déku du dakwaké yékunmba véndu.” Naandén déku dunyansat Jisas.

*Jisasna sépé waalakwe nakpulak yaalan  
(Mt 17:1-13; Mk 9:2-13)*

<sup>28</sup> Jisas wani kundi watake kukmba nyaa taambak kaayék kupuk (8) pulak yéndéka Pita, Jon, Jems de kéraae kure némbat waarendén. Jisas Gorale kundi bulké watake wa waarendén némbat. <sup>29</sup> Waare Gorale kundi bulréndéka déku méni taama saawi waalakwe nak pulak yaalan. Déku laplap waamamale yasékéyake kalkal naatan. <sup>30-31</sup> Yandéka talimba yatéte Gotna yém̄ba kundi kwayétan du Moses ambét Elaija, Gotna gaayém̄ba bari gaaye bét mayé apa ye nyaa véte kaalékwa pulak téte Jisasale sékét bultémbérén. Dé Gotna kundi vékute Jerusalemma kiyaaké yandékwannngé wa bulténdarén. <sup>32</sup> Yaténdaka Pita ambét dale sékét yaan du vétik waak deku ménimba yundé yandéka de yundé kwaan. Kwaae vélérkiyaae waarape vendarén Jisasna sépé nyaa kaalékwa pulak véte kaaléndéka wani du vétik dale sékét témbéréka. <sup>33</sup> Ye bét yéké yatémbéréka Pita wani kundi yé kunmba vékusékngapuk ye wa Jisasét anga wandén, “Néman Du, nané amba yarénanu yékun yaké yakwa. Gaa kupuk kaakanangwa. Ménan nak, Mosesnan nak, Élaijanan nak.” Naandén.

<sup>34</sup> Wunga waréndéka buwi nak taawe yaae det taakatépédén. Yandéka wup yandarén. <sup>35</sup> Yandaka kundi nak awula buwimba anga waan, “Wan wuna nyaan wa. Wuné dat wawutéka wa yéndén gunéké. Guné déku kundi ma véku.” Naandén.

<sup>36</sup> Wani kundi wandéka vékutake vendarén Jisas kapmang téndéka. Vétake kundi mu ras yamba

bulndakwe. Ye wani nyaa véndarén muséké akwi du dakwat yamba wandakwe wa.

*Jisas kutakwa kulure kure yatan nyaanét kururéndén*

(Mt 17:14-21; Mk 9:14-29)

<sup>37</sup> Nak nyaa némbu yaasékatake daawulindaka asa du dakwa wa Jisaské yaandarén. <sup>38</sup> Yaae dele sékét yaan du nak némaanmba waandén, “Néman Du, ménat waatakuwutékwa, wuna dunyanngu nyaanét véménénngé. Wuné nyaan nakurak male wa. Nyambalésé ras yamba yé wa. <sup>39</sup> Kutakwa wa dat kulure kure yatéte viyaaléka rékaamba waawakndékwa. Yate dat yaavan kutléka biyaat déku tépngémba yaalakwa. Dé yaasékatake yémuké kalik yate, déku sépé yaavan kutlékwa. <sup>40</sup> Yaléka ména dunyansat waatakuwutén, wani kutakwa wandaru yaange yélénngé. Wawutéka wunga yaké yapatindarén.” Naandén.

<sup>41</sup> Naandéka Jisas wa wan, “Yénga pulak dé? Guné wunéké yé kunmba yamba vékulaka-ngunéngwe wa. Guna mawulé yé kunmba yamba te wa. Késépéri baapmu gunale yatéwutéka wunéké yamba yé kunmba vékulaka-ngunéngwe wa. Ma kure yaa ména nyaan.” Naandén.

<sup>42</sup> Wunga wandéka wani nyaan wayéka yéténdéka lé wani kutakwa dat viyaate taakusorak-léka daae képmaamba vaakétdén. Vaakétdéka Jisas wani kutakwat waarute nyaarang naae lat wandén, lé wani nyaan yaasékatake yaange yélénngé. Wandéka yaange yéléka wani nyaan yé kun yandéka déku aapat

kwayéndén. <sup>43</sup> Yandéka wamba tékésén du dakwa wani jémbaa vétake Gotna mayé apaké vatvat naate vékulaka vékulaka naandarén.

*Jisas kiyaaké yandékwangé nakapuk wandén  
(Mt 17:22-23; Mk 9:30-32)*

Wani du dakwa Jisas yan akwi muséké wayéka vékulaka vékulaka naaténdaka, Jisas déku dunyansat anga wandén. <sup>44</sup> “Guné waan taake kurkale ma vékusék naangunu. Yaréyaré naae wuné Duna Nyaan maamat kwayéndaru maamana taambamba rakawutékwa.” <sup>45</sup> Wunga wandéka Got wani wambukundi paakundéka de wani kundiké ras mu ras yamba vékusékdakwe wa kurkasale. Ye wani kundiké Jisasét waatakuké wup yandarén.

*Jisas néma duké wandén  
(Mt 18:1-5; Mk 9:33-37)*

<sup>46</sup> Jisasna dunyansé dekét deku kapmang bulte deku néma duké waarundarén. <sup>47</sup> Waarundaka Jisas deku mawulé véwurésékéyaktake nyaanét nak kure yaae kure téndén. <sup>48</sup> Téte det anga wandén, “Ma véku. Guné wunéké vékulakate ani nyaanét yé kun yate, wa wunat waak wa yé kun yangunéngwa. Guné wunat yé kun yate, wunat wandéka yaawutén duwat waak wa yé kun yangunéngwa. Gunale yaréte dékét déku yé kavérékngapuk yate gunéké jémbaa yakwa du Gotna ménimba dé néma du wa téndékwa.” Naandén.

*Dat kuk kwayékapuk yakwa du déku du téndarénngé wandén  
(Mk 9:38-41)*

**49** Jisas wani kundi wandéka Jon dat anga wandén, “Néma du, du nak ména yém̄ba wandéka kutakwa yaange yéndaka vénanén. Dé nanale yamba yeyé yaayaténdékwe wa. Yandéka dat watépénanén, wani jémbaa yakapuk yandénngé.”

**50** Naandaka Jisas det wandén, “Guné wani jémbaa yandénngé watépéké yambak. Gunat kuk kwayékapuk yakwa du, wa guna du wa yaréndékwa.” Naandén Jisas.

### *Samariasé ras Jisas kalik yandarén*

**51** Got Jisas déku gaayét kure waaréché yandékwa nyaa yaaké yandéka Jisas dékét déku mawulémba vékulakate Jerusalemét yéké mawulé yandén. **52** Ye du rasét wandéka de taale déku kundi kure yéndarén. Ye Samariamba tékwa gaayé nakmba waaréndarén, déké musé asé kéraatakaké. **53** Yandaka wani gaayémba tékwa du dakwa vékuwuréndarén Jisas Jerusalemét yaaké yandékwannngé. Vékutake de Jisaské kalik yate wandarén, “Yamba yé wa. Dé nana gaayét katik yaaké dé.” Naandarén. Samaria du dakwa Juda du dakwa deku néma gaayé Jerusalemgé waak kalik yate wa wunga wandarén. **54** Wandaka Jisasna du vétik Jems ambét Jon vékutake Jisasét anga wambérén, “Néman Du, mawulé yaménu aané watu Gotna gaayémba yaa gaaye ani du dakwat yaanngandékwa. Aané wunga yaténnngé méné mawulé yo kapuk?” **55** Wunga wambéréka waalakwe bérét wandén, “Yamba wa. Wunga yaké yambak.” Naandén. **56** Watake déku dunyan sékét nak gaayét yéndarén.

*Jisasale yeyé yaayatéké mawulé yan duwat wandén  
(Mt 8:19-22)*

<sup>57</sup> Jisas déku dunyansale sékét yaambumba yéténdaka du nak yaae Jisasét anga wandén, “Wuné ménale yeyé yaayatéké mawulé yawutékwa. Yéména akwi taalé wuné yékawutékwa.” <sup>58</sup> Naandéka Jisas déku mawulééké wandén, “Wani du wandén pulak kalmu yaké dé?” Wunga vékulakate dat anga wandén, “Ma vékulaka kurkale. Waaléwasa képmamaamba tékwa képmakwawumba wa kwaandakwa. Api deku kwaatmba wa kwaandakwa. Duna Nyaa wuné kwaana gaa nak yamba te wa.” Naandén.

<sup>59</sup> Naatake nak duwat anga wandén, “Méné ma yaa wunale.” Naandéka wandén, “Néman Du, taale ma yi naaménu ye yaréwutu wuna aapa kiyaandu déku pusaa kéraae rémngawutékwa.” <sup>60</sup> Naandéka dat wandén, “Yamba wa. Méné bulaa male ma yaa wunale. Wuna kundi vékukapuk yakwa du dakwa de kiyaan du pulak wa yaténdakwa. De wani apu kiyaan du dakwat yénga rémndaru. Méné bulaa male wuna jémbaa yate du dakwat kundi ma kwayéménu, Got néma du rate deké yékunmba véké yandékwanngé.” Naandén.

<sup>61</sup> Wunga wandéka dé nak du wa wan Jisasét, “Néman Du, wuné ménale yékawutékwa. Ma yi naaménu taale wuné wuna gaayét ye wuna kémét taamba kurkawutékwa.” <sup>62</sup> Naandéka dat wandén, “Du dakwa Gorké jémbaa taale baasnyé ye kukmba nak nak jémbaaké vékulakamunaae,

wa de Gotna jémbaa yaké yapati-kandakwa.”  
Naandén Jisas.

## 10

### *Dunyan rékaamba (72) Jisas wakandéng-ndéka yéndarén*

<sup>1</sup> Kukmba dunyan rékaamba (72) waak Jisas wakandéng-ndéka yaandarén. Yaandaka det anga wandén, “Guné taale vétik vétik wunga ma yéngunu. Wuné kukmba yéké yawutékwa akwi gaayét guné taale ma yéngunu.” <sup>2</sup> Wunga watake det anga wandén, “Yaawimba asa kakému wa yé kun ye tékéskwa. Téndéka dunyansé ayélapkéri male wa jémbaa yaréndakwa. Yékun yan kakému wan Gotna kundi vékuké mawulé yakwa du dakwa pulak wa. Got dé wani yaawina du pulak wa. Guné Gorét ma waataku, dé wandu jémbaa yakwa du rékaamba waak gunale jémbaa yakandakwa.

<sup>3</sup> “Bulaa gunat wawutékwa, wuna jémbaa yan-gunénngé. Waaléwasa sipsipét yaavan kutndakwa pulak, du ras gunat wunga yaavan kurkandakwa. <sup>4</sup> Guné yéwaa, wut waak kure yéké yambak. Guné su saawuké yambak. Guné yaambumba yéte bari yéngunék. Nak du dakwale baka bulké yambak. <sup>5</sup> Guné gaat nak wulaae, taale wamba rakwa du dakwat anga guné waké ya, ‘Guna mawulé yéngé yékun téndu.’ <sup>6</sup> Wunga wangunu de wamba rakwa du dakwa gunéké mawulé yandaru, Got det yékun yandu de yékunmba yarékandakwa. Wamba yarékwa du dakwa gunéké mawulé yakapuk yate gunat

kuk kwayéndaru, wa Got det katik yékun yaké dé. Got gunat yékun yandu guné yékunmba yarékangunéngwa. <sup>7</sup> Taale wulaangunén gaamba male ma rapékangunu. Nak nak gaat wullaaké yambak. Wani gaamba rate de kwayékwā kakému kulak ma kangunék. Wani kakému kulak kéraakangunéngwa, dele yangunén jémbaaké. Wani gaamba re kukmba ma yéngunu nak gaayét.

<sup>8</sup> “Guné gaayé nakmba ye waarengunu wamba yarékwa du dakwa gunéké mawulé yandaru, guné kwayéndakwa kakému ma kangunék. <sup>9</sup> Yate wani gaayém̄ba baat ye rakwa du dakwat ma kururéngunu. Yate det ma wangunék, ‘Got néma du rate du dakwaké véké yandékwa nyaa a yaae kwambalikwa.’ Ma naangunu.

<sup>10-11</sup> “Guné gaayé nakmba ye waarengunu wani gaayém̄ba yarékwa du dakwa gunéké kalik yamunaandaru, guné ye wani gaayéna yaambumba téte anga guné waké ya, ‘Nané guné kuk kwayénangwa. Got waak gunat kuk kwayéndékwa. Kuk kwayé-ndékwannngé guné vékusék-ngunénngé wa nané ani gaayém̄ba tékwa baawu nana maanmba kwaandék̄a viyaaputénanga wa vengunéngwa. Guné ani muséké vékusék-ngaungunéngwa. Got néma du rate du dakwaké yékunmba véréké yandékwa nyaa a yaae kwambalikwa. Yandéka guné déku kémba gwaandéké wa kalik yangunéngwa.’ Det wunga ma naangunu. <sup>12</sup> Wani gaayém̄ba yarékwa du dakwaké gunat wawutékwa. Talimba Sodommba tan du dakwa kapéremusé yandarén. Kukmba Got néma kot vékute néma du randa nyaa dé wandu Sodommba tan du dakwa

kaangél kurkandakwa. Du dakwa nanat kuk kwayémunaandaru, wani nakurak kapéremusé wa Sodommba tan du dakwa yan kapéremusat taalékéra-kandékwa. Wani nyaa Got wandu nanat kuk kwayén du dakwa néma kaangél kurkandakwa.” Naandén Jisas.

*Du dakwa Jisaské kuk kwayéndakwanngé wandén*  
*(Mt 11:20-24)*

<sup>13</sup> Wani kundi watake Jisas anga wandén: “Guné Korasinmba tékwa du dakwaké sémbéraa yawutékwa. Guné Betsaidamba tékwa du dakwaké sémbéraa yawutékwa. Wuné guna gaayémba yaréte vékapuk yangunén kulé apanjémba wa yawutén. Yawutéka wa véngunén. Vétake Gorké yé kunmba yamba vekulaka-ngunéngwe wa. Tairmba talimba tan du dakwa Saidonmba talimba tan du dakwa waak Gorké vekusékngapuk ye, wani kulé apanjémba vémunaae, wa de talimba yandarén kapéremuséké kalik yatake, wani kapéremusé yaaséka-katik daré. Yandarén kapéremuséké kalik yate nak du dakwa deku mawuléké vendarénngé de jaangwa laplap saawuwe baawumba rakanik daré. <sup>14</sup> Kukmba Got néma kot vékute néma du randa nyaa dé wandu de wani talimba Tairmba tan du dakwa, Saidonmba talimba tan du dakwa waak de kaangél kurkandakwa. Guné Korasinmba tékwa du dakwa Betsaidamba tékwa du dakwa waak, guné wuna jémbaa vétake wunat kuk kwayéngunén. Kuk kwayéngunéngé wani nakurak kapérandi musé de yan akwi kapérandi

musat wa taalékérandén. Wani nyaa Got wandu guné néma kaangél wa kurkangunéngwa. <sup>15</sup> Guné Kaperneammba tékwa du dakwa guné apapu anga wangunéngwa, ‘Nané Gotna gaayét waarékánangwa.’ Wunga wangunéngä gunat wawutékwa. Got wandu guné kapérandi taalat daawuli-kangunéngwa. Guné Gotna gaayét katik waaréké guné.” Naandén.

<sup>16</sup> Wunga watake déku dunyansat anga wandén, “Guna kundi vékuna du dakwa wa de wuna kundi vékukandakwa. Gunéké kuk kwayéna du dakwa wa de wunat kuk kwayékandakwa. Wunat kuk kwayéna du dakwa wa de wuné wani wandéka gaayawutén duwat kuk kwayékandakwa.” Naandén. Wunga wandéka wa déku dunyansé déku kundi kwayéké yéndarén.

### *Jisasna jémbaa yakwa dunyansé nakapuk waambule yaandarén*

<sup>17</sup> Kukmba wani késépéri (72) dunyan Jisas wan jémbaa yatake mawulé yate nakapuk waambule yaandarén. Yaae dat wandarén, “Néman Du, nané ména yémba wananga akwi kutakwa nana kundi vékundarén. Vékute du dakwa yaasékate yaange yékéraandarén.” <sup>18</sup> Naandaka det wandén, “Guné wunga yangunéngä nyétmba kusnyérak yandéka yaa gaayakwa pulak, Satan anjorémba re gaayandéka vewutén. <sup>19</sup> Ma véku. Gunat mayé apa wa kwayéwutén. Kwayéwutén mayé apat guné kaambe, kulaapati waak vaakingunu gunat katik yaavan kurké daré. Gunat kwayéwutén mayé apa wa Satanna mayé

apat taalékéra-kandékwa. Yandu dé gunat katik yaavan kurké dé. <sup>20</sup> Akwi kutakwa guna kundi vékundaka guné wani muséké mawulé yangunéngwa. Wani muséké guné vékulaka vékulaka naaké yambak. Ani muséké ma vékulaka. Guné Gotna kém̄ba yaalangunénḡa dé guna yé déku nyéngaamba wa viyaandén. Wani muséké vékulakate mawulé tawulé ma yangunék.” Naandén Jisas det.

*Jisas mawulé yate Gorét wandén, “Yékun wa.”  
(Mt 11:25-27; 13:16-17)*

**21** Wani sapak Gotna Yaamambi Jisasna mawulémba wulaandéka dé mawulé yate Gorét anga wandén, “Méné wuna aapa, méné nyét béré képmaana néma du wa. Ména jémbaa ras paakuménénḡa némaamba muséké vékusékn̄gwa du dakwa ména jémbaa yamba kurkale vékusékn̄dakwe wa. Némaamba muséké vékusékn̄gapuk yakwa du dakwa, deku mawulé nyambaléséna mawulé tékwa pulak téndéka yékéyaakmba wa yaréndaka det ména jémbaa wa wakwasnyéménén. Ména mawulémba vékulakate wa wunga yaménén. Yékun wa wunga yaménén.” Naandén.

**22** Gorét wunga watake anga wandén, “Wuna aapa déku jémbaa, déku mayé apa waak wa tiyaandén wunat. Wuné déku nyaan yatéwutéka du dakwa wuné kurkale yamba vésékn̄dakwe wa. Dé male wa vésékn̄dén wuné. Du dakwa déké kurkasale yamba vékusékn̄dakwe wa. Wuné male wa dé vésékwutén. Déké wawutén du dakwa waak dé vésékn̄darén wa.” Naandén.

**23-24** Wunga watake déku dunyan male téndaka waalakwe det anga wandén, “Gotna jémbaaké gunat wawutékwa. Gotna yém̄ba talimba kundi kwayétan dunyan, néma du waak, de a yawutéka véngunéngwa jémbaa véké mawulé ye, yamba véndakwe wa. Yate a wawutéka vékungunéngwa kundi de yamba vékundakwe wa. Got gunat yé kun yandéka wa wani jémbaa véngunén.” Naandén Jisas.

*Samaria du déku maamaké mawulé sémbéraa yandén*

**25** Wani kundi wandéka apakundi yakwasnyékwa du nak déku mawuléché anga wandén, “Jisas wuna kundi waambule wate kalmu sépélak waké dé?” Wunga vékulakate dat anga wandén, “Gotna jémbaaké nanat yakwasnyékwa du, yénḡa pulak ye wuné kulémawulé kéraae apapu kurkale yarésékéyakngé wuté?” **26** Wunga waatakundéka dat wandén, “Kamu kundi dé guna apakundimba kwaau? Gotna nyénḡaamba yénḡa daré viyaatakak?” **27** Naandéka wandén, “Guné guna Néman Du Gorké néma mawulé ma yangunu. Yate dat wangunu guna sépé, guna mayé apa, guna mawulé, guna kwaminyan, guna yaamambiké dé néma du rakandékwa. Guné guna sépéké mawulé yangunéngwa pulak, nak du dakwaké wunga ma mawulé yangunu. Yate det ma yé kun yangunu.” Naandén. **28** Wunga wandéka dat wandén, “Wan yé kun wa waménéngwa. Méné wunga

ye wa kulémawulé kéraae apapu yékunmba yarésékéyak-ngaménéngwa.” Naandén Jisas.

**29** Jisas wunga wandéka wani du mawulé yandén, du dakwa déku yé kavérék-ndarénngé. Yate Jisasét anga waatakundén, “Yani du dakwat yékun yaké wuté?” Naandén.

**30** Wandéka Jisas déku kundi waambule wate anga wandén, “Juda du nak Jerusalem taakatake Jerikot daawuliké watake yéndén yaambumba. Yéténdéka sél yakwa du ras dé yaambumba vendarén. Ve dé kulkiye déku musé asé kéraate dé viyaae kapére ye yaambumba taakandarén. Viyaatake yéndaka dé yaambumba kwaae kiyaaké yakwandén. **31** Yakwandéka wani sapak Gotna gaamba jémbaa yakwa du nak wani yaambumba yéndén. Ye wani duwat vétake dé aarkém̄ba tepuwe dé yaasékatake dé yén. **32** Yéndéka Gotna gaamba jémbaa yakwa nak du, Livai du waak ye dat vétake yaasékatake aarkém̄ba tepuwe yéndén.

**33** “Yéndéka Samaria du nak wani yaambumba ye wani du kwaanmba saambakndén. Wa vékusék-ngunéngwa. Juda du dakwa de kalik yandakwa Samaria du dakwaké. Samaria du saambake Juda du wamba kwaandéka vétake déké mawulé sémbéraa yandén. **34** Yate ye dat wani viyaandarénmba waasé yakwasnye marasin kure waasé gindén. Giye wani du kéraae déku donkimba kusore kure yéndén. Kure yéndéka yaambumba gaan yandéka saayéngat nak kure ye wamba taakatake dat yékun yandén. **35** Gaan kwaae ganmba yéte wani gaana duwat yéwaa

ras kwayéte dat anga wandén, ‘Méné ani duké kurkale ma véménék. Yate dat yékun yaké, ména yéwaa ras kwayéménu wuné waambule yaae ména yéwaa kwayékata-kawutékwa.’ Naatake yéndén.

<sup>36</sup> “Bulaa yéngä méné vékwo? Du kupuk wa wani yaambumba yéndarén. Ye sél yakwa du viyaan duwat kandé yékun yan?” <sup>37</sup> Wunga wandéka dat wandén, “Déké mawulé sémbéraa yan du wa dat yékun yan.” Naandéka wandén, “Méné ma ye wunga ya dé yan pulak.” Naandén Jisas dat.

### *Jisas Maria ambét Martale bulndén*

<sup>38-39</sup> Jisas déku dunyansale sékét yéndarén. Ye gaayé nakmba waarendarén. Wani gaayémba taakwa nak léku yé Marta, léku waayéka Mariale sékét yarémbérén. Yaréte Marta Jisasét walén, dé yaae bérku gaamba kakému kandénngé. Waléka yaae wulaae randéka léku waayéka Maria yaae Néman Du Jisasna maanale rate déku kundi vékurélén. <sup>40</sup> Vékuréléka Marta lé néma jémbaa yate kakému yaakélén. Yate Maria baka raléka véléka Martana mawulé kapére yan. Yandéka Marta yaae Jisasét anga walén, “Néman Du, wuna waayéka baka raléka wuné kapmang jémbaa yate kakému yaakéwutékwa. Yawutékwanngé yamba vékuménéngwe, yi? Ma waménu yaalu sékét yaakékatékwa.” Naalén.

<sup>41</sup> Wunga waléka Néman Du wa wan lat, “Nyéno, Marta, nyéné rékaamba muséké vékulaka-nyénéngwa. <sup>42</sup> Nyéné nakurak ani yéku muséké yamba vékulaka-nyénéngwe wa.

Wuna kundi vékuké yanyénéngwa musé, wan yéku musé wa. Maria lé wani yéku muséké wa mawulé yalékwa. Yalu wuné lé yélénngé katik waké wuté. Lé wuna kundi vékuké mawulé yalékwa.” Naandén Jisas Martat.

## 11

*De Gorét waatakumban yapatéké wa Jisas wandén*

(Mt 6:9-15; 7:7-11)

<sup>1</sup> Nak nyaa Jisas nak taalémba Gorale kundi bulréndén. Kundi bulsekéyaktake randéka déku du nak yaae dat anga wandén, “Talimba baptais kwayétan du Jon déku dunyansat yakwasnyéndén Gorét waataku-ndarénngé. Det yakwasnyéndén pulak méné nanat ma yakwasnyéménu, Gorét waataku-nanénngé. Wunga yaménénngé mawulé yanangwa.” <sup>2</sup> Naandaka det wandén, “Guné Gorét waatakuké mawulé yate anga ma wangunu:

‘Nana aapa, nané ména yé kavérékngé mawulé yanangwa.

Méné néma du rate akwi du dakwaké kurkale véménénngé mawulé yanangwa.

<sup>3</sup> Yapatinangwa kakému nyaambanaku tiyaaménénngé ménat waatakunangwa.

<sup>4</sup> Du dakwa kapéremusé nanat yandaka nané wani muséké nakapuk vékulake yamba yakatanangwe wa.

Yananu méné yananén kapéremusé wunga yasyéputiye méné wani muséké nakapuk vékulakate yakataké yamarék.

Méné nanat yékun yaménu nané nakapuk kapéremusé katik yaké nané. Wunga ménat waatakunangwa.' Naanganu."

Wunga wandén Jisas.

<sup>5-6</sup> Watake det anga wandén, "Guna du nak kalmu anga yaké dé? Du nak gaan yandéka nyéndéngan dé déku naawinduké yéndén. Ye gaa pétém̄ba téte anga waandén, 'Naawindu, kakému ras ma tiyaaménék. Wuna du nak bulaa nak gaayét yéké watake yaambumba yéte yaae wuna gaamba saambakndén. Yaandéka wuné kakému ras yamba rakése wa. Méné kakému ras wunat tiyaaménu méné nakapuk waambule kwayékata-kawutékwa.' <sup>7</sup> Wunga waandéka déku naawindu awula gaamba kwaate wandén, 'Bulaa wani musé aséké wunat waatakuké yambak. Pété tépéwutén wa. Wuna nyambalésé wunale yundé kwaakésndakwa. Wuné waarape bulaa kakému katik kwayéké wuté.' Naandén. <sup>8</sup> Guné a wawutékwa. Dé 'Naawindu wa,' naatake, waarape dat kakému katik kwayéké dé. Wani du déku pétém̄ba téte waapékaténdu dé yundé kwaaké yate, waarape wani du mawulé yandékwa kakému dat kwayékandékwa.

<sup>9</sup> "Gunat a wawutékwa. Guné Gorét waataku-pékangunu dé gunat kwayékandékwa. Ani gwaaménja kundi ma véku. Guné waake waake vékangunéngwa. Guné pétém̄ba viyaangunu viyaangunu pété naapikandékwa. <sup>10</sup> Du dakwa Gorét waatakundaru, det kwayékandékwa. Du dakwa waake waake vékandákwa. Du dakwa pétém̄ba viyaandaru, pété naapikandékwa. Guné wani gwaaménja kundi vékute Gorét ma

waataku-pékangunék. Waatakungunu dé guna kundi vékukandékwa.

<sup>11</sup> “Ani kundi waak ma véku. Guné, aa-pambéré, guna nyambalésé gukwamiké waan-daru, guné kaambet kéraae kwayéké guné det, kapuk? Yamba wa. Guné det gukwami wa kwayékangunéngwa. <sup>12</sup> Guna nyambalésé sérangék kwayéngunénngé wandaru guné kulaa-patit kéraae kwayéké guné, kapuk? Yamba wa. Guné det sérangék wa kwayékangunéngwa. <sup>13</sup> Bulaa wani kundiké ma vékulaka. Guné kapére mawulé yakwa dunyansé rate guna nyambalésat yéku musé wa kwayéngunéngwa. Anjorémba rakwa du guna aapa yéku mawulé yakwa du rate gunat akwi taalékérásande déku Yaamambi kwayékandékwa, dat waatakukwa du dakwat.” Naandén.

*“Jisas Belsebulale jémbaa yandékwa,” naandarén*

(Mt 12:22-30; Mk 3:20-27)

<sup>14</sup> Du nakét kutakwa kulure kure yatéléka dé kundi yamba bulndékwe. Yandéka Jisas wani kutakwat wandéka wani du yaasékatáke yaange yélén. Yaange yéléka dé nakapuk kundi bulndén. Bulndéka du dakwa wani muséké vékulaka vékulaka naandarén. <sup>15</sup> Yandaka de du ras wa wan, “Akwi kutakwana néma du déku yé Belsebul wa Jisasna mawulémba wulaae tékwa. Téte mayé apa kwayéndéka wa wandéka kutakwa yaange yéndakwa.” Naandarén.

<sup>16</sup> Wunga wandaka ras dat anga wandarén, “Méné talimba vékapuk yananén kulé apanjémbar nak yaménu vétake wakanangwa, ‘Méné Got

déku jémbaa yaménénngé ménat wa wandén.' Naakanangwa."

<sup>17</sup> Wunga wandaka Jisas deku mawulé vésékte det anga wandén, "Ani kundi ma véku. Néma gaayémba yarékwa dunyan mawulé vétik ye kém kutéke kémba kém rate waariyamunaae, de katik tésékéyakngé daré. Nakurak gaamba yarékwa du dakwa mawulé vétik ye deku kapmang waariyamunaae, de waak katik tésékéyakngé daré. <sup>18</sup> Wani kundiké vékulakate akwi kutakwana néma du Satan, déku dunyan waak deké ma vékulaka. De mawulé vétik ye deku du dakwale waariyamunaae, de katik tésékéyakngé daré. Guné wunat wangunén pulak Satan déku du dakwa yaange yéndarénngé wamunaandu de katik tésékéyakngé daré. Satan wunga jémbaa yamba yandékwe wa.

<sup>19</sup> "Guné wunéké anga wangunéngwa. Akwi kutakwana néma du Belsebul wuna mawulémba wulaae téte wunat mayé apa tiyaandéka wa wawutéka kutakwa yaange yéndakwa. Naan-gunéngwa. Guna du ras waak wandaka kutakwa yaange yéndakwa. Wan paapu wa yangunéngwa. Guna du wunga yandaka guné det anga yamba wangunéngwe, 'Belsebul guna mawulémba téte apa kwayéndéka guné wangunéngá kutakwa yaange yéndakwa.' Det wunga wakapuk yate wunat kamuké guné wunga wo? Wuné dele naku-rak jémbaa yawutéka wuné wa véndarén. Guné wunéké paapu wa yangunéngwa. <sup>20</sup> Ma véku. Got wunat mayé apa wa tiyaandékwa. Tiyaandéka wa wawutéka kutakwa yaange yéndakwa. Got wunat wunga mayé apa tiyaandénngé véte anga

vékusék-*ngangunéngwa*. Got néma du rate du dakwaké véké yandékwa sapak wa yaan.

**21-22** “Ani kundi ma véku. Kaawundu déku waariyandékwa musé kure déku gaaké séngiye ramunaandu déku musé asé akwi yé kunmba rakéskandákwa. Yaréndu nak kaawundu dat taalékére kaawumama yakwa du yaae wani duwale waariye déku vi waariyandékwa ras musé waak kéraae déku musé asé waak kéraakandékwa. Kéraae wani musé asé nak duwat muni waate kwayékandékwa. Satan wani kaawundu pulak wa. Wuné dé taalékérān kaawumama du pulak wa. Wuna mayé apa wa Satanna mayé apat taalékérān.

**23** “Wunale jémbaa yakapuk yakwa du dakwa de wuna maama wa. Wuné du dakwat wawutéka de wuna kém̄ba téndákwa. Wuna du dakwat yé kun yakapuk yakwa du dakwa de wuna du dakwat yaavan kutndakwa.” Naandén.

*Kutakwa yaange ye nakapuk waambule yaalén*  
(Mt 12:43-45)

**24** Wani kundi watake det anga wandén, “Ani kundi ma véku. Kutakwa du nakna mawulémba wulaae te yaasékatake yaale yélén. Ye maas viyaakapuk taalémba yarémuké taaléké waaklén. Waakpatiye walén, ‘Wuné talimba rawutén gaat waambule yékawutékwa.’ **25** Wunga watake waambule yaae vélén wani duna mawulé yé kun yasékéyake baka téndéka. **26** Vétake ye kutakwa taambak kaayék vétik (7) we kure sékét yaalén. Kukmba kure yaalén kutakwasé yan kapéremusé wa taale yaan kutakwa yan kapéremusat taalékérān. Wani kutakwasé akwi

wani duna mawulémba wulaakére tékésndarén. Talimba kutakwa nakurak déku mawulémba wulaae téléka wani du kapéremusé ayélap yandén. Kutakwa késépéri wulaakérandaka asa kapéremusé wa yandén.” Naandén.

*Got det yékun yakwate yandékwanngé Jisas wandén*

<sup>27</sup> Jisas wani kundi wandéka dale sékét tékésén némaamba du dakwa wani kundi vékundarén. Vékuténdaka wamba tan taakwa nak némaanmba waalén anga, “Talimba méné kéraae ménat munyaaa kwayén taakwat Got yékun yandu lé mawulé tawulé yéngä yarélu.” <sup>28</sup> Wunga waaléka Jisas wa wan, “Yi wan wanana wa. Wani muséké vékulakaké yambak. Ani muséké ma vékulaka. Gotna kundi vékute wandékwa pulak yakwa du dakwat Got yékun yandu de mawulé tawulé yéngä yaréndaru.” Naandén Jisas.

*Jona yan pulak, nakpulak kulé apanjémба ya-muké wandén Jisas*

(Mt 12:38-42; Mk 8:12)

<sup>29</sup> Asa du dakwa wa yaate jaawuténdaka wa Jisas det anga wandén, “Ani sapakmba tékwa du dakwa kapéremusé wa yatépékandakwa. Wunat waatakundakwa, wuné talimba vékapuk yandarén kulé apanjémба yate Gotna mayé apaké det wakwasnyéwuténngé. Gotna yém̄ba kundi kwayétan du Jona yan pulak, nakpulak kulé apanjém̄ba pulak male wuné waak yakawutékwa. Nak kulé apanjém̄ba deké katik yaké wuté. <sup>30</sup> Talimba Jona Ninivet ye de yan kapéremuséké det wandén. Jona yan pulak yawutékwa. Duna

Nyaan wuné ani sapakmba yatékwa du dakwat wawutékwa, de yandarén kapéremuséké.

**31** “Talimba néma taakwa nak ani sékaa gaayém̄ba yaae néma du Solomonna kundi vékuké kulém̄ba yélén. Dé nyaangét pukaakwa du yaréndéka wuné amba téte gunale kundi bulkwa du wuné nyaangét pukaakwa du yatéte Solomonét wa taalékérāwutén. Sérēmaa Got néma kot vékute néma du randa nyaa wani néma taakwa waarape Gotna ménim̄ba téte gunat anga wakalékwa, ‘Wuné animba sékaamba yaawutén. Yaae Solomonna kundi vékutuwutén. Jisasna kundi wa taalékérān Solomonna kundit. Guné Jisasna kundi yamba vékungunéngwe wa. Wunga yate néma kapéremusé wa yangunén.’ Naakalékwa wani taakwa.

**32** “Talimba Ninivemba tan du dakwa de Jonana kundi vékute yandarén kapéremusé yaasékandarén. Jona néma du téndéka wuné amba yatéte kundi bulkwa du wuné néma du yatéte Jonat wa taalékérāwutén. Sérēmaa Got néma kot vékute néma du randa nyaa Ninivemba tékésén du dakwa Gotna ménim̄ba téte gunat anga wakandakwa, ‘Jona nanat Gotna kundi wandéka nané vékute yananén kapéremusé yaasékatake Gotna kundi kurkasale vékunanén. Jisas wa Jonat taalékérān. Ye gunat Gotna kundi kwayéndéka guné yangunén kapéremusé yaasékatake Gotna kundi yamba vékungunéngwe wa. Wunga ye guné néma kapéremusé wa yangunén.’ Gunat wunga wakandakwa.” Naandén Jisas.

*Kurkale téndarénngé wa wandén Jisas  
(Mt 5:15; 6:22-23)*

<sup>33</sup> Wani kundi watake det anga wandén, “Ani gwaaménja kundi ma véku. Du dakwa téwaayé yaa véréksowe kure yaae aké arulamba yamba kusole sapngutépéndakwe wa. De jaambétakumba wa taakandakwa. Taakandaka wamba yarékwa du dakwa de akwi kurkale vénđakwa. <sup>34</sup> Guna méni gaamba tékwá gaana pété pulak wa. Wani pété naapindaka gaamba nyaa kaaléndékwa. Guné yéku musé male vémunaangunu guna mawulé kurkale tékandékwa. Yandu guna sépé yéku téndu guné nyaa kaalétkwanmba yarékangunéngwa. Guné kapéremusé male vémunaangunu guna mawulé katik yéku téké dé. Guna mawulé yéku tékapuk yandu guna sépé yéku tékapuk yandu guné ganngumba yarékés-kangunéngwa. <sup>35</sup> Guné wunga yarékapuk yamuké ma jéraawu yangunék. <sup>36</sup> Guna mawulé kurkasale male témunaandu guné nyaa kaalékwánmba male yaréte yéku musé yate yékuンmba yarékangunéngwa.” Naandén.

*Farisi dunyan apakundiké vékusékn̄gwa dun-yansé waak yandakwa kapéremuséché wa wandén Jisas*

*(Mt 23:1-36; Mk 12:38-40; Lu 20:45-47)*

<sup>37</sup> Jisas wani kundi wasékéyakndéka wa Farisi du nak dat wandén, dé yaae dale sékét kakému kandénngé. Wandéka yaae déku gaamba wulaae dale sékét kaké watake randén. <sup>38</sup> Deku apakundi wakwa pulak déku taamba taale yamba yakwasnyéndékwe wa. Jisas wunga yandéka

wani Farisi du vétake vékulaka vékulaka naandén.  
<sup>39</sup> Yandéka Néman Du Jisas dat anga wandén,  
 “Guné Farisi dunyan, aké, kasnya kuksaku male  
 yakwasnyé-ngunéngwa. Biyaasaku yamba yak-  
 wasnyé-ngunéngwe wa. Yangunéng a arula awula  
 kapére yandékwa. Guné guna sépéké male vékute  
 salmu walmu nak du dakwamba baka kéraote  
 kapéremusé ras waak yangunéng a guna mawulé  
 kapére yandékwa, wani kasnyana biyaasaku  
 kapére yakwa pulak. <sup>40</sup> Guné waangété yakwa  
 dunyan wa. Got guna sépé yatake guna mawulé  
 waak yandén. Wunga yandénngé guné kurkale  
 yamba vékungunéngwe wa. <sup>41</sup> Guné yéku mawulé  
 kéraae, musé asékapuk yan du dakwat musé asé  
 ma kwayénguné. Kwayéngunu guna mawulé  
 yé kun yakandékwa Gotna ménimba.

<sup>42</sup> “Guné Farisi dunyansé guné vésék naa.  
 Kapérandi musé gunéké wa yaakandékwa.  
 Guné akwi musé asé muni waate tambék  
 tambavétik (10) taakate nakurak tambék  
 Gorké kwayéngunéngwa. Wunga kwayéte  
 akwi nyénganyam waak muni waate yém  
 tambavétik (10) taakatake nakurak yém Gorké  
 kwayéngunéngwa. Nyénganyam wa néma musé  
 yamba yé wa. Wan makalkéri musé wa. Guné  
 wani makal muséké vékulakate guné ani néma  
 muséké yamba vékulakangunéngwe wa. Guné  
 nak du dakwat ma yé kun yanguné. Guné  
 Gorké néma mawulé ma yanguné. Guné guna  
 salmu walmu muni waate yém tambavétik (10)  
 taakatake nak yém Gorké kwayéngunéngwan wan  
 yé kun wa. Wani musé yaasékaké yambak. Wani  
 makal musé yate wawutén néma musé waak

yamunaae, yékun yakangunéngwa.

**43** “Guné Farisi dunyansé, guné vésék naa. Kapérandi musé gunéké wa yaakandékwa. Guné Gotna kundi bulnangwa gaamba wulaae néma duna taalém̄ba raké mawulé yangunéngwa. Guné du dakwa jaawundakwa taalém̄ba yeýé yaayan-gunu nak du dakwa gunat vétake anga wan-darénngé wate yangunéngwa: ‘Wan de nana néma du wa.’ Wunga wandarénngé mawulé yangunéngwa.

**44** “Guné vésék naa. Kapérandi musé gunéké wa yaakandékwa. Guné talimba kiyaandaka rémndarén kwaawu pulak wa. Kukmba yarékwa du wani kwaawu tékwa képm̄aatakumba yeýé yaayate rémndarén kwaawu vékapuk yandakwa pulak, wa nak du dakwa guna kapére mawulé yamba véndakwe wa. Yate de gunale sékét yaténdakwa. Yatéte Gotna ménimba kapére yan-dakwa.” Naandén.

**45** Jisas wani kundi wandéka apakundiké vékusékngwa du nak dat anga wandén, “Néma du, méné wunga wate nanat waak waaruménéngwa wa.” **46** Naandéka dat anga wandén, “Guné apakundiké vékusékngwa dunyan, guné ma vésék naa. Gunéké waak kapérandi musé yaakandékwa. Du nak néma vaak yakwa musé késépéri yaate téndéka, nak du yaae ras waak vaakutakandékwa pulak, wa guné néma jémbaa ras waak du dakwat kwayéngunéngwa. Kwayéte det anga wangunéngwa, ‘Guné ani apakundi akwi vékute wandékwa pulak ma yangunu.’ Wunga wangunénḡa de wani kundi

vékute wandékwa pulak yaké néma jémbaa wa yandakwa. Yandaka deké mawulé sémbéraa yamba yangunéngwe wa. Yate det yékun yamba yangunéngwe wa.

**47** “Guné ma vésék naa. Kapérandi musé gunéké yaakandékwa. Talimba guna gwaal waaranga maandéka bakamu de Gotna yém̄ba kundi kwayétan dunyansat viyaandékndarén. Ye rémndarén taalém̄ba wa guné yéku musé yakusongunéngwa. **48** Guna gwaal waaranga maandéka bakamu viyaandéke rémndarén duna taalém̄ba wunga yéku musé yakusote anga wangunéngwa, ‘Nana gwaal waaranga maandéka bakamu yandarén muséké mawulé yanangwa.’ Naangunéngwa. **49** Wunga wangunéngwanngé, nyaangét vékupukaakwa du Got anga wandén, ‘Wuné wuna yém̄ba kundi kwayékwa dunyan wuna kundi kure yékwa dunyansat waak wawutu de Israel du dakwaké yékandakwa. Yéndaru rasét yaavan kutte rasét viyaandék-*ngandakwa*.’ Naandén. **50-51** Wandéka wunga yandaka wa véngunén. Talimba guna gwaal waaranga maandéka bakamungu Gotna yém̄ba kundi kwayétan dunyansat wa viyaandékndarén. Taale Kein déku waayéka Abelét viyaandékndén. Got ani képm̄aa yatake yaréyāré naandéka Kein déku waayéka Abelét viyaandékndén. Viyaandékndéka de guna gwaal waaranga maandéka bakamu yéku musé yakwa dusat viyaandékndarén. Viyaandék-laakét viyaandék-laakét ye kukmba Sekaraiat viyaandékndarén. Dé Gotna gaa nyéndémba

téndéka dé viyaandékndarén. Viyaandékndarénngé bulaa guné ani nyaa tékwa dunyan gunat wawutékwa. Got yandarén kapérandi muséké vékulakate guné deku gwaal waaraanga maandéka bakamungu wunga kapérandi musé yangunénnngé waak vékulakate, gunat némaamba yakata-kandékwa.

**52** “Guné apakundiké vékusékngwa dunyan, guné ma vésék naa. Kapérandi musé gunéké yaakandékwa. Guné Gorké yéndakwa yaambuké ayéláp wa vékungunén. Vékute guné wani yaambumba yémuké kélélik yangunén. Yate guné wani yaambumba yéké mawulé yakwa du dakwat watépéngunéngá de wani yaambumba yamba yéndakwe wa.” Naandén Jisas.

**53-54** Watake yéndéka de apakundiké vékusékngwa dunyan, Farisi dunyan waak deku mawuléché anga wandarén, “Dé nana kundi waambule wate kalmu kapére kundi ras waké dé? Wandu dé kotim-nganangwa.” Wunga wate dat waarute dale nakpulak nakpulak kundi bulndarén.

## 12

*Paapu yandakwa yapatéké vésék naandarénngé Jisas wandén*

*(Mt 10:26-27)*

**1** Asa du dakwa wa yaae jaawuwe téndaka taalé vékulékén. Ye ras du wa vaakin ras duna maanmba. Vaakindaka Jisas taale ani kundi déku dunyansat wandén, “Ma vésék naangunék. Farisi dunyanséna yismba guné

kurké yambak. Ani kundi wate paapu yandakwa yapatéké wa wawutékwa. <sup>2</sup> Paakundarén akwi musé asé sérémaa némaamba du dakwa vékandakwa. Yakélak wandarén akwi kundi sérémaa némaamba du dakwa vékukandakwa. <sup>3</sup> Ganngumba bulngunén kundi nyaa du dakwa vékukandakwa. Gaamba awula rate yakélak bulngunén kundi sérémaa kaapamba saapéndaru akwi du dakwa vékukandakwa.” Naandén Jisas.

*“Du dakwa Gorké male ma wup yandaru,”  
naandén Jisas  
(Mt 10:28-31)*

<sup>4</sup> “Wuna du dakwa, gunat anga wakawutékwa. Guné képmaana du nakngé wup yaké yambak. De guné viyaandéktake kukmba gunat katik yaavan kurké daré. <sup>5</sup> Anjorémба rakwa du Gorké ma wup yangunék. Képmaana du gunat viyaandékndaru Got guné yaanpékatékwa yaat vaanjandaké mayé apa yandékwa. Wanngé vékulakate Gorké ma wup yangunék.

<sup>6</sup> “Anga wa vékusékngunéngwa. Du dakwa makalkéri yéwaa vétik kwayéte api taambak (5) kéraandakwa. Wani api wa makalkéri musé wa. Got wani apiké wa vékundékwa. <sup>7</sup> Got gunéké waak wa vékulakandékwa. Gunä maakamba tékwa némbé akwi naakiye wani némbéké waak wa véndékwa. Akwi musé asé wa véwuréndékwa. Véte gunéké yé kunmba véndékwa. Véndékwanngé vékulakate guné wup yaké yambak. Api wan makalkéri musé wa. Du daakwa wan néma musé wa. Got makal sakal apiké yé kunmba véte gunéké yé kunmbaa-sékéyak wa vékandékwa.” Naandén Jisas det.

*“Wuna du wa” naamuké wandén Jisas  
(Mt 10:32-33; 12:32; 10:19-20)*

<sup>8</sup> Watake det anga wandén, “Gunat wawutékwa. Du nak, du dakwana ménimba téte anga wamunaandu, ‘Wuné Jisasna du a.’ Wunga wandu sérémaa Duna Nyaan wuné Gotna gaayém̄ba déku kundi kure gaayakwa dunyanséna ménimba téte det anga wakawutékwa, ‘Ani du an wuna du a.’ Naakawutékwa. <sup>9</sup> Du ras, du dakwana ménimba téte nakurak nakurak anga wandaru, ‘Wuné Jisasna du yamba yé wa.’ Naandaru wuné Gotna gaayém̄ba rate déku kundi kure gaayakwa dunyanséna ménimba téte det anga wakawutékwa, ‘Wani dunyansé wan wuna dunyansé yamba wa.’ Naakawutékwa.

<sup>10</sup> “Wuné Duna Nyaan wa rawutékwa. Du dakwa wunat wasélékte wunat kapére kundi watake wani kapére kundiké kalik ye sémbéraa yate yaaséka-munaandaru, Got wani kapéremusé yasnyéputi-kandékwa. Gotna Yaamambit wasélékte kapére kundi wamunaandaru, wa Got wani kapéremusé katik yakwasnyéputiké dé.

<sup>11</sup> “Du ras gunat Gotna kundi bulndakwa gaat kure ye néma duké waak kure yéndaru guné deku ménimba téte, wup yakapuk yate, guna mawuléké anga waké yambak, ‘Yénḡa waké nané?’ Deku kundi yénḡa pulak waambule waké nané?” <sup>12</sup> Guné wunga waké yambak. Wani nyaa Gotna Yaamambi gunat kwayékandékwa, waké yangunéngwa kundi.” Naandén Jisas.

*Yéwanduké Jisas gwaaménja kundi wandén*

<sup>13</sup> Asa du dakwa wa Jisasale sékét tékésndarén. Dele tan du nak Jisasét anga wandén, “Néma du, wuna aanyat ma waménu dé aana aapana musé asé muni waate tambék wunat tiyaandénngé mawulé yawutékwa.” <sup>14</sup> Wunga wandéka wandén Jisas, “Kandé wak, wuné wani jémbaa bénéké yawuténngé?” <sup>15</sup> Naatake det anga wandén, “Guné vésék naa. Guné nak duna musé aséké jaambiké yambak. Némaamba musé kurerékwa duna mawulé katik yé kun yaké dé. Du dakwa kulémawulé kéraae yé kunmba yarésékéyakngé, de némaamba musé aséké katik vékulakaké daré.” Naandén.

<sup>16</sup> Wunga watake det gwaaménja kundi nak anga wandén, “Néma yéwandumu nakna yaawimba asa kakému wa yé kun ye téen. <sup>17</sup> Téndéka wani yéwandumu déku mawuléké anga wandén, ‘Wuna taanngét gaa némaamba yamba kwaaké se wa. A bulaa yénga pulak yaké wuté?’ <sup>18</sup> Wunga vékulakate wandén, ‘Bulaa anga yakawutékwa. Wuna taanngét gaa akwi péraae néma gaat kurkawutékwa. Kure akwi kakému, salmu walmu wamba taakakawutékwa.’ <sup>19</sup> Taakatake wuna mawuléké wakawutékwa: Wuna asa yéku musé wa. Késépéri kaa wa téké yakwa. Témuké vékulakate bulaa yaap rakawutékwa. Wuné kulkak kakému kate dusék yarékawutékwa. Wunga wate wuné yé kunmba rakawutékwa.’ Naandén.

<sup>20</sup> “Wunga wandéka Got dat anga wandén, ‘Méné waangété du wa. Bulaa ani gaan kwa ae kiyaakaménéngwa. Kiyaaménu taakaménén musé asé akwi kandé kéraaké ya?’ Naandén Got dat.

**21** “Bulaa gunat wawutékwa. Ani képmaamba téte késépéri musé kéraae waawarkwa du dakwa de ani du pulak wa yaténdakwa. Yatéte Gotna ménimba gandéndu gandéndakwa pulak wa yaténdakwa.” Naandén Jisas.

*Baka muséké vékulakandakwa yapatéké  
wandén Jisas  
(Mt 6:25-34)*

**22** Wani kundi watake Jisas déku dunyansat anga wandén, “Wani muséké vékulakate gunat wawutékwa. Guné wup yate kulak kakému laplapké waak vékula-laakaké yambak. **23** Kulak, kakému, laplap wan baka musé wa. Néma musé yamba yé wa. Guné wani muséké vékula-laakaké yambak. Got wandéka wa yaréngunéngwa. Guna sépé guna mawulé, guna kwaminyan yatakandéka wa yaréngunéngwa. Wan néma musé wa. **24** Guné apit ma vé. De kakému yamba yaanandakwe wa. De kakému yamba kéraandakwe wa. De kakému gaamba yamba taakandakwe wa. Yandaka Got wa det kakému kwayékwa. Api wan makalkéri musé wa. Guné du dakwa wan néma musé wa. Got apit wunga kakému kwayéndu, guné anga wakan-gunéngwa. ‘Nanat waak tiyaakandékwa.’ **25** Ma véku. Guna du nak, kwaaré ras waak yaréké vékula-laakamungaæ, watake kwaaré ras waak kalmu yaréké dé, kapuk? Yamba yé wa. Déku kapmang watake kwaaré ras waak yaréké yapati-kandékwa. **26** Guné wani makalkéri musé yaké yapatite kamuké guné nak muséké vékulalaako? Guné wunga yaké yambak.

<sup>27</sup> “Guné maaweké ma vékulaka. Nané wani maawe yamba taawunangwe wa. De baka wa waaréndakwa. De jémbaa yamba yandakwe wa. De laplap yamba samapndakwe wa. Yandaka Got wa det yékun yandékwa. Det yéku nyaap wa kwayéndékwa. Talimba késépéri musé asé kure yatan néma du nak déku yé Solomon yéku laplap saawundén. Yate wani maawe saawukwa pulak yéku musé yamba saawundékwe wa. Maawe saawukwa yéku musé wa Solomon saawan yéku musat taalékérən. <sup>28</sup> Got wani maaweké kurkale vénédékwa. Wani maawe ayélap tété naankandakwa. Bulaa téndakwa. Séré kiyaakandakwa. Kiyaandaru du dakwa wani maawe péle yaamba tukandakwa. Wan makalkéri musé wa wani maawe. Guné du dakwa néma musé wa. Guné Gorké yamba yékunmba vékulaka-ngunéngwe wa. Yate wup yate wangunéngwa, ‘Nanékurkasale kalmu véché dé kapuk?’ Wunga wate bulaa ma vékulakangunék. Got maawet wunga saawutakandu véte wakanganéngwa, ‘Nanat laplap tiyaakandékwa.’ <sup>29</sup> Wunga wate guné wup yakapuk yate kanguna kakému, kanguna kulakngé, vékulaka vékulaka naaké yambak.

<sup>30</sup> “Guné wunga yaké yambak. Anjorémba rakwa du guna aapa guné wani muséké yapati-ngunéngwanngé wa vénédén. Baka yatékwa du dakwa wa wani muséké vékulaka vékulaka naandakwa. Guné de yakwa pulak wani muséké vékulaka vékulaka naaké yambak. <sup>31</sup> Ye guné Gotna kém̄ba yaale déku jémbaa yaké mawulé tawulé yakanganéngwa. Wunga yangunu dé wani musé gunat kwayékandékwa.” Naandén

Jisas det.

*Gotna gaayémba yékunmba yarésékéyakngé yandawanngé wandén Jisas  
(Mt 6:19-21)*

<sup>32</sup> Watake déku dunyansat anga wandén, “Guné wuna dunyan, guné du ayélap wa. Guna aapa Got dé mawulé tawulé yandékwa, guné déku kémba téngunu dé néma du rate gunéké kurkale vémuké. Yandéwanngé guné wup yaké yambak. <sup>33</sup> Guné guna musé asé kwayéte yewaa ma kéraae musé asékapuk du dakwat kwayéngunu. Ani képmaamba wut jaangwa yandéka sél yakwa dunyan musé asé sél yandakwa. Biyaak musé asé kérék taakundakwa. Wunga yandaru guna musé akwi késkandékwa. Guné Gotna jémbaa kutte yéku jémbaa yangunu, sérémaa Got gunat waambule kwayékatate gunat yé kun yandu guné dale yékunmba yarésékéyak-ngangunéngwa apapu apapu. <sup>34</sup> Ani képmaamba musé asé waawattékwa du dakwa de ani képmaana musé aséké wa mawulé tawulé yakandakwa. Gotna gaayémba raké vékulakakwa du dakwa de dale sékét yékunmba rasékéyakngé wa mawulé tawulé yandakwa.” Naandén Jisas.

*Néma du waambule yaamuké kaavérékwa dun-yanséké wandén*

<sup>35-36</sup> “Ma vékusék naa. Wuné waambule yaawuta nyaaké ma kurkale kaavéréngunék. Ani gwaaménja kundi ma véku. Jémbaa yakwa dun-yanna néma du dé taakwa kéraakwa duwale kakému kaké yéndén. Yéndéka déké jémbaa yakwa dunyansé déké vékulakate laplap giye

yaa yamungate déké yékunmba kaavéréndarén, dé waambule yaae pétém̄ba viyaandu de déké pété bari naapiké. Guné, wani dunyan pulak wa, wuné guna néma duké yékunmba ma kaavéréngunu. <sup>37</sup> Deku néma du waambule yaa-muké, déku jémbaa yakwa dunyan yékunmba kaavéréte de mawulé tawulé yate yékunmba rakandakwa. Deku néma du déké yékunmba kaavéré-ndarénngé vékundu déku mawulé det yékun yaké yakwa. Ye wandu rakandakwa. Randaru dékét déku kapmang jémbaa yakwa dunyanna jémbaa yate det kakému kwayékandékwa, de kurkale kandarénngé. <sup>38</sup> Dé nyéndéngan waambule yaae de kurkale kaavéréndaru véndu de mawulé tawulé yakandakwa.

<sup>39</sup> “Guné ani kundiké ma vékulaka. Gaana du sél yakwa du yaaké yakwa nyaaké vékusékmunaae, wa dé wani nyaa gaaké yékunmba séngiye kaavéré-munaandu, déku gaat katik wulaaké daré. <sup>40</sup> Guné, dé yanda pulak, guné waak ma kurkale kaavéréngunu. Guné yamba vékuséke wa. Wuné Duna Nyaan, yani nyaa waambule yaaké wuté? Vékusékngapuk yanguna nyaa wa waambule yaakawutékwa. Guné wunéké ma kurkale kaavéréngunék.” Naandén Jisas.

*Yéku jémbaa yakwa du ambét kapérandi jémbaa  
yakwa duké gwaaménja kundi wandén*  
(Mt 24:45-51)

<sup>41</sup> Jisas wani kundi wandéka Pita anga wandén, “Néman Du, nanéké méné vékulakate wani gwaaménja kundi wo, kapuk akwi du dakwaké

méné wo?” <sup>42</sup> Naandéka Jisas wa wan, “Jémbaa yakwa dunyanngé kurkale séngite kaavétékwa du yéku mawulé vékute anga yakandékwa. Déku néma du dat anga wakandékwa, ‘Méné wuna jémbaa yakwa dunyanséké séngite kaavétété det kakému ma kwayéménu.’ Naatake yéndu dé wunga yakandékwa. <sup>43</sup> Yaténdu kukmba déku néma du waambule yaae vétake wakandékwa, ‘Méné yéku jémbaa wa yaménén. Yékun wa.’ Wunga wandu dé mawulé tawulé ye yékunmba rakandékwa. <sup>44</sup> Déku néma du yandén yéku jémbaat véte wakandékwa, ‘Méné waambule yaaké yawutékwa nyaaké vékusékngapuk ye, méné yéku jémbaa wa yaménén. Yékun wa. Bulaa méné wuna akwi musé aséké yékunmba vérékaménénéngwa.’ Naakandékwa, yéku jémbaa yan duwat.

<sup>45</sup> “Kapére mawulé yate kapére jémbaa yakwa du déku mawulémba anga wakandékwa, ‘Wuna néma du nak gaayét ye bari katik waambule yaaké dé.’ Wunga wate dé jémbaa yakwa du dakwat viyaate kakému némaamba kate, waangété kulak kate, waangété yakandékwa. <sup>46</sup> Yate dé néma duké vékulakakapuk yaténdu wani sapak wa déku néma du waambule yaakandékwa. Vékukapuk yandékwa sapak wa waambule yaakandékwa. Yaae yandén kapérandi musé vétake det watakandu dé viyaandaru kiyaakandékwa. Kiyaee dé kapéremusé yan du dakwale kapérandi taalémba tékandékwa.

<sup>47</sup> “Déku néma du mawulé yandékwa jémbaaké vékusékngwa du, dé wani jémbaa yakapuk

yandu déku néma du watakandu dat némaamba viyaakandakwa. <sup>48</sup> Déku néma du mawulé yandékwa jémbaaké vékusékngapuk yan du, dé wani jémbaa yakapuk yandu déku néma du watakandu dat aal viyaakandakwa. Got du dakwa rasét késépéri jémbaa kwayéndéka késépéri jémbaa yandarénngé wa mawulé yandékwa. Got du dakwa rasét rékaamba jémbaa kwayéndéka déké rékaamba jémbaa yandarénngé wa mawulé yandékwa.” Naandén Jisas det.

*Du dakwa kémba kém kutéke randarénngé wa yaandén Jisas*  
*(Mt 10:34-36)*

<sup>49</sup> Wunga watake det anga wandén, “Wuné yaae ani képmaamba yaa pulak taakngawutékwa. Wani jémbaa yaké wa yaawutén. Wani jémbaa bari yasékéyakngé mawulé yawutékwa. <sup>50</sup> Taale néma kaangél kurkawutékwa. Anga bari kurké mawulé yawutékwa. Kure yé kunmba rakawutékwa. <sup>51</sup> Guné yéngá guné vékulako? Akwi képmaamba tékwa du dakwa waariyakapuk ye baka yé kunmba téndarénngé wuné yaak, kapuk? Yamba wa. Wuné yaanngé du dakwa ras wuna kundi vékundaru deku kém rakarka ye dele waariyakandakwa. Du dakwa ras wuné yaanngé wuna kundiké mawulé yandaru, ras wuna kundi kalik yate kémба kém kutéke tékandakwa. <sup>52</sup> Ye bulaa, sérémaa waak nakurak gaamba yarékwa du taambak, de nakpulak nakpulak mawulé yate kém vétik kutéke tékandakwa. Du kupuk nak kém pulak téndaru, du vétik nak kém pulak tékambérékwa. <sup>53</sup> Aapambéré deku dunyanngu

nyaansale waariya-kandakwa. Aasambéré deku takwanyanngu nyaansale waariya-kandakwa. Yaawumbéré deku méyaasgwale waariya-kandakwa.” Naandén Jisas de déku kundiké mawulé yandarénngé.

*Yaalaké yakwa muséké vékusék-ndarénngé  
wandén Jisas  
(Mt 16:2-3)*

<sup>54</sup> Wunga watake dale tékésén du dakwat anga wandén, “Néma wimut kutndéka vékute wangunéngwa, ‘Bulaa maas viyaakandékwa.’ Naangunéngá maas viyaandékwa. <sup>55</sup> Guné gaan kun némaamba yaale téndéka véte vékulakate wangunéngwa, ‘Séré asa nyaa wa vékandékwa.’ Wunga wangunéngá wa néma nyaa véndékwa. <sup>56</sup> Guné paapu yakwa du dakwa wa. Guné nyétmba yaalakwa musé képmaamba yaalakwa musé asat véte wangunéngwa, ‘Maas viyaakandékwa. Nyaa vékandékwa.’ Wunga wate kamuké guné yawutékwa néma jémbaa véte wunéké yamba wangunéngwe, ‘Dé nana Néman Du wa.’?” Naandén Jisas.

*Kotimngé yakwa dunyanale kundi  
bulndarénngé wandén  
(Mt 5:25-26)*

<sup>57</sup> Jisas wunga watake anga wandén, “Kamuké guné yéku muséké vékusékngapuk yo? Guné guna kapmang ma kurkale vékulake yéku muséké wangunék. <sup>58</sup> Du ras gunat kotimngé yandaru guné dele sékét yaambumba yététe dele ma kundi bule yawuréngunu. Nakurakmawulé ma

yangunu. Guné dele kundi yawurékäpuk yangunu de gunat kot vékukwa néma duké kalmu kure yéndaru watakandu kalapusmba taakaké daré? Taakanadaru guné wamba kwaasékéyokngangunéngwa. <sup>59</sup> Kot vékukwa néma du wani wandén yéwaa akwi gunat kotimngé yan duwat kwayétake, wani nyaa male kalapus yaasékatake yaale baka yékangunéngwa. Guné a wawutékwa.” Naandén Jisas.

## 13

### *Yandarén kapéremusé yaaséka-ndarénngé wandén Jisas*

<sup>1</sup> Wani sapak du ras Jisaské yaae dat anga wandarén, “Néma du Pailat wandéka déku dunyan Galili dunyan rasét viyaandéknadarén. Wani du Gorké kwaami viyaae tuwe kwayéténdaka wani sapak wa Pailatna dunyan det viyaandékwuréndarén.” <sup>2</sup> Wunga wandaka Jisas det anga wandén, “Galili dunyansé wunga kiyaandarénngé guné yénga guné vékwo? Wani dunyan némaamba kapéremusé yandaka, yandarén musé dé nak du yan kapéremusat taalékérak kapuk?” <sup>3</sup> Yamba yé wa. Guné a wawutékwa. Guné yan kapéremusé yaasékakapuk ye de kiyaan pulak guné waak wunga kiyaakangunéngwa. <sup>4</sup> Wa vékusék-ngunéngwa. Talimba Siloammba kwaan sémény gaa du rékaamba (18) tékésndarénmba vaakére det tendéknadén. Bulaa yénga guné vékwo? Wunga tendéknadén du yan kapéremusé dé Jerusalemma tékwa nak du yan kapéremusat taalékérak, kapuk yénga pulak dé? <sup>5</sup> Yamba

yé wa. Guné a wawutékwa. Guné yan-gunén kapéremusé yaasékakapuk yamunaae, wa de kiyaan pulak wa guné waak wunga kiyaakan-gunéngwa.” Naandén Jisas.

### *Sék vaakukapuk yakwa miyéké Jisas wandén*

<sup>6</sup> Wani kundi watake Jisas ani gwaaménja kundi det anga wandén, “Kwambasék pulak miyé wa du nakna wain yaawimba téen. Téndéka késépéri apu wani du yaandén, sék ras géléké we. Yaate vépatikndén. <sup>7</sup> Vépatike wani wain yaawimba jémbaa yakwa duwat anga wandén, ‘Kwaaré kupuk sék vaakukwa sékétmba wuné ani miyémba sék ras géléké we wa yaawutén. Yaae vépatikwutén. Wani miyé ma vélé. Yéku képmaamba baka katik téké dé.’ <sup>8</sup> Wunga wandéka wandén, ‘Néma du, wunga katik yaké té. Ani kwaaré waak déku mukét tékwak. Téndu wuné wani miyé maawumba képmaa vaae, képmaa yékun yandénngé bulmakauna diyé taakakawutékwa. <sup>9</sup> Taakawutu kalmu nak kwaaré sék vaakuké dé? Wunga vaakundu wan yékun wa. Vaakukapuk yandu vélékaménéngwa.’ Naandén.” Jisas wunga wandén det.

### *Yaap yaré nyaamba Jisas taakwa nakét yékun yandén*

<sup>10</sup> Yaap yaré nyaa nak Jisas Gotna kundi bulndakwa gaamba rate du dakwat Gotna jémbaaké kundi kwayéndén. <sup>11</sup> Kwayéréndéka kutakwa kulure kure yatan taakwa nak wamba yarélén. Wani kutakwa lat kulure kure yatéléka léku sépémaalé apa yakapuk yandéka léku bungul

viyékén. Yandéka lé kayéndéng téké yapatilén. Asapéri (18) kwaaré wa wunga yarélén. <sup>12</sup> Yaréléka Jisas vétake wandéka yaaléka lat wandén, “Nyéno, bulaa wa yékun yanyénén.” <sup>13</sup> Wunga watéte déku taamba wani taakwat kurké naandéka bari kayéndéng télén. Téte Gotna yé kavéréklén.

<sup>14</sup> Jisas yaap yaré nyaamba lat wunga yékun yatakandénngé Gotna kundi bulndakwa gaana néma du rakarka yandén. Ye wamba tékésén du dakwat anga wandén, “Nané jémbaa yanana nyaa taambak kaayék nakurak (6) wa. Guna sépémaalé kapére yandu gunat yékun yatakandénngé mawulé ye guné jémbaa yanangwa nyaamba ma yaangunu. Guné yaap yaré nyaamba wunga yaké yambak.” Naandén.

<sup>15</sup> Wani du wunga wandéka Jisas anga wandén, “Guné wan paapu yakwa dunyansé wa. Akwi nyaa guné yéte bulmakau, donki, tékéskwa gaamba wulaate baangwi lékuyasnyéte det kure gwaandéngunéngwa, kulak kandarénngé. Yaap yaré nyaamba waak wani jémbaa yangunéngwa.

<sup>16</sup> Abraham nana sékét gwaal waaraanga maandéka bakamu wa lé waak nané waak. Satan kéraandéka lé déku taambamba asapéri (18) kwaaré yaréléka léku bungul wa rangwa yan. Yandéka wa yaap yaré nyaamba wuné lat yékun ye lé Satanna taambamba kéraawutékwan, wan yékun wa.” Naandén. <sup>17</sup> Wunga wandéka de déku maama néketi némbat yate yakélak rakésén. Rakésndaka wamba tékésén ras du dakwa wani yandén akwi yéku jémbaaké mawulé tawulé yandarén.

*Jisas mastet sékngé gwaaménja kundi wandén  
(Mt 13:31-32; Mk 4:30-32)*

<sup>18</sup> Du dakwa wunga yandaka Jisas det anga wandén, “Got néma du rate du dakwaké kurkale véké yandékwannngé yéngá wawutu vékusékngé guné? Yéngá pulak ye déku makalkéri kém némaan ye néma kém téké dé? Wani muséké gunat wakawutékwa. <sup>19</sup> Wani kém wan miyé nakna sék pulak wa. Wani miyé sékna yé mastet wa. Mastet sék nak miyé sék pulak yamba wa. Wani miyé sék wan makalkéri sék wa. Du nak wani miyé sék kéraae yaawimba taawundén. Taawundéka wure némaan ye waare wani yaawimba tékéskwa miyat taalékérandén. Némaan ye téndéka api yaate wani miyé gaalémba kwaat séte randarén.” Naandén.

*Yiské Jisas gwaaménja kundi wandén  
(Mt 13:33)*

<sup>20</sup> Wani kundi watake anga wandén, “Got néma du rate du dakwaké kurkale vékandékwá. Wani du dakwa kulémawulé kéraae kulé du dakwa yaalakandakwa. <sup>21</sup> Wani du dakwa wan de yis pulak wa. Taakwa nak yis kéraae plauale kultolén. Kulotléka wani plaua akwi nak pulak yaalandén. Nak pulak musé yaalan pulak, Gotna du dakwa kulé du dakwa wunga yaalakandakwa.” Naandén Jisas.

*Makalkéri pétéké Jisas gwaaménja kundi wandén  
(Mt 7:13-14, 21-23)*

<sup>22</sup> Watake wani gaayé taakatake Jerusalemét yéké yandén. Yatake wani yaambumba ye

késépéri gaayét yéndén. Ye wamba némaamba du dakwat yakwasnyéndén Gotna jémxaaaké. <sup>23-24</sup> Yandéka du nak dat anga wandén, “Néman Du, késépéri du dakwa Gotna kémba wulaaké daré, kapuk ayélapkéri du dakwa male wulaaké daré?” Wunga waatakundéka wamba tékésan du dakwat anga wandén, “Apapu apapu yé kunmba yarésékéyakna du dakwa deku gaayé aatmuna pété némaan yamba wa. Wani pété makalkéri wa. Gunat wawutékwa. Guné wani pétémba wulaaké we ma apa tapa yate néma jémbaa yangunék. Némaamba du dakwa wa wani pétémba wulaaké mawulé yate wulaaké yapatindakwa. <sup>25</sup> Wani gaayéna néma du waaraape wani pété tépékandékwa. Tépéndu guné yaae kaapamba téte pétémba viyaate anga wakangunéngwa, ‘Néman Du, pété ma naapitaka nanéké.’ Wunga wangunu gunat anga wakandékwa, ‘Wuné yamba ve wa guné. Yani gaayé guné?’ Naakandékwa.

<sup>26</sup> “Wunga wandu anga wakangunéngwa, ‘Nané ménale kulak kakému wa karénanén. Méné nana gaayéna yaambumba téte nanat kundi yakwasnyéménén.’ <sup>27</sup> Wunga wangunu gunat anga wakandékwa, ‘Gunat wawutékwa. Wuné guné yaan gaayé yamba vewutékwe wa. Guné kapéremusé yakwa du dakwa wa. Guné akwi wuné yaasékatake ma yéngunu.’ Naakandékwa.

<sup>28</sup> “Wunga wandu kaapamba téte géraatékangunéngwa. Nana gwaal waaraanga maandéka bakamu Abraham, Aisak, Jekop de wani Gotna yémba talimba kundi kwayétan akwi du waak

det vékangunéngwa Gotna gaayémba rakésndaru. Véte guné wani gaayémba raké mawulé yate kaapamba téte némaamba géraaté-kangunéngwa. <sup>29</sup> Yaténgunu de nyaa yaalakwa sakumba yaana du dakwa, nyaa daawulikwa sakumba yaana du dakwa, akwi taalémba yaana du dakwa yaae Gotna gaayémba wulaae rate kakému kakan-dakwa. <sup>30</sup> Gunat a wawutékwa. Bulaa baka yarékskwa du dakwa sérémaa néma du dakwa tékéskandakwa. Bulaa ani sapak néma du dakwa tékéskwa apu sérémaa baka du dakwa tékéskandakwa.” Naandén Jisas det.

*Jisas Jerusalemma yaréksén du dakwaké néma mawulé sémbéraa yandén  
(Mt 23:37-39)*

<sup>31</sup> Wani sapak Farisi dunyan ras yaae Jisasét anga wandarén, “Galilina néma du Herot méné viyaandékngé wate yandékwa. Wunga yandékwanngé méné ani gaayé ma yaasékatake méné ma yé nak gaayét.” <sup>32</sup> Wunga wandaka det anga wandén, “Guné ye wani paapu yakwa duwat guné anga waké ya, ‘Ma véku. Jisas anga wandékwa: Bulaa, séré, kutakwa wawutu yaange yékandakwa. Baat yakwa du dakwa, sépémaalé kapére yan du dakwat waak, wuné yékun yawurékawutékwa. Nyaa kupuk yandu wuna jémbaa yasékéyak-ngawutékwa. <sup>33</sup> Bulaa, séré, maa, wuné Jerusalemét yéndakwa yaambat yékawutékwa. Talimba Gotna yém̄ba kundi kwayétan du Jerusalemma viyaandékndarén. Wuné waak Gotna yém̄ba kundi kwayétewutékwanngé wunat

Jerusalemmba viyaandék-*ngandakwa*.' Guné wuna kundi wunga Herorét ma ye wangunék." Naandén.

**34** Wunga watake wandén, "Guné Jerusalemmba tékwa du dakwa, guné Gotna yémба kundi kwayétan dunyansat viyaandékngunén. Got wandéka déku kundi kure yén dunyan gunéké wa yéndarén. Yéndaka guné det matut viyaangunéngä kiyaandarén. Wuné mawulé sémbéraa yawutékwa gunéké. Séraa léku nyaanngé yékngaat taakatépe rate deké yé kunmba vélékwa pulak, wuné apapu gunat yé kun yate gunéké yé kunmba véké mawulé yawutén. Yawutéka guné kalik yangunén.

**35** Yangunénngé sérémaa dunyan ras yaae guna gaayé yaavan kurkandakwa. Yaavan kutndaru guné katik yaréké guné. Guna gaayé baka taalé male téké yakwa. Guné wunat bari katik véké guné. Sérémaa guné wunéké anga wakangunéngwa, 'Got wandéka wa wani du yaandékwa. Nané déku yé kavérék-*nganangwa*.' Wunga wangunu wuné yaawutu vékangunéngwa. Gunat wawutékwa. Yi wan wanana wa." Naandén Jisas.

## 14

### *Maan taamba wulén duwat Jisas kururéndén*

**1** Yaap yaré nyaan nak Jisas Farisina néma du nakna gaamba kaké yéndén. Yéndéka déku gaamba rakésén dunyan vésék naaréte deku mawulémba anga wandarén, "Jisas kalmu jémbaa

yaké dé yaap yaré nyaamba? Jémbaa yamu-naandu, wan kapére wa.” Wunga wate dat vénadarén. <sup>2</sup> Yaténdaka maan taamba wulén du nak Jisasna ménimba téndén. <sup>3</sup> Téndéka Jisas wani duwat vététe apakundiké vékusékngwa dunyansé, Farisi dunyansat waak waatakundén, “Nana apakundi yénga dé wo? Yaap yaré nyaamba nané sépémaalé kapére yan du dakwa kururéké nané kapuk?” <sup>4</sup> Wunga waatakundéka de yakélak yakélak tékésén. Yandaka Jisas wani duwat kururétake wandéka dé yén. <sup>5</sup> Yéndéka det anga wandén, “Guné waak yaap yaré nyaamba jémbaa yangunéngwa. Guna nyaan nak yaap yaré nyaamba gu vékuléke téndu wani kavérémba ye vaakére daawuliye téndu bari kéraaké guné dé kapuk? Guna bulmakau yaap yaré nyaamba gu vékuléke tékwa kavérémba ye vaakére daawuliye téndu yaap yaré nyaamba dé bari kéraaké guné kapuk? Yaap yaré nyaamba kéraakanganéngwa.” Naandén. <sup>6</sup> Wunga wandéka déku kundi waambule kaataké yapatindarén.

*Deku yé kavérékngapuk yandarénngé wandén  
Jisas*

<sup>7</sup> Jisas véndén, wani kakému kaké yaan dunyan yaate néma duna taalém̄ba male raké mawulé yandaka. <sup>8-9</sup> Vétake ani gwaaménja kundi det wandén, “Du nak taakwa kéraate kakému yaake kaké yate gunat waandu guné ye kurkale ma vékulakanganék. Vékulakate néma duna taalém̄ba raké yambakate. Guné néma duna taalém̄ba ramunaangunu kalmu néma du ras kukmba yaandaru, gunat wani waan du yaae gunat

anga waké dé? ‘Guné wani yéku taalé ani duwat ma kwayéngunék.’ Wunga wandu guné nékéti némbat yate wani taalé néma duwat kwayétake guné du dakwana kuksékéyakmba rakangunéngwa. <sup>10</sup> Guné dele kakému kaké ye kurkale vékulaka naae ma du dakwana kuksékéyakmba rangunu. Wunga yangunu gunat wani waan du yaae gunat anga wakandékwa, ‘Wuna du, guné ma yaae néma duna taalémbarra.’ Wunga wandu guné ye néma duna taalémbaran gunu wani gaamba yarékéskwa dunyan de guna yé kusorékandakwa. <sup>11</sup> Ani muséké vékulakate wani muséké wa wawutékwa. Dekét deku yé kavérékngwa du dakwa sérémaa Got wandu de baka du dakwa wa tékandakwa. Deku yé kavérékngapuk yakwa du dakwa sérémaa de Got wandu néma du dakwa wa tékandakwa.” Naandén Jisas.

*De waandaru yaae dele kakému kandarénngé wandén*

<sup>12</sup> Wani kundi watake dale kakému kandénngé wani waan duwat anga wandén, “Méné kakému yaake kaké yate ména du dakwa, ména aanyémbéré, ména waayékanjet, ména du kémét, ména gaayémbarakwa yéwandumbaléndut waaké yambak, de yaandarénngé. Méné wunga dunyansat waaménu de sérémaa yaakéte ménat waandaru yéménu wani waambu kwayékata-kandakwa. <sup>13</sup> Méné wunga yaké yambakate. Méné kakému yaake kaké yate wani musé asé kurerékapuk du, sépémaalé kapére yan du, maan taamba kapére yan du, méni kiyaan duwat ma

waa, de yaandarénngé. <sup>14</sup> Wani dunyan de ménat kakému kwayékataké yapati-kandakwa. Méné det wunga yaménéngwanngé sérémaa Got ménat yé kun yakandékwa. Got wandu yéku musé yatake kiyaan du dakwa nakapuk taamale waarapngé yandakwa sapak dé ménat yé kun yandu méné yé kunmba rakaménéngwa.” Naandén Jisas.

*Néma kaawungwiya kandarénngé gwaaménja  
kundi wandén  
(Mt 22:1-10)*

<sup>15</sup> Dele rate kakému karan du nak wani kundi vékutake Jisasét anga wandén, “Gotna gaayém̄ba rate kakému kaké yakwa dunyan de yénḡa mawulé tawulé yandaru.” <sup>16</sup> Wunga wandéka Jisas wa wan, “Du nak néma paat yaakékwote we yandén. Ye késépéri duwat waandén, de yaae wani kaawungwiya kandarénngé. <sup>17</sup> Yatake kakému kandara sapak yaandéka déku jémbaa yakwa duwat wandén, talimba waandén dunyanséké ye ani kundi wandénngé, ‘Musé asé akwi kéraae waawattakananga tékwa. Guné ma yaa.’

<sup>18</sup> “Dé ye det wandéka de akwi yéké kalik yandarén. Ye du nak wa wan dat, ‘Wuné képmaa tambék kéraawutén wa. Kéraatake bulaa wanngé véké yékawutékwa. Wuné wunga katik yaaké wuté.’ <sup>19</sup> Wunga wandéka nak du wa wan, ‘Wuné jémbaa yamuké bulmakau tambavétik (10) kéraawutén wa. Kéraatake wuné a ye de yakwe vékawutékwa. Wuna jémbaa kurkale kalmu yaké daré, kapuk yénḡa pulak yaké daré? Wuné wunga katik yaaké wuté.’ <sup>20</sup> Wunga wandéka nak du wa wan, ‘Wuné bulaa kakét a taakwa

kéraaréwutékwa. Yéngä pulak ye yaawuték, taakwa kéraawuténmba?

<sup>21</sup> “De wunga wandaka dé wani jémbaa yakwa du nakapuk waambule ye déku néma duwat wani muséké wandén. Wandéka wani du rakarka yandén. Ye déku jémbaa yakwa duwat anga wandén, ‘Méné ani gaayémba rakéskwa akwi yaambumba ye méné musé asé kurerékapuk du, sépémaalé kapére yan du, méni kiyaa du, maan taamba kapére yan du det ma kure yaa.’ Wunga wandéka wani jémbaa yakwa du ye wandén pulak yandén. <sup>22</sup> Ye waambule yaae déku néma duwat wandén, ‘Néma du, wuné ména kundi vékutake waménén pulak wa yawutén. Yawutéka taalé ras baka tékwa.’ <sup>23</sup> Wunga wandéka dat anga wandén, ‘Méné akwi yaambumba, némbumba waak yéte baka du dakwat ma we kure yaaménu. We kure yaaménu wuna gaa taalé vékulékndénngé mawulé yawutékwa. <sup>24</sup> Bulaa gunat a wawutékwa. Talimba waawutén du dakwa de akwi wuna kakému katik kaké daré, De wuna kakému kandarénngé kalik yawutékwa. Néma du wunga wandén.’ Naandén Jisas.

*Kurkale vékulake déku jémbaa yandarénngé wandén*

(Mt 10:37-38)

<sup>25-26</sup> Némaamba du dakwa Jisasale yéténdaka waalakwe det anga wandén, “Guné wuna jémbaa yate wuna du dakwa raké mawulé ye guné wunéké néma mawulé ma yangunék. Guné guna aasa aapa, guna du dakwa, guna nyambalé, guna aanyé waayéka nyangenguké néma mawulé yate wunéké ayélapkéri mawulé yamunaae wuna

jémbaa katik yaké guné. Wunéké yanguna mawulé nak du dakwaké yangunéngwa mawulat taalékérandu, wa guné wuna jémbaa ye wuna du dakwa tékangunéngwa. <sup>27</sup> Guné anga wangunu, ‘Jisasna jémbaa yapéka-kanangwa. Yate kaangél kutte takwemimba kiyaananu wan baka musé wa. Wan néma musé yamba wa.’ Wunga watake guné wungat male ye wa guné wuna du dakwa tékangunéngwa. Guné wunga wakapuk ye, wunga yakapuk ye guné katik wuna du dakwa téké guné.

<sup>28</sup> “Wuna jémbaa yaké yate taale ma kurkale vékulaka. Ani kundi ma véku. Guna du nak néma sémény gaa nak kurké mawulé ye taale dé rate kurkale vékulaka-kandékwa, wani gaana yéwaaké. Kalmu wani gaa késqué dé, kure randékwa akwi yéwaamba, kapuk?

<sup>29</sup> Taale wunga kurkasale vékulakakapuk ye kwaat taawundu yéwaa késndu gaa baka kutsékéyakngapuk téndu akwi dunyan véte wasélékte waangikandakwa wani duwat. <sup>30</sup> Waangite anga wakandakwa, ‘Wani gaa baasnyé ye kutténdéka yéwaa késndéka kutsékéyakngé yapatindén.’ Naakandakwa.

<sup>31</sup> “Ani kundi waak ma véku. Néma du nak vékundén. Nak néma du déku waariyakwa dunyansale yaandarén, dele waariyaké. Vékutake dele waariyaké yate taale kamu musé yaké dé? Taale rate dé anga wakandékwa, ‘Wuna waariyakwa du ayélapkéri wa. Déku waariyakwa du némaamba wa. Yéngä pulak ye det viyaaké nané? De kalmu nanat viyaaké daré?’ <sup>32</sup> Wunga

vékulake wakandékwa, ‘Nané dele waariyaké yapati-kanangwa.’ Wunga we kurkale vékulake dé du rasét wandu de ye wani yaaké yakwa néma duwale kundi bulkandakwa, de kundi bule giye ye waariyakapuk yamuké.” Naandén. <sup>33</sup> Wunga watake Jisas det anga wandén, “Wani du yan pulak guné ma yangunék. Guné wuna jémbaa yate wuna du dakwa raké mawulé ye taale ma kurkale vékulaka. Guné guna musé asé kuk kwayétake wani muséké nakapuk katik mawulé yaké guné.” Naandén Jisas.

*Résék yakapuk yakwa solké gwaaménja kundi wandén*

(Mt 5:13; Mk 9:50)

<sup>34</sup> Jisas wunga watake anga wandén, “Ma véku. Dakwa sol yaasnyéndakwa, kakému résék yandénngé. Sol wan yéku musé wa. Sol résék yakapuk yandu yéngá pulak yandaru nakapuk résék yaké dé? Yamba wa. Nakapuk katik résék yaké dé. <sup>35</sup> Yandu kakémumba katik yaasnyéké daré. Résék yakapuk yakwa sol wan yéku musé yamba yé wa. Képmaamba yaasnyémunaandaru kakému kurkale katik waaréké dé. De wani sol baka vaanjati-kandakwa. Guné baka vaanjatin-dara sol pulak ramuké kalik ye, wani kundiké vékusékngé mawulé ye kurkasale waan taake ma kurkale vékungunék.” Naandén Jisas det.

## 15

*Lambiyakén sipsipké Jisas gwaaménja kundi wandén*  
*(Mt 18:12-14)*

<sup>1</sup> Nak nyaa takis kéraakwa dunyanale, kapéremusé yakwa du dakwa ras waak Jisas ténét yéndarén, déku kundi vékuké. <sup>2</sup> Yéndaka Farisi dunyan apakundiké vékusékngwa dunyan waak wani muséké kalik yate anga wandarén, “Wani du dé kapéremusé yakwa du dakwale yatéte dele kakému kandékwa.” Naandarén. <sup>3</sup> Wunga wandaka det ani gwaaménja kundi wandén:

<sup>4</sup> “Kalmu guna du nak anga yaké dé? Du nak sipsip dumi taambak (100) kureréndén. Kuréréndéka nak lambiyakén. Yandéka ras sipsip yéku taalémba taakandéka téte katéndaka det yaasékatake ye wani lambiyakén nakurak sipsipké waakndén. Waake waake véndén. <sup>5</sup> Vétake kéraae déku taanmba taake yaate mawulé tawulé yalakét yéndén. <sup>6</sup> Ye gaayémba saambake du dakwat wandéka yaae jaawundarén. Jaawundaka det anga wandén, ‘Guné wunale ma mawulé tawulé yangunék, wuna sipsip nak lambiyakndéka waake ve kéraawuténngé.’ Naandén det.”

<sup>7</sup> Wunga watake Jisas anga wandén, “Gunat wawutékwa. Wunga yandén pulak Gotna kundi kure gaayakwa du mawulé yakandakwa. Yéku musé yate Gotna ménimba kurkasale yarékwa némaqamba du dakwaké Gotna kundi kure gaayakwa dunyansé mawulé yakandakwa. Kapéremusé yan du wani yandén kapéremusé

yaasékandu Gotna kundi kure gaayakwa dunyansé mawulé tawulé yakandakwa.” Jisas kapéremusé yakwa du dakwale téndéka dunyan ras dat waarendaka det wunga wandén.

*Lambiyakén yéwaaké Jisas gwaaménja kundi wandén*

<sup>8</sup> Wani kundi watake Jisas det gwaaménja kundi nak waak anga wandén, “Kalmu guna taakwa nak anga yaké lé? Lé yéwaa tambavétik (10) kure yarélu nak lambiyakndu lé téwaayénngéra yavéréke taake gaa yaakwe taapiye waake waake wani yéwaa vekalékwa.

<sup>9</sup> Ve kéraae wani gaayémba yarékwa du dakwat waalu yaae jaawukandakwa. Jaawundaru det wakalékwa, ‘Guné wunale ma mawulé tawulé ya, wuna yéwaa nak lambiyakndéka waake ve nakapuk kéraawuténngé.’ Wunga det wakalékwa.” <sup>10</sup> Wunga watake Jisas det anga wandén, “Gunat wawutékwa. Wunga yalén pulak Gotna kundi kure gaayakwa dunyan mawulé yakandakwa. Kapéremusé yakwa du wani yandén kapéremusé yaasékandu, de Gotna kundi kure gaayakwa dunyansé mawulé tawulé wa yakandakwa.” Naandén Jisas.

*Naléwuré biyaku du nak déku aapat yaasékatake yéndénngé Jisas gwaaménja kundi wandén*

<sup>11</sup> Watake Jisas gwaaménja kundi nak anga wandén: “Du nak nyaan vétik kureréndén.

<sup>12</sup> Kukmba kéraandén nyaan bérku aapat anga wandén, ‘Méno, sérémaa kiyaaménu aané ména musé asé kéraakatékwa. Kéraamuké wa ménat

wawutékwa. Ména yéwaa, musé asé muniye wunat tiyaaké waménén musé asé bulaa male wunat ma tiyaaménu.’ Naandén. Wunga wandéka déku yéwaa, akwi musé asé muniye bérét kwayéndén. <sup>13</sup> Kwayéndéka déku wani kukmba kéraan nyaan yaré yaré naae déku musé asé akwi nak duwat kwayéte yéwaa kéraandén. Kéraae kure sékaamba tékwa gaayé nakét yéndén. Ye wani gaayémba yaréte déku yéwaa akwi yaasnyéwuréndén, yandén kapérandi musé asémba. <sup>14</sup> Yaasnyéndéka déku yéwaa akwi késndéka yaréndéka kukmba wani gaayémba néma kaandé yan. Yandéka dé kakémuké yapatindén. <sup>15</sup> Yapatiye ye wani gaayémba yaran du nakmba jémbaa yandén. Yaténdéka wandéka ye déku baalat kakému kwayétendén. <sup>16</sup> Akwi du dakwa dat kakému yamba kwayéndakwe. Yandaka kaandale yaréte baalé wani kakwa kakému kaké wate yandén.

<sup>17</sup> “Wunga yate déku mawulémba vékulakandén. Vékulakate anga wandén, ‘Wuna aapaké jémbaa yakwa akwi dunyan de asa kakému wa kandakwa. Kandaka biyaa yandéka kakému ras baka tékwa. Téndéka wuné amba yaréwutéka wunat asa kaandé wa yandékwa. <sup>18</sup> Yénga yakét, a waaraape wuna aapaké waambule yékawutékwa. Ye dat anga wakawutékwa: “Wuné Gorét kapéremusé wa yate, ménat waak kapéremusé wa yawutén. <sup>19</sup> Yawuténngé vékulakate méné wunat, ‘Wuna nyaan wa,’ naaké yamarék. Yéku musé yakwa nyaan ramunaawutu wunat wunga

wakatik méné. Kapéremusé yawuténngé méné wunat anga ma wa, ‘Wuna jémbaa yakwa du wa.’ Naaménu wuné ména jémbaa yakwa dunyanale ména jémbaa yakawutékwa.” Wunga wakawutékwa wuna aapat.’ <sup>20</sup> Wunga watake déku aapaké waambule yéké mawulé ye yaambumba yéndén.

“Wani du ye awula apakmba yaaténdéka déku aapa dat vénédén. Véndéka déku mawulé sémbéraa yan déké. Sémbéraa yandéka pétépété ye déku nyaanét kaarangwe méni réng taama réng yandén. <sup>21</sup> Yandéka déku nyaan wa wan dat, ‘Aapa, wuné Gorale ménale bénat wa kapéremusé yawutén. Yawuténngé vékulakate méné wunéké, “Wuna nyaan wa,” naaké yambak. Yéku musé yakwa nyaan yarémunaawutu wunat wunga wakatik méné.’ Naandén.

<sup>22</sup> “Wunga wandéka déku aapa déku jémbaa yakwa dunyansat waandéka yaandaka det anga wandén, ‘Wuna nyaan a waambule yaan. Wuné déké mawulé tawulé yawutékwa. Guné yéku laku laplapét ma bari kéræe kure yaae dat gitakan-gunu. Yate ring déku taambamba kusolatakate su déku maanmba saawutaka. <sup>23</sup> Yatake guné wulén bulmakau nyaanét nak ma kure yaae viyaangunu. Viyaae yaake katéte mawulé tawulé yate dusék yakanangwa. <sup>24</sup> Wuné déké wuna mawulémba anga wawutén, “Dé wa kiyaan.” Wunga waréwutéka bulaa dé wa waambule yaan. Talimba anga wawutén, “Dé wa lambiyakén.” Wunga watake bulaa vénanén yaandéka. Vétake waambule yaandénngé nané kate mawulé tawulé

yakanangwa.' Wunga wandéka déké mawulé tawulé yate kakému kure yaae waawatndarén.

**25** "Wani duna néma nyaan dé yaawimba téen. Te kukmba waambule yaae gaamba saambakngé yatéte vékundén kaang viyaate kétindaka. **26** Vékutake jémbaa yakwa du nakét waandéka yaandéka dat anga waatakundén, 'De kamu musé daré yo?' **27** Wunga waatakundéka wani jémbaa yakwa du wa wan, 'Ména waayéka naka-puk waambule yaandéka wa ména aapa déké mawulé tawulé yate wandéka wulén baan bulmakau nyaan nak wa viyaandarén. Viyaae katéte wa mawulé tawulé yandakwa.' **28** Wunga wandéka néma nyaan dé rakarka ye wulaaké kalik yandén. Yandéka déku aapa ye gwaande dat gaat wulaandénngé wandén. **29** Wandéka aapat anga wandén, 'Ma véku. Késépéri kwaaré wa wuné baka jémbaa yakwa du pulak ména jémbaa yawutén. Yate ména kundi kurkasale wa vékuwutén. Ména kundi nak yamba kalik ye kuk kwayéwutékwe. Yawuténngé méné wunat yéku musé nak yamba tiyaaménéngwe wa. Meme nyaan nak yamba tiyaaménéngwe, wuna du dakwale kate mawulé tawulé yananénngé. **30** Wunga pulak makal musé wunat tiyaakapuk ye ména nak nyaan waambule yaandéka déké mawulé tawulé yate wulén baan bulmakau wa viyaaménén. Dé ména musé asé, yéwaa wani yaambumba yatékéskwa dakwat kwayéte akwi yéwaa yaasnyéwuréndén. Wunga yandénngé méné déké mawulé ye wulén baan bulmakau nyaanét wa viyaaménén, de kate mawulé tawulé

yandarénnngé.’ Naandén.

<sup>31</sup> “Wunga wandéka aapa wa wan, ‘Nyaan, apapu nyaa gaan aané vétik male a yarétékwa. Wuna akwi musé asé wan ména musé male wa. <sup>32</sup> Ména waayéka dé ye késépéri kwaaré wa nak taalém̄ba yaténdén. Yaténdéka wuna mawuléké anga wawutén, “Dé lambiyakék, kapuk dé kiyaak?” Wunga wate vékulakaréwutéka dékét bulaa waambule yaandéka wa vénanén. Wanngé vékulakôte mawulé yate mawulé tawulé yakanangwa yékun wa.’ Aapa déku néma nyaanét wunga wandén.” Naandén Jisas.

Jisas kapéremusé yakwa du dakwale téndéka du ras waarundaka wa wani gwaaménja kundi kupuk det wandén.

## 16

*Muséké séngiye vététe yékunmba vékulakan duké gwaaménja kundi wandén Jisas*

<sup>1</sup> Kukmba Jisas déku dunyansat ani gwaaménja kundi wandén: “Du nak némaamba yéwaa saawule ran duna muséké séngite véténdén. Yaténdéka du ras yaae wani néma duwat déku muséké wani séngite vétékwa duké anga wandarén, ‘Ména muséké vététe tékwa du dé kurkasale yamba jémbaa yandékwe wa. Yate ména yéwaa nak du dakwat baka kwayéndékwa.’ Naandarén. <sup>2</sup> Naandaka déku muséké wani séngite vétékwa duwat wandéka yaandéka dat anga waatakundén, ‘Ménéké vékuwutén kundi ras yénga pulak dé? De wa wakwa, méné kurkasale jémbaa yakapuk yate wuna yéwaa

nak du dakwat baka kwayéménéngwanngé. Yéku kundi daré wo, kapuk papukundi daré wo? Méné wuna musé, wuna yéwaa akwi naakiye nyéngaamba viyaae wani nyéngaa wunéké ma kure yaa. Yatake méné wuna jémbaa nakapuk katik yaké méné.’ Naandén.

<sup>3</sup> “Wunga wandéka dé wani muséké séngite vétékwa du déku mawuléché anga wandén, ‘Wuna néma du dé wuné déku muséké nakapuk séngite vétéwuténngé kalik yandékwa. Bulaa kamu yaké wuté? Wuné kaambi vaaké yamba apamama yawutékwe. Wuné nak duwat yéwaaké yaawimuké wup yawutékwa. <sup>4</sup> A vékulakawutén. Nak pulak ye wuna néma du déku jémbaa yaasékatake yéwuténngé wandu ye de wuna dunyansé yaréte wandaru wuné déku gaamba wulaae dele yarékawutékwa.’ <sup>5</sup> Naatake déku néma dumba yéwaa kéraan dunyansat waandéka de nak nak yaandarén. Yaandaka taale yaan duwat anga wandén, ‘Méné wuna néma dumba musé katik méné kéraak? Katik kwayékataké méné?’ <sup>6</sup> Wunga wandéka wandén, ‘Némaamba (100) kulak tékwa néma aké.’ Wunga wandéka muséké séngite vétékwa wani du dat anga wandén, ‘Wani musé akwi kwayékataké yambak. Kwayékataké yéwaaké viyaandén nyéngaa dé a rakwa amba. Méné rate bari nak kundi nak wani nyéngaamba ma viyaa. Méné ayélapkéri (50) male ma viyaaménék.’ Naandén.

<sup>7</sup> “Wunga watake nak duwat wandén, ‘Méné wuna néma dumba musé katik méné kéraak? Katik kwayékataké méné?’ Wunga wandéka wandén, ‘Késépéri (100) bek wit.’ Naandéka

wandén, ‘Wani musé akwi kwayékataké yambak. Kwayékataména yéwaaké viyaandén nyéngaa dé a rakwa amba. Méné nak kundi nak wani nyéngaaamba ma viyaa. Ayélapkéri (80) male ma viyaaménék.’ Naandén. <sup>8</sup> Wunga wandéka yandéka kukmba wani néma du kundi vékundén, déku muséké séngite vétékwa du, du vétik bét dat kukmba yékun yambérénngé, wunga paapu yandéka. Vékutake wandén, ‘Yéki. Wani kapéremusé yakwa du déku sépat yékun yaké watake wa yékunmba vékulakandén.’ Déki wunga wandén.”

Wani kundi watake Jisas déku dunyansat anga wandén, “Anga vékuséknangwa. Ani képmaana muséké mawulé yakwa du deku sépéché male vékulakandakwa. Vékulakate de nak du dakwat yékun yandakwa, de waambule yakatate det yékun yandakwanngé. Wunga yate yékunmba vékulakandakwa. Wani muséké deku yéku mawulé Gotna du dakwana yéku mawulat wa taalékérandékwa.

<sup>9</sup> “Gunat a wawutékwa. Guné yéku jémbaa yakangunéngwa guna yéwaale, ani képmaana nak musale waak. Guné wani musé asale jémbaa yate du dakwat yékun yangunu de guna du dakwa rakandakwa. Randaru sérémaa guné kiyaee Gotna gaayémba wulaae yékunmba rakan-gunéngwa.

<sup>10</sup> “Makalkéri jémbaa yékunmba yakwa du dakwa de néma jémbaa waak yékunmba yakan-dakwa. Makalkéri jémbaa sépélak yakwa du dakwa de néma jémbaa waak sépélak yakan-dakwa. <sup>11</sup> Guné ani képmaana yéwaaké jémbaa

sépélak aapélak yare yéngä pulak Gotna muséké jémbaa yékunmba yaké guné? Yamba wa. Gotna muséké jémbaa yékunmba yaké yapati-kangunéngwa. <sup>12</sup> Guné nak duna muséké jémbaa sépélak yare yéngä pulak ye Got gunat rapékakwa musé kwayéké dé? Yamba yé wa. Katik kwayéké dé.

<sup>13</sup> “Du nak néma du vétikngé jémbaa yaké yapati-kandékwa. Wunga jémbaa yare, wa dé nak néma duké mawulé tawulé yate nak baanngé kalik yakandékwa. Guné wani du pulak wa yaréngunéngwa. Guné néma du Gorké jémbaa yate déké male vékulaka-munaare, wa guné déké apapu mawulé tawulé yakan-gunéngwa. Yate guné yéwaa kéraaké katik vékulakaké guné. Guné apapu apapu yéwaa kéraaké male vékulakamunaare, wa guné néma du Gorké wa kalik yakangunéngwa.” Naandén Jisas det.

*Moses wan apakundiké wate Gotna kémngé waak wandén*

<sup>14</sup> Farisi dunyansé wani kundi vékutake yéwaaké néma mawulé yate Jisasét wasélékndarén. <sup>15</sup> Yandaka det anga wandén, “Guné duna ménimba apapu yéku musé yangunéngwa, de gunat véte anga wandarénngé, ‘Guné yéku musé yakwa apu wa.’ Naandarénngé wunga yangunéngä Got guna mawulé wa véndén. Guna mawulé yékun tékapuk yandéka véte wa gunat kuk kwayéndékwa.

<sup>16</sup> “Talimba Moses ani képmaamba yaténdén sapakmba yaae yaae baptais kwayétan du Jon

yatan sapak waak akwi du dakwa de Moses wan apakundi vékute Gotna yém̄ba kundi kwayétan duna kundi waak vékute wandén pulak wa yandarén. Bulaa wuné du dakwat waak wa wawutén, Got néma du rate du dakwaké yékunmba véké yandékwannge. Wawutéka némaamba du dakwa wa déku kém̄ba yaalaké wate néma jémbaa wa yandakwa. <sup>17</sup> Moses wan apakundi katik késké dé. Sérémaa nyét béré képm̄aa késndu wani kundi katik késké dé. Yamba yé wa.” Naandén Jisas.

*Dunyan deku taakwa kewuréndaru yéndarénnge katik waké daré*

(Mt 5:31-32; 19:9; Mk 10:11-12)

<sup>18</sup> “Dunyan deku taakwa kewuréndaka yéndaka nak taakwa kéraandakwan wa de kukmba kéraandakwa taakwale kapéremusé wa yandakwa. Dunyan deku taakwa kewuréndaka yéndaka nak du wani taakwa kéraandakwan de wani taakwale kapéremusé wa yandakwa.” Naandén.

*Némaamba musé kure yaran du ambét Lasarus*

<sup>19</sup> Wani kundi watake Jisas anga wandén det, “Talimba némaamba musé kure yaran du nak yaréndén. Déku waayékanje taambak (5) yaréndarén. Akwi nyaa dé yéku yéku siot yéku gwaavé laplap waak saawundén. Yate akwi nyaa yéku yéku kakému kandén. <sup>20-21</sup> Musé asé kurerékapuk du nak waak yaran. Déku yé Lasarus. Apapu nyaa déku du wa dat yaataate yéndarén wani némaamba musé kure yaran duna gaat. Yaate kure yéte gaa péttale

taakandaka kwaaréndén. Déku sépé waasémama wurésape téndéka apapu waasa ras wa yaate déku waasémba biyaakndarén. Dé némaamba musé kure yaran duna gaa péttale kwaate wani du kakému kandéka wani képmaamba vaakére rakéskwa kélá kakému kaké wa mawulé yandén.

<sup>22</sup> “Kukmba dé wani gandéndu Lasarus kiyaan. Kiyaandéka Gotna kundi kure gaayakwa du dé kure ye Abrahamale taakandarén. Yandaka dé wani némaamba musé kure yaran du waak kiyaandéka rémndarén. <sup>23</sup> Yandaka dé ye wani yaa yaanpékatékwa taalémba téte kaangél kutténdén. Kuttéte yaasawure véndén Abraham Lasarusale anjoré kulémba rambéréka. <sup>24</sup> Vétake némaanmba waandén, ‘Wuna gwaal waarranga maandéka bakamu Abraham, ani taalémba yaa wuna sépémbe yaandéka wuné asa kaangél a kuréwutékwa. Kuréwutékwanngé méné wunéké ma mawulé sémbéraa yate Lasarusét waménu dé kulak ras kure yaae wuna tékiyalémba taakandu.’ Naandén.

<sup>25</sup> “Wandéka Abraham wa wan, ‘Méno, méné ma vékulaka. Talimba képmaamba téte asa yéku yéku musé wa kure téménén. Yatéménénga Lasarus wunga yamba yandékwe wa. Déké kapérandi musé male yaan. Bulaa dé yéku taalémba yékunmba randéka méné kapérandi taalémba téte kaangél wa kuttéménéngwa. <sup>26</sup> Ani muséké waak ma vékulaka. Aané rakwanale méné rakwanale nyéndémba Got néma kaambi nak taakandéka wa tékwa. Yandéka amba rakwa du méné rakwanét yéké naate yapatindakwa.

Wamba rakwa du waak anga yaaké yapatindakwa.' Naandén Abraham.

**27-28** "Wani kundi vékute némaqmba musé talimba kure ran du wa wan, 'Wunga ye wunéké vékulákaké yambak. Wuna waayékanje taambak (5) wa ani yaréndakwa wuna aapana gaamba. Méné wuna gwaal waarranga maandéka bakamu, ménat waatakutékwa. Lasarusét ma waménu deké yéndu. Ye det ani rawutékwa kapérandi taaléké kundi kwayéndu. De waak ani taalat yaae néma kaangél ka kutndara.'

**29** Wunga wandéka Abraham wa wan, 'Yamba wa. Moses wan apakundi, Gotna yém̄ba kundi kwayétan duna kundi waak Gotna nyénḡaamba wa kwaakwa. Wani kundi véte de yénḡa vékusékndaru.' Naandén Abraham.

**30** "Wani kundi wandéka Abrahamét anga wandén, 'Wuna gwaal waarranga maandéka bakamu, yamba wa. De deku kundi katik vékuké daré. Kiyaan du nak taamale waarape ye det saapéndu, wa vékukandakwa. Vékute wani yandarén kapérandi musé yaaséka-kandakwa.' Naandén. **31** Wunga wandéka Abraham wa wan, 'De Moses wan apakundi Gotna yém̄ba talimba kwayétan duna kundi waak vékukapuk ye de kiyaee taamale waarapén duna kundi waak katik vékuké daré.' Naandén Abraham." Jisas wunga wandén det.

## 17

*Yandakwa kapérandi muséké Jisas wandén  
(Mt 18:6-7, 21-22; Mk 9:42)*

<sup>1-2</sup> Jisas déku dunyansat anga wandén, “Anga vewutén wa. Sérémaa du dakwa ras Gotna kundi yaasékatake kapéremusé yakandakwa. Paapu yakwa dunyan ras yaae wandaru Gotna kundi vékukwa du dakwa deku kundimba vékwe Gorét kuk kwayémunaandaru, néma kapéremusé wunga wan dunyanngé wa yaaké yakwa. Wunga waké yakwa dunyansat taale deku kwaalémba néma matut giye vaanjandandaru de anda solwaramba kulak ke kiyaamunaandaru, wan kapére wa. De wandaru Gotna kundi vékukwa du dakwa deku kundi vékute Gorét kuk kwayémunaandaru, Got wunga wan dunyansat yandarén kapérandi musé, némaanmba wa yakatandékwa. Wan néma kapérandi musé wa.

<sup>3</sup> Guné wani duké ma jéraawu yangunu.

“Du nak kapéremusé yamunaandu dat ma waarrungunu. Waarrungunu wani yandén kapéremuséké kalik yate yaaséka-munaandu guné nakapuk wani muséké vékulakaké yambak. <sup>4</sup> Dé nakurak nyaamba kapéremusé apu taambak kaayék vétik (7) gunat yatake gunat yaae anga wamunaandu, ‘Wani gunat yawutén kapéremuséké kalik yate bulaa wani musé yaasékawutékwa.’ Wunga wamunaandu apapu ma wangunék, ‘Wani yaménén kapéremuséké nakapuk katik vékulakaké nané. Dékumukét yéngä yakét.’ Wunga guné waké ya.”

*Gorké yékunmba vékulaka-ndarénngé wa Jisas wandén*

<sup>5</sup> Jisasna kundi kure yékwa dunyansé dat anga wandarén, “Néman Du, méné nanat ma yékun yaménu nané Gorké yékunmba

vékulakate ména jémbaaké kurkale vékuséknganangwa.”<sup>6</sup> Wunga wandaka Néman Du Jisas anga wandén, “Guné Gorké yé kunmba vékulakangunéngwa mawulé makal ramunaandu guné néma jémbaa yakangunéngwa. Amba tékéskwa miyat ma vé. Guné Gorké yé kunmba vékulakangunéngwa mawulé makalkéri miyéna sék pulak makalkéri male téndu, ani miyé bétngiale saape ye solwaramba daawulindénnngé Gorét waamunaangunu, ani miyé saapuwe ye solwaramba daawulikandékwa.” Naandén Jisas.

### *Jémbaa yandarénnngé wa wandén Jisas*

<sup>7</sup> Wani kundi watake Jisas det anga wandén, “Guna du nak déku jémbaa yakwa du képmaa vaatémunaae, sipsipké séngiye kaavétémunaae, garambu jémbaa yasékéyaktake déku néma duna gaat yéndu kalmu dat anga waké dé? ‘Méné ma yaa. Bari rate kakému katu.’ Naaké dé?<sup>8</sup> Katik wunga waké dé. Wa anga wakandékwa, ‘Wuna kakému ma yaakéménu. Ye kakému saakwe wunéké ma kure yaa. Kure yaaménu wuné taale kawutu méné kukmba kaménu.’ Néma du wunga wakandékwa, déku jémbaa yakwa du wat.<sup>9</sup> Wandu déku jémbaa yakwa du wunga yandu, wani néma du wani muséké déku jémbaa yakwa duna yé yéngá pulak kavérékngé dé? Dé déké jémbaa yakwa du wa.<sup>10</sup> Guné wani jémbaa yakwa du pulak Gotna jémbaa ma yangunu. Yate ma wangunu, ‘Nané baka jémbaa yakwa du wa téngangwa. Got tiyaan jémbaa wa yanangwa. Yananén jémbaaké guné nana yé katik kavérékngé guné.’ Wunga ma wangunu.” Naandén Jisas det.

*Jisas wandéka lepro yan dunyansé tambavétik  
(10) yékun yandarén*

<sup>11</sup> Jisas Jerusalemét yéndakwa yaambumba yéndén. Samaria distrik aangakmba téndéka Galili distrik aangakmba tén. <sup>12</sup> Jisas nyéndémba ye gaayé nakmba saambakndéka de wani lepro yan dunyansé tambavétik (10) de yaambumba apak awulaka téte véténdarén dat. <sup>13</sup> Vête némaanmba anga waandarén, “Néma du, Jisas, nanéké ma mawulé sémbéraa yaménu.” <sup>14</sup> Naandaka det yaasatiye véte anga wandén, “Guné ma ye Gotna gaamba jémbaa yakwa duwat guna sépé wakwasnyéngunu.” Naandéka de déku kundi vékutake yéténdaka deku sépé nakapuk yékun yan. <sup>15</sup> Yandéka wani du nak déku sépé yékun yandéka vétake nakapuk waambule yaandén. Yaae némaanmba waate Gotna yé kavérékndén. <sup>16</sup> Kavérékte Jisasna maanale kwaati se waandé daate Jisaské mawulé tawulé yate déku yé kavérékndén. Wani du dé Samaria du wa. <sup>17</sup> Yandéka Jisas wani duwat vétake wandén, “Du tambavétik (10) wa deku sépé yékun yan. Du taambak kaayék vétik vétik (9) yamba daré to? <sup>18</sup> Kamuké dé nakurak male wani nak gaayémba yaan du dékét déku kapmang waambule yaak, Gotna yé kavérékngé?” <sup>19</sup> Naatake wani duwat anga wandén, “Méné wunéké yékunmba vékulakate ménat yékun yaké apamama yawutékwannngé wate méné bulaa wa yékun yaménéngwa. Méné ma waaraape yé.” Naandén Jisas, wani duwat.

*Got néma du rate du dakwaké yékunmba*

*vékwater yandékwangé wandén*

*(Mt 24:23-28, 37-41)*

**20** Farisi du ras Jisasét anga waatakundarén, “Yani sapak Got néma du rate du dakwaké yé kunmba véké dé?” Waatakundaka det anga wandén, “Got néma du rate du dakwaké yé kunmba véké yandékwa sapak yaandu guné katik véké guné. **21** Yangunu du dakwa anga katik waké daré, ‘Ma vé. Got deku néma du rate amba wa randékwa.’ Wunga katik waké daré. Yandaru nak du dakwa anga katik waké daré, ‘Ma vé. Got deku néma du rate, wani taalém̄ba wa randékwa.’ Wunga katik waké daré. Got néma du rate awula guna mawulém̄ba wa randékwa.” Naandén.

**22** Wani kundi watake Jisas déku dunyansat anga wandén, “Sérémaa guné Duna Nyaan wuné véké mawulé yakangunéngwa. Ye wunat katik véké guné. **23** Wani sapak du ras gunat anga wakandakwa, ‘Ani duwat ma vé. Duna Nyaan a rakwa.’ Naandaru ras wa waké yakwa, ‘Yamba yé wa. Wamba wa randékwa.’ Naandaru guné deku kundi vékumarékate. De paapu wa yandakwa. **24** Wuné Duna Nyaan waambule gaayawutu akwi du dakwa vékandakwa. Nyétm̄ba kusnyérak yandék̄a akwi du dakwa vén̄dakwa pulak, wa guné akwi wuné gaayawutu vékangunéngwa. Wunga vémuké vékute, guné deku paapu yan-dakwa kundiké vékuké yamarékate. **25** Taale a tékwa du dakwa wunat kapérandi musé yate wunat kuk kwayékandakwa.

**26** “Talimba Noa yatan sapak du dakwa yan pulak, Duna Nyaan wuné waambule yaawuta

sapak du dakwa wungat male yakandakwa. <sup>27</sup> Noa yatan sapak du taakwa de Gorké yamba vékundakwe. De ani képmaana musé aséké male vékulaka-téndarén. Vékulakatéte kakému kandarén, kulak kandarén, taakwa kéraandarén, wunga yaténdaka Noa dékét néma sip ye dé wani sipmba wulaandén. Wulaandéka néma gu yaale vékulékndéka kulak ke kiyaatondarén. <sup>28</sup> Talimba Abrahama waayéka déku nyaan Lot yatan sapak waak Sodommba tan du dakwa wungat male wa yatéte téndarén. De Gorké vékukapuk yate ani képmaana muséké male vékulaka-téndarén, musé yandarén, musé asé kwayéndarén, kakému yaanandarén, gaa kaandarén, wunga yaténdarén. <sup>29</sup> Yaténdaka Lot Sodom yaasékatake yéndén. Yéndéka wani nyaamba male néma yaa matuale maas viyaakwa pulak wunga vaakétté akwi du dakwat kélé bélawe viyaae yaavan kutndén. <sup>30</sup> Wani du dakwa yan pulak, wuné Duna Nyaan gaayawuta sapak du dakwa wungat male wa yakandakwa. De wunéké vékukapuk yate, deku muséké male vékulaka-téndaru wa gaayakawutékwa. Gaayawutu vékandakwa.

<sup>31</sup> “Wani nyaa kaapamba rakwa du dakwa ma bari yaange yéndarék. Deku musé asé kéraaké deku gaat nakapuk katik wulaaké daré. Baka ma yaange yéndarék. Yaawimba ye tékwá du dakwa gaayét waambule ye deku laplap katik kéraaké daré. Bari ma yaange yéndarék. <sup>32</sup> Guné Lotna taakwaké ma vékulaka. Talimba léku gaayé véké waalakwe wa kiyaalén. Guné waalakukapuk ye baka yaange ma yéngunu. <sup>33</sup> Du dakwa wuna jémbaa yaténdaru wuna

maama det viyaandékndaru de apapu apapu yé kunmba rasékéyak-ngandakwa. Du dakwa wuna jémbaa yakapuk yate, dékét deku sépéké male vékulakate, deku jémbaa male yamunaate, wa de kiyaae akwi yalambiyak-ngandakwa. Katik kurkale rapékaké daré.

<sup>34</sup> “Gunat anga wawutékwa. Waambule yaaké yawutékwa sapak du vétik nakurak jaambém̄ba kwaambér̄u Gotna kundi kure gaayakwa du nakét kéraate nak yaaséka-kandékwa. <sup>35</sup> Wani sapak taakwa vétik kakému kéraae waawa-trémbér̄u Gotna kundi kure gaayakwa du nakét kéraate nak yaaséka-kandakwa. <sup>36</sup> [Wani sapak du vétik yaawimba jémbaa yarémbér̄u Gotna kundi kure gaayakwa du nakét kéraate nak yaaséka-kandakwa.]” Naandén.

<sup>37</sup> Wani kundi wandéka vékutake déku dun-yansé wa wan, “Néman Du, wani musé yamba yaké dé?” Naandaka Jisas det anga wandén, “Kwaarkandi yaae wuréngwandéndaka vétake wangunéngwa, ‘Kwaami nak amba wa kiyaae rakwa.’ Naangunéngwa. Wani musé véte wangunéngwa pulak, guné wawutén musé véte, anga ma wangunék, ‘A yaakandékwa.’ Naangunék.” Jisas det wunga wandén.

## 18

### *Taakwa kot vékukwa néma duwat waalénngé wandén*

<sup>1</sup> Jisas ani gwaaménja kundi det anga wandén. De Gorét waatakumuké saalakukapuk yandarénngé det anga wandén. De

Gorét waataku-pékaréndaru dé deku kundi vékundénngé det ani gwaaménja kundi wandén. <sup>2</sup> Anga wandén, “Néma gaayémba kot vékukwá néma du nak yaréndén. Wani du dé Gorké wup yakapuk yate dé du dakwaké waak yamba vékulakandékwe wa. <sup>3</sup> Du kiyaan kwawitakwa nak wani gaayémba yarélén. Yaréte apapu nyaa kot vékukwá néma duké yéte, dat apapu anga walén, ‘Wuna maama wunat yaavan kurké wate yandékwa. Yandékwangé méné wunat yékun yaké méné, kapuk yénga pulak yaké méné?’ <sup>4</sup> Naaléka wani du wa wan, ‘Yamba wa.’ Naatake lat yékun yamuké taale kalik yandén. Yandéka apapu yéte yéte dat waatakuléka kukmba déku mawulémba vékulake anga wandén, ‘Wuné Gorké wup yakapuk yate, du dakwaké waak yamba vékulakawutékwe wa. <sup>5</sup> Yate wani taakwa apapu nyaa wunat yaate yaate waataku male, waataku male yamuké wuné saalaku yawutékwa. Lé wunga yate wuna mawulé yaavan kurkapuk yamuké, wuné léku kundi vékute lat yékun yakawutékwa.’ Kot vékukwá néma du wunga wandén.” Naandén Jisas.

<sup>6-7</sup> Néman Du Jisas wani kundi watake det anga wandén, “Guné kot vékukwá néma duké ma vékulaka. Dé kapéremusé yakwa du téte wani taakwana kundi vékuténdén. Wani muséké vékulakate, vékusék-nganganéngwa. Got yéku musé male yakwa du rate, dé déku du dakwana kundi vékukandékwa. De apapu nyaa gaan det yékun yandénngé waatakute, dat waataku male, waataku male yamunaandaru, wa dé deku

kundi vékukandékwa. <sup>8</sup> Vékute det bari yé kun yakandékwa. Wunga véte vékusékngunénngé gunat wawutékwa. Guné ma vékulaka. Sérémaa wuné Duna Nyaan ani képmaat waambule gaaye Gorké yé kunmba vékulakakwa du dakwat véké wuté kapuk?” Naandén Jisas.

*Farisi du ambét takis kéraakwa duké gwaaménja kundi wandén*

<sup>9</sup> Jisas wa vésékndén. Du dakwa ras deku mawulémba anga wandarén, “Nané Gotna ménimba yéku du dakwa a té nangwa. Ras du dakwa déku ménimba gaandé yan du dakwa wa téndakwa.” Naatake yamba yé kunmba vékulakandakwe wa. <sup>10</sup> Wunga vésékte det ani gwaaménja kundi wandén: “Du vétik Gorale kundi bulké we Gotna kundi bulndakwa néma gaat waarémbérén. Wani du vétik nak Farisi du wa. Nak takis kéraakwa du wa. <sup>11</sup> Farisi du waare dékét kapmang téte Gorét anga wandén, ‘Méno Got, wuné yéku du yatéwutékwánngé, ména yé kavérékwutékwa. Wuné ras du dakwa yakwa pulak yakapuk yate, wuné ménat waatakutékwa. De ras duna muséké mawulé yandakwa, paapu yandakwa, du ras duna taakwale kapéremusé yandakwa, wunga yate kapéremusé wa yandakwa. Wuné a tékwa takis kéraakwa du kapéremusé yakwa pulak, yamba yawutékwe wa. <sup>12</sup> Wuné akwi wikmba nyaa vétik kakému kakapuk baka yaréwutékwa. Yaréte kéraawutékwa akwi musé tambavétikmba (10) muni waatake nak tambék ménat kwayéte tambék taambak kaayék vétik vétik (9) wunéké taakawutékwa.’ Naandén. <sup>13</sup> Wunga wandéka dé

wani takis kéraakwa du awula apak téndén. Téte wani yandén muséké nékéti yatéte, nyérét yamba yaasore véndékwe wa. Ye waandé daae Gorét anga wandén, ‘Méno Got, wuné kapéremusé yakwa du a. Wunéké ma mawulé sémbéraa yaménu.’ Naandén.”

<sup>14</sup> Wani kundi watake Jisas det anga wandén, “Gunat wawutékwa. Takis kéraakwa du yan kapéremusé Got wa yasnyéputindén. Yasnyéputindéka dé Gotna ménimba yéku du yare yékun yéndén dékét déku gaat. Farisi du dé Gotna ménimba yéku du yamba yaréndékwe wa. Deku yé kavérékngwa du dakwa, sérémaa Got wandu, de baka du dakwa tékandakwa. Deku yé kavérékngapuk yakwa du dakwa sérémaa Got wandu, de néma du dakwa tékandakwa.” Jisas det wunga wandén.

*Jisas makalkéri nyambalésat yékun yandén  
(Mt 19:13-15; Mk 10:13-16)*

<sup>15</sup> Du dakwa makalkéri nyambalésé Jisaské kure yéndarén, det taamba kutte deké Gorét waatakundénngé. Kure yéndaka de Jisasna dunyan véte det waarundarén. <sup>16</sup> Waarundaka Jisas wani nyambalésat waandén, déké yaandarénngé. Waatake déku dunyansat anga wandén, “Makal nyambalésé ma taaka de wunéké yéngä yaandaru. Yaandaru guné det watépéké yambak. Gotna kém̄ba tékwa du dakwa de wani makal nyambalésé pulak wa. <sup>17</sup> Got néma du rate déku du dakwaké kurkale vékandékwa. Dé wunga yaké yandékwangé makal nyambalésé mawulé yandakwa. Makal nyambalé yakwa pulak, du

dakwa deké kurkale véké yandékwangé mawulé yamunaae, wa de déku kémba yaalakandakwa. Makal nyambalé yakwa pulak mawulé yakapuk yakwa du dakwa de déku kémba katik yaalaké daré.” Naandén Jisas det.

*Néma du nak némaamba musé kureréte Jisasale bulndén*  
*(Mt 19:16-30; Mk 10:17-31)*

<sup>18</sup> Némaamba musé kure yaran néma du nak Jisasét anga wandén, “Méné yéku du wa. Gotna jémbaaké nanat yakwasnyé-ménengwa. Méné ma wa wunat. Kamu ye wuné kulémawulé kéraae apapu apapu kurkale yarépékaké wuté?”  
<sup>19</sup> Naandéka Jisas wa wan, “Kamuké méné wunat, ‘Yéku du,’ wo? Dékét Got nakurak wa yéku du randékwa. <sup>20</sup> Got wandéka Moses wan apakundi wa vékuménén. Vékute méné vékuték naaké ya. ‘Méné nak duna taakwale kapéremusé yambak. Du dakwat viyaandékngé yambak. Sél yaké yambak. Nak du dakwat paapu yaké yambak. Ména aapa aasat ma yé kun yaménék.’ Moses wani kundi wandéka wa vékuménén.” <sup>21</sup> Wunga wandéka wandén, “Wuné makalnyan yaréwutén sapak wani apakundi vékuwutén. Ani sapak waak a vékuwutékwa.” <sup>22</sup> Naandéka wandén, “Méné anga waak ma ya. Méné taakaménén musé asé akwi nak duwat kwayéte yéwaa kéraae yéwaa kure yarékapuk du dakwat ma kwayé. Kwayéménú sérémaa Got ménat yé kun yandu méné Gotna gaayét ye wamba yé kun mba rapéka-kaménengwa. Méné yéwaa kure yarékapuk du dakwat yéwaa kwayétake waambule yaae wuna

jémbaamba ma yaala.” <sup>23</sup> Wunga wandéka wani kundi vékutake dé némaamba yéwaa kure yare nak du dakwat kwayémuké kalik yandéka déku mawulé kapére yan.

<sup>24</sup> Jisas wani duwat véte anga wandén, “Rékaamba musé kure yarékwa du dakwa de yakélak yare Gotna kémба katik yaalaké daré. De apamama ye wa néma jémbaa yakandakwa Gotna kémба yaalamuké. <sup>25</sup> Ani kundi waak ma véku. Néma bulmakau nak laplap samapndakwa raaményna yaambumba wulaaké mawulé yaamunaae, apamama wa yakandékwa. Rékaamba musé kure yarékwa du dakwa Gotna kémба yaalaké mawulé yate de ma apa tapa yapékandarék.” <sup>26</sup> Wunga wandéka de wani kundi vékutake wandarén, “Rékaamba musé kure yarékwa du dakwa Gotna kémба wulaaké wate apa tapa yamunaandaru yénga pulak musé kure yarékapuk du dakwa Gotna kémба wulaae kurkale rapékaké daré apapu apapu? Yamba wa. Gotna kémба wulaaké ypati-kandakwa.” <sup>27</sup> Naandaka wandén, “Du dakwa dekét deku kapmang apamama yate Gotna kémба yaale yé kunmba raké yapatindakwa. Got nakurak wa wani muséké apamama yandékwa. Got akwi musé yaké wa apa tapa yandékwa.” Naandén Jisas.

<sup>28</sup> Wani kundi wandéka Pita anga wandén, “Ma véku. Nané nana gaa nana akwi musé waak yaasékatake nané ména jémbaa yate ménale yeyé yaayaténangwa.” <sup>29-30</sup> Naandéka Jisas wa wan, “Yi wan wanana wa. Ma véku. Wunéké

yé kun mba vék ulakak wa du dak wa Got na jémbaa yaké wata ke deku gaa, du, taak wa, aanyé, waayéka, aasa, aapa, nyambalé yaasé kandar u Got bulaa det yé kun yandu yé kun mbaa-sékeyak yaré péka-kandak wa apapu apapu. Yi wan wanana wa.” Naandén Jisas det.

*Jisas nakapuk wandén kiya ae nakapuk taamale  
waarapké yandékwann ngé*  
(Mt 20:17-19; Mk 10:32-34)

<sup>31</sup> Jisas déku dunyansé tambavétik maan mba kaayék vétik (12) det anga wandén, “Ma véku. Bulaa Jerusalemét wa arénang wa. Waarénanu Got na yémba kundi kwayéton du Duna Nyaan wunéké Got na nyénga amba viya andar én kundi sékérék- ngandé kwa. Yi wan wanana wa. <sup>32</sup> Jerusalemm ba wunat nak gaayéna dunyansat kwayéndar u wuné deku taambamba rakawuté kwa. Rawutu wunat wasélék te kapérandi kundi wate sépmany sévaate kapérandi musé yakandak wa. <sup>33</sup> Yate wunat raamény baang wit viya ae wuné viya andé k- ngandak wa. Yandar u kiya awutu nyaa vétik yéndu kupuk yamban mba nakapuk taamale wa arap- kawuté kwa.” Naandén. <sup>34</sup> Wunga wandéka déku dunyan wani kundi kurkale yamba vékundak we. Got wani musé paakundéka de Jisas wani wan kundiké yamba yé kun mba vék ulakandak we wa.

*Jisas méni kiya an du wat kururéndén*  
(Mt 20:29-34; Mk 10:46-52)

<sup>35</sup> Jisas déku dunyansale sékét ye Jerikomba saambakngé yaténdar én. Yaténdaka méni kiya an du nak yaambumba rate du dak wat yé waaké yaawiréndén. <sup>36</sup> Yaawire vékundén néma amba

du dakwa yéndaka. Vékutake dunyan rasét waatakundén, "Wa kamu daré yo?" <sup>37</sup> Naandéka dat wandarén, "Nasaret du Jisas dé a yaakwa." <sup>38</sup> Naandaka waandén, "Méno, Devitna gwaal waaranga maandéka bakamu Jisas, ma véku. Méné Devit pulak néma du téte wunéké ma mawulé sémbéraa yaménu." Naandén.

<sup>39</sup> Wunga waandéka de taale yétan du dat wandarén, "Yakélak ra." Naandaka yamba randékwe yakélak. Nakapuk waate wandén, "Méno, Devitna gwaal waaranga maandéka bakamu, wunéké ma mawulé sémbéraa yaménu." Naandén.

<sup>40-41</sup> Wunga wandéka Jisas det wandén, "Dé ma kure yaa wunéké." Naandéka dé ye Jisas ténmba saambakndéka dat waatakundén, "Wuné ménat kamu yawuténngé méné mawulé yo?" Waatakundéka wandén, "Néman Du, wuné véché mawulé yawutékwā." <sup>42</sup> Naandéka dat wandén, "Ménat kururéké yawutékwā mayé apaké yékunmba vékulaka-ménéngā wa bulaa méná méri yékun yan. Bulaa ma véménu." <sup>43</sup> Wunga wandéka déku méri nakapuk bari yékun yandéka véndén. Vététe Jisasale yéte dé waak Gotna yé kavérékndén. Yandéka wani musé vén du dakwa de waak Gotna yé kavérékndarén.

## 19

### *Sakius Jisaské yékunmba vékulakandén*

<sup>1</sup> Jisas Jerikot wulaandén. Wulaae nak gaayét yéké we yaambumba yéndén. <sup>2</sup> Takis kéraakwa du nak déku yé Sakius wani gaayémba yaréndén.

Dé takis kéraakwa duna néma du téte asa yéwaa wa taakaténdén. <sup>3</sup> Dé Jisas vésékngé mawulé yandén. Dé pavéték du wa. Késépéri du dakwa yatékésénmba Jisas véké naae yapatindén. <sup>4</sup> Yapatiye taale pétépété ye miyé nakmba waaréndén Jisas véké. Jisas ani yaambumba yaakandékwa. Wunga vékulakate miyém̄ba waaréndén. <sup>5</sup> Waare téndéka Jisas yaae wani taalémba téte yaasore vététe dat wandén, “Sakius, bulaa ménale ména gaamba rakawutékwa. Méné ma gaaya bari.” <sup>6</sup> Wunga wandéka dé mawulé tawulé yate bari gaayandén. Ye Jisas déku gaat kure yéndén. <sup>7</sup> Yéndéka akwi du dakwa véte wandarén, “Jisas kapéremusé yakwa duwale raké wa yéndékwa, déku gaat. Wan kapére wa yandékwa.” Naandarén.

<sup>8</sup> Sakius Néman Du Jisasét wandén, “Néman Du, ma véku. Bulaa wuné wuna musé nyéndémba munikawutékwa. Muniye nak tambék musé asékapuk dunyansat kwayékawutékwa. Kwayéte anga waak yakawutékwa. Wuné talimba du rasét paapu yate deku musé kéraawuténngé musé det nakapuk waambule kwayéte apu kupuk waak baka kwayékawutékwa.” Naandén. <sup>9-10</sup> Wunga wandéka Jisas wa wan, “Ani du waak dé Abrahamna gwaal, waaranga, maandéka, bakamu wa téndékwa. Talimba yatéte Gorké yékunmba vékulakakapuk ye dé wa lambiyakén. Bulaa guné déku kundi vékute anga wa vékusékngunéngwa. Bulaa Got dat déku gaamba rakwa du dakwat waak Satanna taambamba wa kéraandén. Kéraandén apu de déku taambamba yékunmba

rapéka-kandakwa. Lambiyakén du dakwaké waake véte de Satanna taambamba kéraae det yékun yaké watake wa wuné Duna Nyaan ani képmaat gaayawutén.” Naandén Jisas det.

*Jémbaa yan du yéwaa kéraanngé gwaaménja  
kundi wandén  
(Mt 25:14-30)*

<sup>11</sup> Jisas ye Jerusalemma saambakngé yaténdén. Yaténdéka du dakwa deku mawuléché anga wandarén, “Got néma du rate nanéché kurkale vérénda nyaa bari wa yakandékwa.” Wunga wandaka Jisas det gwaaménja kundi nak anga wandén. <sup>12-13</sup> “Néma du nak sékāa gaayét yéké watake, taale déku jémbaa yakwa dunyansé tambavétik waandéka yaandaka det nak nak yéwaa ras kwayéndén (20 kina, 20 kina pulak). Kwayéte det anga wandén, ‘Ani yéwaa kure jémbaa yaréngunu wuné nakapuk waambule yaae kéraakawutékwa.’ Naatake sékāa gaayét yéndén, wamba rakwa néma du dat wandu déku gaayém̄ba tékwa du dakwaké néma du randénngé. Ye wani kundi vékwe bari waambule yaaké vékulakandén. <sup>14</sup> Dé yéndéka de wani déku gaayém̄ba yaran du dakwa de dé kalik yate, dunyan rasét wandaka déku kukmba yéndarén. Ye wani sékāa gaayém̄ba ran néma duwat anga wandarén, ‘Nané wani du nana néma du randénngé kalik yanangwa.’ Naandarén.

<sup>15</sup> “Kukmba wani néma du wani duwat wa wandén, déku gaayém̄ba tékwa du dakwaké néma du randénngé. Wandéka vékutake yare nakapuk waambule yaandén. Yaae wandén, ‘Talimba

yéwaa kwayéwutén duwat ma waa yaandaru. Wani kwayéwutén yéwaamba kure ye jémbaa ye katik yéwaa daré kéraak?’

**16** “Naandéka du nak taale yaae dat anga wandén, ‘Néma du, wuné ména yéwaa kure ye jémbaa ye rékaamba (200) yéwaa kéraawutén.’

**17** Naandéka néma du dat wandén, ‘Méné yéku jémbaa yakwa du wa. Yéku jémbaa wa yaménén. Méné makalkéri muséké wa kurkale véménén. Véménénngé wuné wawutu méné gaayé tambavétikngé (10) néma du rakaménénngwa.’

**18** “Naandéka nak du waak yaae wandén, ‘Néma du, wuné ména yéwaa kure ye jémbaa ye yéwaa rékaamba (100) ras wanale kéraawutén.’

**19** Wunga wandéka wani néma du wa wan, ‘Wan yé kun wa. Bulaa wawutu méné gaayé taambakngé (5) deku néma du rakaménénngwa.’

**20-21** Naandéka nak du yaae wandén, ‘Néma du, wuné méné véwutén wa. Méné du dakwaké mawulé yamba sémbérraa yaménénngwe wa. Méné musé asé waak baka kéraaké mawulé yate, méné nak du dakwat yé kun yamba yaménénngwe wa. Wuné ménéké wup ye wani wunat tiyaaménén yéwaa laplapmba giye baka taakawutén. Ména yéwaa a rakwa amba. Bulaa nakapuk ménat kwayékawutékwa.’ Naandén.

**22** “Naandéka wani néma du anga wandén, ‘Méné kapérandi jémbaa yakwa du wa. Waménén kundi vékutake yaménén kapéremusé ménat yakata-kawutékwa. Wuné apamama yate nak du dakwat mawulé sémbérraa yakapuk yate musé asé waak baka kéraaké mawulé yate, wuné

nak du dakwat yamba yékun yawutékwe wa. Yi wan wanana wa. Wa waménén. Wunga yawutékwānngé wa vésékménén. <sup>23</sup> Vésékte kamuké méné wuna yéwaa wani yéwaa taakandakwa gaamba taakakapuk yak? Méné wamba taakamunaaménu, wa wuné waambule yaae wani yéwaa kéraate ras waak wanale kéraakatik wuté.’ <sup>24</sup> Naatake wamba tékésén dunyansat wandén, ‘Guné dat kwayéwutén yéwaa ma kéraae némaamba yéwaa kure rakwa duwat kwayéngunu. Wani jémbaa yakwa du dé wani kwayéwutén yéwaa kure ye yéku jémbaa wa yandén.’ Naandén.

<sup>25</sup> “Wunga wandéka dat anga wandarén, ‘Néma du, kamu yakwate méné yo? Dé asa yéwaa wa kure randékwa.’

<sup>26</sup> “Naandaka det wandén, ‘Yéku jémbaa ye némaamba musé kéraan du dakwa sérémaa musé ras waak kéraakandakwa. Yéku jémbaa yakapuk ye musé ayélap kure rakéskwa du dakwa sérémaa kukmba baka wa rakéskandakwa. <sup>27</sup> Wuna maama wuné deku néma du rawuténngé kallik yandarénngé guné det ma kure yaae wuna ménimba de viyaandékngunu.’ Naandén néma du.” Wunga wandén Jisas.

*Jisas néma du rate Jerusalemét wulaandén  
(Mt 21:1-11; Mk 11:1-11; Jo 12:12-19)*

<sup>28</sup> Jisas wani kundi watake dé taale ye déku dunyansale Jerusalemét waaréndakwa yaambumba waaréndarén. <sup>29-30</sup> Waare Betfage tékwan Betani waak tékwan ye kwambalitédarén. Wani gaayé vétik Oliv némbumba wa témbérékwa, Jerusalem

tékwamba. Vétake saambakngé yatéte Jisas déku du vétikét wandén, “Wani gaayét ma wulaambénu. Wulaae vékambénéngwa donki nyaan nak. Miyém̄ba lékitakandaka wa téndékwa. Talimba du nak déku kukmba yamba waare randékwe wa. Dé ma lepékwe kure yaambénék. <sup>31</sup> Yambénu du nak anga waatakumunaandu, ‘Kamu yaké béné wani donki nyaan lepékwo?’ Naandu anga ma wambénu, ‘Néman Du wani donkiké mawulé yandékwa.’ Dat wunga wa.” Naandén.

<sup>32</sup> Wandéka déku kundi vékutake ye vémbérén donki miyém̄ba lékitakandaka téndéka. <sup>33</sup> Vétake wani donkina baangwi lepékumbéréka de wani donkina aapa yaae bérét waatakundarén, “Kamu yaké béné wani donki nyaan lepékwo?” <sup>34</sup> Naandaka wambérén, “Néman Du wani donkiké mawulé yandékwa.” <sup>35</sup> Naambéréka de mawulé yate wandaka wani donki nyaan Jisaské kure yémbérén. Ye bérku laplap ras donkina bungulmba kusorétaka-mbéréka Jisas wan taakumba randén.

<sup>36</sup> Wani donkimba waare yéndéka du dakwa deku laplapét yaambu yakusote vélésaki-laakét yéndarén. <sup>37</sup> Vélésaki-takandaka ye Oliv némbu taakatake daawuliye Jerusalemba saambakngé yaténdéka wani déké yé kunmba vékulakakwa du dakwa akwi déké mawulé tawulé yate dusék tak-wasék yandarén. Yate talimba wani vékupuk yandarén kulé apanjém̄ba véndarénnngé vékulakate némaanmba waate Gotna yé kavérékndarén. Yate anga wandarén:

<sup>38</sup> “Nana néma du nanéké wa yaandékwa.

Néman Du Got wandéka wa yaandékwa. Wan yékun wa.

Got dat yékun yéngä yandu.

Gotna gaayém̄ba tékéskwa du dakwa mawulé tawulé yate yékunmba yarékandakwa.

Nané mawulé tawulé yate anjorém̄ba rakwa du Gotna yé ma kavérékngwak.” Naandarén.

<sup>39</sup> Farisi dunyan ras wani du dakwale te vékutake Jisasét anga wandarén, “Néma du, méné ména du dakwat ma wa. De wunga némaamba waaké yambak.” <sup>40</sup> Naandaka det wandén, “Günat anga wawutékwa. De kundi bulkapuk yamu-naandaru, wa matu dekét de wuna yé kavérékngandakwa.” Naandén Jisas det.

### *Jisas Jerusalemma tékwa du dakwaké géraandén*

<sup>41</sup> Jisas ye Jerusalemma saambakngé yatéte gaayét vétake wamba tékwa du dakwaké mawulé sémbéraa yate géraandén. <sup>42</sup> Géraate anga wandén, “Bulaa guné Gorale nakurakmawulé ye raké vékusék-munaangunu, wan yékun yakan. Bulaa wani musé paakundéka yamba yékunmba vésékngunéngwe wa. <sup>43-44</sup> Got gunat yékun yate Satanna taambamba guné kéraandékwa nyaaké yamba kurkale vékusékngunéngwe wa. Yangunéngwanngé sérémaa guna maama yaae guna gaayé yanyaweye tékandakwa. Téte képm̄aa vaae yénguna yaambumba taakatépé-kandakwa. Yate gaayét wulaae gunat, guna nyambalésat waak viyaandék-ngandakwa. Viyaandékte akwi gaa yaavan kutwurékandakwa. Yaavan kutndaru gaa

kaangunén matu akwi vaakére kapmang kapmang ye rakandakwa.” Naandén Jisas.

*Gotna kundi bulndakwa néma gaamba dunyansé kewurésalendén*

(Mt 21:12-17; Mk 11:15-19; Jo 2:13-22)

**45-46** Jisas ye Jerusalemét wulaae Gotna kundi bulndakwa néma gaat wulaandén. Wulaae véndén dunyan ras musé asé kwayéte yéwaa kéraaténdaka. Vétake de kewurésalete anga wandén, “Ani kundi Gotna nyéngaamba wa kwaakwa: ‘Got wa wandén, “Du dakwa wuna gaan yaale wunale kundi bulkandakwa.” Naandén Got.’ Wani kundiké yamba vékulakangunéngwe wa. Guné ani gaamba Gorale yamba bulngunéngwe wa. Guné a musé asé kwayéte yéwaa kéraaténgunéngé ani gaa an sél yakwa du paakwe rakwa gaa pulak a gérékén.” Naandén det.

*Gotna kundi bulndakwa néma gaamba kundi kwayéndén*

**47** Apapu nyaar Gotna kundi bulndakwa néma gaamba du dakwat Gotna jémbaaké yakwasnyéndén. Yandéka Gotna gaamba jémbaa yakwa dunyanna néma dunyan, apakundiké vékusékngwa dunyan, néma du ras waak anga wandarén, “Yéngé pulak dé viyaandékngé nané?” **48** Wunga wate bulte akwi du dakwa déké mawulé yate déku kundi vékuké wate yandarénmba dé viyaandékngé yapatindarén.

## 20

*Jisasét waatakundarén, “Kandé wak wani jémbaa yaménénngé?”*

*(Mt 21:23-27; Mk 11:27-33)*

<sup>1</sup> Nak nyaa Jisas Gotna kundi bulndakwa néma gaamba téte du dakwat Gotna jémbaaké yakwasnyététe Gotna kundi kwayéndéka Gotna gaamba jémbaa yakwa dunyanna néma dunyan, apakundiké vékusékngwa dunyan, Israelna maaka dunyan, wunga déké yaandarén. <sup>2</sup> Yaae dat anga wandarén, “Kamu mayé apa kéraae méné wani jémbaa yo? Kandé wak wani jémbaa yaménénngé?” <sup>3</sup> Naandaka det wandén, “Wuné waak gunat kundi nak waatakukwate yawutékwa. Guné wunat ma wa. <sup>4</sup> Kandé Jonét wak dé du dakwat baptais kwayéndénngé? Got dé wak, kapuk ani képmaana du nak dé wak?” <sup>5</sup> Wunga waatakundéka dekét deku kapmang bulte anga wandarén, “Nané anga wamunaananu, ‘Got wa wunga wan.’ Naamunaananu nanat anga wakandékwa, ‘Kamuké guné déku kundi vékukapuk yo?’ <sup>6</sup> Anga wamunaananu, ‘Ani képmaana du nak wa wan.’ Wunga wamunaananu akwi du dakwa vékute nanat rakarka yate nanat matut viyaakandakwa. Jonngé anga wandakwa, ‘Gotna yémba kundi kwayétan du nak wa. Yi wan wanana wa.’ Wunga wandakwa.” Naandarén.

<sup>7</sup> Wunga bule paapu yate Jisasét anga wandarén, “Yamba vékuséknangwe wa. Wani muséké katik waké nané.” <sup>8</sup> Wunga wandaka det

wandén, “Wuné waak katik waké wuté, wunat wandéka yaae ani jémbaa yawutékwa duké.” Naandén.

*Jisas gwaaménja kundi wandén wain yaawiké kaavéte séngiran dunyanséké  
(Mt 21:33-46; Mk 12:1-12)*

<sup>9</sup> Wani kundi watake du dakwat ani gwaaménja kundi wandén; “Du nak wain yaawi nak yandén. Ye wain miyé taawundén. Ye wain yaawiké séngite yaawimba jémbaa yate yéwaa kéraaké mawulé yan dunyansat kwayéndén. Kwayétake dé nak taalat yén. Ye wamba kwaaré késépéri yaténdén. <sup>10</sup> Yaténdéka miyé sék géléké yandakwa sékét yaaké yandéka dale yaréte déku jémbaa yakwa du nakét wandén, dé wani yaawiké kaavéte séngirékwa duké yéndénngé. Dé miyé sék ras kwayéndaru kure yaandénngé mawulé yandén. Ye wandéka déku jémbaa yakwa du yéndéka de wani yaawiké séngirékwa dunyansé déku kundi yamba vékundakwe. Yate wani duwat viyaae kewuréndaka baka male waambule yaandén. <sup>11</sup> Yaandéka déku jémbaa yakwa nak duwat wandéka yéndén. Yéndéka dat waak wungat male viyaae kapére ye kewuréndaka baka male waambule yaandén. <sup>12</sup> Yaandéka déku jémbaa yakwa du nak duwat wandén. Wandéka dé waak yéndéka dat viyaae kapére ye kaapat vaanjendarén.

<sup>13</sup> “Yandaka waambule yéndéka wani yaawina néma du wa wan, ‘Wuné yénga pulak yaké wuté? Wuné wuna mawulé tawulé yawutékwa nyaanét wawutu yékandékwa. Dé ye wandu

kalmu déku kundi vékuké daré?’<sup>14</sup> Naatake wandéka déku dunyanngu nyaan yén. Yéndéka de wani yaawiké séngiran dunyan vétake dekét deku kapmang bulte anga wandarén, ‘Yaawina néma du kiyaandu wani nyaan wa déku aapana musé asé akwi kéraaké yakwa. Nané dé viyaandéktake ani yaawi kéraakanangwa.’<sup>15</sup> Naatake yaawi taakatake dé baka taalat kure gwaande dé wamba viyaandékndarén.” Wunga watake Jisas det anga wandén, “Guné yénga guné vékulako? De wunga yandarénnge wani yaawina néma du yénga yaké dé?<sup>16</sup> Dé yaae wani wain yaawiké séngirékwa dunyansat viyaandékwuré-kandékwa. Viyaatake wani wain yaawi nak duwat kwayékandékwa, de wani yaawiké séngiréndarénngé.” Naandén Jisas.

Wamba tékésén du dakwa wani kundi vékute wandarén, “Yamba yé wa. Dé wunga katik yaké dé.”<sup>17</sup> Naandaka Jisas det véte wandén, “Gotna nyéngaaamba ani kundi wa kwaakwa: Gaa kaakwa du yéku matuké waakte matu naku-rakngé kalik yatakandaka baka randén.

Randéka Got wani matut vétake wandén, ‘Wan yéku matu wa. Wani matu randu gaa yékunmba kwaakandékwa.’ Naatake wani matu kéraae taakandéka yékunmba kwaandén gaa.

<sup>18</sup> Wani kundiké gunat waatakuwutékwa. Kandéké dé wo? Wani matu taakumba du nak vaakétmunaandu déku sépé maalé maan taamba akwi ayélap ayélap yaké yakwa. Wani matu du nakna sépétakumba vaakétmunaae wani duwat takunyémndu képmaamba gérék yakandékwa.”

Naandén Jisas det. Wani matuké wunga wate dékét déké wa wandén.

*Takis kwayéndakwanngé Jisasét waatakundarén  
(Mt 22:15-22; Mk 12:13-17)*

**19** Wani kundi wandéka de apakundiké vékusékngwa dunyan, Gotna gaamba jémbaa yakwa dunyanna néma dunyan de waak wa vékundarén, Jisas dekét deké wa wani kundi wandén. Vékutake dat bari kulkiye kure yéké yandarén. Yare du dakwa kalik yate det waarumuké we wup ye wa dé yamba kutndakwe. **20** Ye dé kulkindara nyaaké kaavéréndarén. Yate deku mawulémba anga wandarén, “Paapu yakwa dunyan dale kundi bulte késmu nakmuké dat waatakundaru kalmu waambule wate kapérandi kundi ras waké dé? Wandu dé kotimnganangwa. Kotime dé Romna néma duwat kwayékanangwa.” Naatake dunyanét ras yéwaa kwayéndarén, de paapu ye dale kundi bulndarénngé.

**21** Wani paapu yakwa dunyansé yaae Jisasét anga wandarén, “Néma du, méné det Gotna jémbaaké yakwasnyé-ménéngwa. Méné yéku kundi male wate det Gotna kundiké yékunmba yakwasnyéménéngwa. Méné nakurak kundi male waménéngwa néma du dakwa, baka du dakwat waak. Wunga wanangwa véte. **22** Méné wunga yate bulaa ma wa nanat. Nana apakundi yénga dé wo? Nané Romna néma duwat takis kwayéké nané, kapuk yamba yé?” **23** Naandaka Jisas wa vékusékndén. De deku mawulémba anga

wandarén, “Dé bulaa kapérandi kundi wandu dé kotimnganangwa.”

<sup>24</sup> Wunga wandaka Jisas vékusékte det anga wandén, “Wani takis kwayéngunéngwa yéwaa nak ma wakwasnyé wunat véwutu.” Naandéka wani yéwaa nak kure yéndarén déké. Kure yéndaka det wandén, “Ani yéwaamba kwaakwa nyaap an kéné nyaap dé? Kéné yé daré ani yéwaamba viyaatakak?” Wunga waatakundéka wandarén, “Wa Romna néma du Sisarnan wa.” <sup>25</sup> Naandaka det wandén, “Yi wan wanana wa. Romna néma du Sisarna musé dékét dat ma kwayéngunu. Gotna musé dékét Gorét ma kwayéngunu.” Naandén. <sup>26</sup> Wunga wandéka de déku kundiké vékulaka vékulaka naandarén. De du dakwana ménimba téte wa wani kapérandi kundiké dé kotimngé wate ye yapatikndarén. Dé kapérandi kundi yamba wandékwe wa. Yapatiye wa kundi bulkapuk vékulék naandarén.

*Du kiyaae taamale waarapké yandakwanngé  
Jisasét waatakundarén*

(Mt 22:23-33; Mk 12:18-27)

<sup>27-28</sup> Sadyusi dunyansé deku mawulémba anga wandakwa, “Kiyaan du dakwa nakapuk katik taamale waarapké daré.” Naandakwa. Yandaka de ras Jisaské ye anga wandarén, “Némán Du, méné du dakwat Gotna jémbaaké wa yakwasnyé-ménéngwa. Méné ani muséké ma wa nanat. Talimba Moses anga viyaatakandén: Du nak taakwa kéraae nyaan kéraakapuk ye baka kiyaamunaandu, déku waayéka wani taakwa kéraakandékwa. Ye nyaan kéraalu wani nyaanngé

wakandékwa, ‘Wuna aanyéna nyaan wa.’ Naakandékwa. Moses wunga viyaatakandén. <sup>29</sup> Bulaa ma véku. Talimba nakurak kém̄ba du taambak kaayék vétik (7) yaréndarén. Aanyé taakwa kéraae nyaan kéraakapuk baka kiyaandén. <sup>30</sup> Kiyaandéka déku waayéka wani taakwa kéraae nyaan kéraakapuk ye dé waak kiyaan. <sup>31</sup> Kiyaandéka nak waayéka wani taakwa kéraae nyaan kéraakapuk ye dé waak kiyaan. Kiyaandéka akwi waayékanje wungat male ye de akwi nyaan kéraakapuk yate baka kiyaatondarén. <sup>32</sup> Yandaka yaak wani taakwa lé waak kukmba kiyaan. <sup>33</sup> Bulaa méné nanat ma wa. Kiyaan du dakwa nakapuk taamale waaraapndara sapakngé waménéngwa. Wani sapak lé wani taakwa kéné taakwa raké lé? Talimba wani nakurak kémna aanyémbéré waayékanje de akwi lat male kéraandarén.” Sadyusi dunyansé Jisasét wunga waatakundarén.

<sup>34</sup> Waatakundaka Jisas deku kundi vékutake det anga wandén, “Bulaa ani sapakmba tékeskwá du dakwa anga yandakwa. Dunyan taakwa kéraandakwa. Dakwa du kumbindakwa. <sup>35</sup> Sérémaa Got wan du dakwa kiyaee taamale waaraape dunyan taakwa kéraakapuk yandaru, dakwa waak de katik du kumbiké daré. <sup>36</sup> Got wandu de déku nyambalésé wa rakandakwa. De Gotna kundi kure gaayakwa dunyansé pulak rakandakwa. Gorale yaréte nakapuk katik kiyaaké daré. <sup>37</sup> Kiyaan du dakwa nakapuk taamale waaraapké yandakwanngé wa Moses wandén. Wandéka wani muséké wa vékuséknangwa. Makalkéri miyé yaa

yaanénngé wate wa ani kundi Gotna nyéngaamba viyaatakandéka wa vékungunén: Néman Du Got wan Abraham, Aisak, Jekop béra Got wa. Dé deku néma du wa randékwa.<sup>38</sup> Moses talimba wani kiyaan duké viyaatakandén kundi wa vénanén. Got kiyaan du dakwana néma du yamba randékwe wa. Got baka kulé tékwa du dakwana néma du wa randékwa. Got wan du dakwa wa kiyaan du dakwa yamba wa. Got wan du dakwa wa kiyaae taamale waaraape rakéskwa du dakwa wa. Wunga vékuséknangwa.” Naandén Jisas.

<sup>39</sup> Naandéka de apakundiké vékuséknangwa dunyan ras dat anga wandarén, “Néma du, yéku kundi wa waménéngwa.”<sup>40</sup> Wunga watake dat waambule waatakumuké wup ye nak kundi waak yamba wandakwe wa.

*Jisas det waatakundén Got wan du Kraiské  
(Mt 22:41-46; Mk 12:35-37)*

<sup>41</sup> Wani nyaa Jisas det anga wandén, “Apakundiké vékuséknangwa dunyan anga wandakwa, ‘Gunat yé kun yandénngé Got wan du Krais Devitna gwaal waaraanga maandéka bakamu dé.’ Kamuké daré wunga wo?<sup>42-43</sup> Talimba Devit Kraiské kundi ras Gotna nyéngaamba viyaatakandén. Devit viyaatakan kundiké wanangwa, Gwaaré. Wani gwaarémba ani kundi anga wa kwaakwa:

Néman Du Got wuna Néma Duwat anga wandén, ‘Méné néma du rate wuna yékutuwá saku taambamba ma raménék.

Raménu wawutu ména maama ména taambamba rakandakwa.

Randaru méné deku, néma du rate deké vérékaménéngwa.'

Got wunga wandén.

Gunat wawutékwa. Devit wunga wate Kraiské, 'Wuna Néman Du wa,' naandén. Kamuké we dé Devit Kraiské wunga wak? <sup>44</sup> Devit Got wan du Kraiské, 'Wuna Néman Du wa,' naandéka yénga pulak dé Krais nakapuk Devitna gwaal waaranga maandéka bakamu to? Krais Devitna gwaal, waaranga, maandéka bakamu téte, Devitna néma du waak dé to, kapuk?" Naandén Jisas det.

*Apakundiké vékusékngwa dunyanséké Jisas kundi kwayéndén*

(Mt 23:1-36; Mk 12:38-40; Lu 11:37-54)

<sup>45</sup> Du dakwa akwi rate Jisasna kundi vékuré-késndarén. Vékuréndaka dé déku dunyansat kundi kwayéndén. <sup>46</sup> Kwayéte anga wandén, "Guné wani apakundiké vékusékngwa dunyanséké ma jéraawu yangunék. De sémény laplap saawuwe du dakwa jaawundakwa taalémba yeyé yaayaké wa mawulé yandakwa. Yeyé yaayaténdaru du dakwa det véte anga wandarénnngé wa mawulé yandakwa: 'Wan de nana néma dunyansé wa.' Naandarénnngé wa yandakwa. De Gotna kundi bulnangwa gaamba wulaae néma duna taalémba raké wa mawulé yandakwa. De du nakale kakému kate, yéku taaléké waake, du dakwana ménimba raké mawulé yandakwa. <sup>47</sup> De du kiyaan kwawitakwana musé asé akwi kéraandakwa. De paapu yate Gorale kundi kulémba bulténdakwa, du dakwa det véte deku yé kusoréndarénnngé.

Yandakwanngé Got wandu néma vakmi wa deké yaakandékwa.” Naandén Jisas.

## 21

*Du kiyaan kwawitakwa yéwaa kwayélén Gorké  
(Mk 12:41-44)*

<sup>1</sup> Jisas Gotna kundi bulndakwa néma gaamba téte vétendén, rékaamba musé kurerékésén du dakwa Gorké yéwaa kwayéndaka. <sup>2</sup> Vété véndén musé asékapuk yaran du kiyaan kwawitakwa nak yaae makalkéri yéwaa vétik Gorké kwayélékä. <sup>3-4</sup> Vétake anga wandén, “Rékaamba musé kurerékwa du dakwa Gorké yéwaa ras kwayéndarén. Kwayéndaka deku yéwaa ras waak gaamba wa rakwa. Ani taakwa makalkéri yéwaa vétik kurerélén pulak akwi wa kwayélén. Ye lé kakému kéraala yéwaa nak yamba yé wa. Gorké kwayéndakwa yéku yapatat lé kwayén yéku yapaté wa taalékéran. Yi wan wanana wa.” Naandén Jisas.

*Gotna néma gaa yaavan kurkwate yandakwanngé wandén Jisas*

*(Mt 24:1-2; Mk 13:1-2)*

<sup>5-6</sup> Jisasna du ras Gotna kundi bulndakwa néma gaaké bulte anga wandarén, “An yéku gaa a. Yéku yéku matut wa yandarén. Du dakwa Gorké wani kwayéndarén yéku yéku musat wa yékuンmba yakusondarén.” Naandaka Jisas det anga wandén, “Bulaa a véngunéngwa musé asé sérémaa dunyan yaae yaavan kurkandakwa. Yaavan kutte akwi matu kéraae vaanjandandaru

nak matu, nak matu taakumba katik kwaaké dé.”  
Naandén Jisas.

*Jisas késépéri vakmi yaakwate yakwanngé  
wandén*  
(Mt 24:3-14; Mk 13:3-13)

<sup>7</sup> Wani kundi wandéka dat anga waatakundarén, “Néma du, yani nyaa wani gaa yaavan kurké daré? Taale kamu musé yaandu vétake wani musé a yaakandékwa naaké nané?”

<sup>8</sup> Naandaka Jisas wa wan, “Guné jéraawu ma yangunék. Yate guné paapu yakwa dunyanna kundimba vékuké yambak. Kundi guné a wawutékwa. Késépéri dunyan yaate gunat paapu yakandakwa. Paapu yate wuna yém̄ba nak nak yaate gunat anga wakandakwa, ‘Got wan du Krais a waambule yaakwa. Wuné anana Krais.’ Naandaru guné deku kundi vékuké yambak. <sup>9</sup> Dunyan waariya-kandakwa. Waariyandaru wani waariyandakwanngé ras wakandakwa. Yandaru guné vékute wup yambak. Taale wunga musé wa yakandakwa. Yandaru séséuk sékéyakmba yaana nyaa kukmba wa yaakandékwa. Bari katik yaaké dé.” Naandén Jisas.

<sup>10</sup> Watake det anga wandén, “Nak kantrimba tékwa du dakwa nak kantrimba tékwa du dakwale waariya-kandakwa. Nak néma duna kém nak néma duna kémale waariya-kandakwa.

<sup>11</sup> Apapu néma néma waalé gén-ngandékwa. Késépéri kantrimba néma kaandé yandu néma

baat waak yaké yakwa. Nyétmba késpulak nakpulak musé yaandu guné véte asa wup wa yakan-gunéngwa.

**12** “Wani musé wayéka yaakapuk téndu taale du ras gunat kulkije kapérandi musé yakandakwa, guné wuna dunyan rangunu de wuna jémbaaké kalik yate. Ye Gotna kundi bulndakwa gaamba gunat kotimngandakwa. De gunat kalapusmba taakakandakwa. Gunat kure yéndaru deku néma duna ménimba tékangunéngwa. **13** De wunga yandaru guné wani sapak wuna kundi det kwayékangunéngwa. **14** Guné taale, guna mawulémba anga waké yambak, ‘Nané deku kundi yénga pulak waambule waké nané?’ **15** Guné wunga waké yambak. Wani nyaa wuné gunat yéku mawulé, waké yangunéngwa kundi waak gunat kwayékawutékwa. Kwayéwutu, kwayéwutékwa kundi guna maama waké yakwa kundit taalékéra-kandékwa. Taalékérantu de guna kundi waambule waké yapatikandakwa. **16** Guna aasa aapa, guna aanyé waayéka, guna kémna du ras, guna du dakwa wunga de wa gunat maamat kwayéké yakwa. Kwayéndaru guné ras viyaandék-ngandakwa. **17** Guné wuna dunyan téngunénngé akwi du dakwa kalik yakandakwa. **18-19** Guné guna mawulémba apamama ye wuna jémbaa yasékéyakmunaae, wa guné wunale apapu yékunmba yarésékéyak-ngangunéngwa. Katik lambiyakngé guné.” Naandén Jisas.

*Jerusalem yaavan kurké yandakwanngé  
wandén Jisas  
(Mt 24:15-21; Mk 13:14-19)*

**20** Wani kundi watake Jisas det anga wandén, “Sérémaa waariyakwa dunyansé Jerusalem gaayé yanyaweye téndaru vétake wakangunéngwa, ‘Jerusalem yaavan kurké yandakwa sapak a yaakwa.’ **21** Wunga wate guné Judiamba tékwa du dakwa guna gaayé yaasékatake némbat bari ma yaange yéngunék. Guné Jerusalemma témoin tékwa du dakwa wani gaayé yaasékatake bari ma yaange yéngunék. Guné yaawimba yarékwa du dakwa wani gaayét waambule ye wulaaké yambak. **22** Wani sapak wan Got wani Jerusalemma yarékéskwa du dakwa yandarén kapéremusé yakataké yandékwa nyaa wa. Talimba du ras wani muséké kundi ras wa viyaatakandarén Gotna nyéngaamba. Wawutékwa nyaa wani kundi sékérék-ngandékwa. **23** Wani kapérandi nyaamba nyaan biyaa rakwa dakwa, nyambalé munyaa kwayétékwa dakwa waak bari yaange yéché ypati-kandakwa. Deké mawulé sémbéraa yawutékwa. Wani nyaa Got rakarka yate wandu néma kapérandi vakmi Judamba tékwa du dakwaké wa yaaké yakwa. **24** Yaandu maama yaae Judasat waariyandakwa néma kulaat viyaandaru kiyaakandakwa. Rasét kulkiye kure ye nak gaayémba taakakandakwa. Ye wani maama de nak gaayémba yaae Jerusalem yaavan kurkandakwa. Yaavan kuttake Jerusalemma néma du tékandakwa. Yate Got wani wan nyaa nakapuk waambule yékandakwa.” Naandén Jisas.

*Duna Nyaan yaaké yandékwanngé wandén*

*Jisas**(Mt 24:29-31; Mk 13:24-37)*

<sup>25</sup> Wani kundi watake Jisas det anga wandén, “Nyaa, baapmu, nyétmba tékéskwa kun késpulak nakpulak yandu du dakwa vékandakwa. Solwara némaamba waarapte wutndu ani képmaamba tékwa akwi du dakwa vétake wup yate géraakandakwa. <sup>26</sup> Yandaru nyétmba tékwa musé akwi sénga génte ye yéyé yaayakandakwa. Yandaru du dakwa génte wup nékéti yate vékulaka vékulaka naate wakandakwa, ‘Yéki, Yénga kapérandi musé dé nanéké yaakwate yo?’ <sup>27</sup> Wunga watake Duna Nyaan vékandakwa wuné apa tapa yate nyaa véte kaalékwa pulak yate buwimba rate gaayawatu. <sup>28</sup> Gunat wawutékwa. Wani musé taale baasnyé ye yaandu anga vékusék-ngangunéngwa. Wuné yaré yaré naae guné kéraae Gotna gaayét kure yékawutékwa. Wunga vékusékte guné yéku mawulé vékute ma waaraape yaasawure vétengunu.” Jisas det wunga wandén.

*Yékunmba vékulaka-ndarénngé wandén Jisas**(Mt 24:32-35; Mk 13:28-31)*

<sup>29</sup> Watake det anga wandén, “Miyéké kurkasale ma vékulaka. <sup>30</sup> Miyé ras gaanga péraae ye vény yaalandéka véte wangunéngwa, ‘A kakému naaré yakwa sékét a.’ Naangunéngwa. <sup>31</sup> Wani miyat véte wani sékérké vékusékngunéngwa pulak, wungat male guné wawutén musé véte vékusékte anga wa wakangunéngwa, ‘Got néma du rate du dakwaké kurkale véréké yandékwa

nyaa a yaakwa. Yi wan wanana wa.’ Naakan-gunéngwa. <sup>32</sup> Gunat a wawutékwa. Bulaa ani sapak a yatékéskwa du dakwa ras kiyaakapuk ye wayéka yatéte wa wawutén akwi musé vékandakwa. <sup>33</sup> Nyét képmáa késkandékwa. Wuna kundi katik késké dé. Rapéka-kandékwa. Yi wan wanana wa.” Naandén Jisas.

*Jisasna dunyan déké kurkale kaavéréndarénngé wa wandén det*

<sup>34</sup> Watake det anga wandén, “Guné ma jéraawu yangunék. Ras dunyan rékaamba kakému kandakwa, waangété kulak kate waangété yandakwa, ani képmáana muséké male vékundakwa, wunga yate de yamba yé kunmba vékulakandakwe wa. Guné de yakwa pulak yaké yambak. Guné de yakwa pulak ye wunéké vékulakakapuk yanguna sapak wa wuné waambule yaakawutékwa. <sup>35</sup> Ani képmáamba a tékwa akwi du dakwat wuné waambule yaawuta nyaa bari yakandékwa. <sup>36</sup> Guné apapu nyaa wunéké ma kaavéréngunék. Kaavéréte apapu apapu ma Gorét male waatakungunék, gunat mayé apa kwayéndénngé. Waatakungunu mayé apa kwayékandékwa. Kwayéndu kapérandi musé gunat yaavan kurkapuk yandu guné Duna Nyaan wuna ménimba yé kunmba tékangunéngwa.” Naandén Jisas det.

<sup>37</sup> Apapu nyaa Jisas awula Gotna kundi bulndakwa néma gaamba téte du dakwat Gotna jémbaaké yakwasnyéndén. Yandéka gaan yandéka yéte Oliv némbumba kwaandén. <sup>38</sup> Yandéka apapu ganmba wani du dakwa Gotna

kundi bulndakwa néma gaat yaandarén, déku kundi vékuké.

## 22

*Judas Jisas néma dusat kwayéké kundi gindén  
(Mt 26:1-5, 14-16; Mk 14:1-2, 10-11; Jo 11:45-53)*

<sup>1</sup> Yis kurkapuk yandarén bret kandakwa nyaayaaké yandu wani nyaaya Judasé Pasova waandakwa nyaana kakému kakandakwa. <sup>2</sup> Wani sapak Gotna gaamba jémbaa yakwa dunyanna néma dunyan, apakundiké vékusékngwa dunyan waak de Jisasét viyaandékngé mawulé yandarén. Ye du dakwa kalik yate waariyamuké wup yate anga wandarén, “Nané Jisas yéngä pulak ye viyaaké?” Naandarén.

<sup>3</sup> Wani sapak wa Satan Judasna mawulémba wulaandén. Déku nak yé waandarén Iskariot. Dé Jisasna du nak wa. <sup>4</sup> Satan wulaandéka Judas ye Gotna gaamba jémbaa yakwa dunyanna néma dunyan, Gotna kundi bulndakwa néma gaaké séngite kaavétékwa dunyanna néma dunyan waak, dele wa kundi bulndén, Jisas det kwayémuké. <sup>5</sup> Bule wandéka de mawulé yate dat yéwaa ras kwayéké bule kundi gindarén. <sup>6</sup> Judas yi naae kundi giye ye Jisas yakélak det kwayéké yandékwa sapakngé kaavéréndén. Némaamba du dakwa Jisasale yarékapuk yandara nyaaké nak kaavéréndén.

*Jisasna du vétik Pasova waandakwa kakému  
kéraae waaware kururémbérén  
(Mt 26:17-25; Mk 14:12-21; Jo 13:21-30)*

<sup>7</sup> Yis kurkapuk yandarén bret kandakwa nyaa yaan. Wani nyaa wa sipsip nyaan viyaandakwa, Pasova waandakwa nyaana kakémuké. <sup>8</sup> Viyaandakwanngé vékulakate Jisas Pita ambét Jonét anga wandén, “Béné ma ye Pasova waanangwa nyaana kakému kéraae waawatmbénu nanéké.” <sup>9</sup> Naandéka wambérén, “Yamba kéraae waawaténngé méné mawulé yo?” <sup>10</sup> Wunga waatakumbéréka wandén, “Ma véku. Béné ye wulaae Jerusalemma, kulak tékwa aké yaatan du nak vékambénéngwa. Vétake déku kukmba ye wulaandékwa gaat ma wulaambénu. <sup>11</sup> Wulaae wani gaana duwat anga ma wambénék, ‘Gotna kundi nanat yakwasnyékwa du ménat anga wandékwa, “Wuné wuna dunyansale Pasova waanangwa nyaana kakému kanana gaa yani taalémba dé kwaau?” Naandékwa.’ <sup>12</sup> Wunga wambénu anjorémba kwaakwa néma rum nak wakwasnyé-kandékwa. Wani rummba kakému kanana jaambé, ranana musé waak wa tékéskwa. Béné wani rummba kakému kéraae ma waawatmbénék.” <sup>13</sup> Naandéka bét ye Jisas wan pulak vémbérén. Vétake wani Pasova waanangwa nyaana kakému kéraae waawatmbérén.

*Jisas déku dunyansat brerale wainale kwayéndén*

*(Mt 26:26-30; Mk 14:22-26; 1 Ko 11:23-25)*

<sup>14</sup> Jisas déku dunyansale yaae rakésndarén kakému kaké. <sup>15</sup> Rate Jisas det anga wandén, “Taale ani kakému, Pasova waanangwa nyaana kakému, gunale kaké mawulé tawulé yawutékwa. Kukmba wuné néma kaangél wa kurkawutékwa.

**16** Gunat wawutékwa. Wuné nakapuk gunale téte ani képmaamba ani kakému katik kaké wuté. Sérémāa Got du dakwaké néma du randa sapak yaandu wa nakapuk kakawutékwa.” Naandén Jisas.

**17** Wunga watake wain kulak tékwa kasnya nak kéraae Gorét anga wandén, “Yéku kulak wa tiyaaménén. Wan yékun wa.” Naatake déku dunyansat wandén, “Guné kéraae muni waate nak nak ma kangunu. **18** Gunat wawutékwa. Wuné ani képmaamba téte wani kulak nakapuk katik kaké wuté. Sérémāa Got du dakwaké néma du randa sapak yaandu wuné wani kulak nakapuk kakawutékwa.” Naandén. **19** Wunga watake bret kéraae Gorét wandén, “Yéku musé wa tiyaaménén. Yékun wa.” Naatake bret bule déku dunyansat kwayéte anga wandén, “An wuna sépé a. [Gunat yékun yaké wa wuna sépé kwayéwutékwa. Guné wunéké vélkulakate wunga ma yapékaténgunék.] **20** Naatake kakému akwi kasékéyaktake Jisas wain kulak téen kasnya kéraae wungat male yate wandén, “Ani wain kulak wuna nyéki a. De wuné viyaandaru wuna nyéki vaakundu guné vétake anga wakangunéngwa, ‘Got du dakwat yékun yaké wandén kulé kundi wa sékérék-ngandékwa. Yi wan wanana wa.’ Naakanganéngwa.] Naandén Jisas.”

**21** Wani kundi watake Jisas det anga wandén, “Ma véku. Wuné maamat kwayéké yakwa du dé bulaa wunale kakému rate a karékwa. **22** Talimba Gotna nyéngaamba kundi wa viyaatakandarén, maama wuné viyaandarénngé. Viyaatakan-darén pulak Duna Nyaan wuné viyaandaru

kiyaakawutékwa. Kiyaawutu néma vakmi wuné maamat kwayékwa duké wa yaakandékwa.”  
**23** Wunga wandéka de deku kapmang bulte dékét waatakundarén, “Kandé wunga yakwate yo?” Naandarén.

*Jisasna dunyansé néma du téké waarundarén*

**24** Jisasna dunyansé kundi bulte waarundarén. Waarute anga wandarén, “Nanémba nana néma du kandé?” **25** Wunga wandaka Jisas det anga wandén, “Akwi gaayém̄ba tékwa du dakwana néma du, de apamama yate wa deku du dakwaké véndakwa. Véndaka deku du dakwa anga wandakwa, ‘De wan nanat yé kun yakwa du wa.’ Naandakwa. **26** Wunga wandaru guné wani néma du pulak yaké yambak. Guna du nak néma du témunaaandu dé du dakwana kukmba yaakwa du pulak téte, dékét déku yé katik kavérékngé dé. Dé néma du téte, dé jémbaa yakapuk baka yarékwa du pulak katik yatéké dé. Dé guna jémbaa yakwa du wa yarékandékwa. **27** Nak gaayém̄ba yarékwa dunyan yénḡa pulak daré yo? Deku néma du yénḡa pulak du dé? Rate kakému karékwa du dé, kapuk wani déké kakému kure yaae kwayéte jémbaa yakwa du dé? Wani rate kakému karékwa du dékét dé wa néma du. Wuné gunale yaréte wunga yamba yawutékwe wa. Wuné gunale yaréte guna jémbaa yakwa du wa yaréwutékwa.

**28** “Guné wunale wa yarésékéyakngunén. Kapérandi musé wunéké yaandéka guné wuné yamba yaasékangunéngwe wa. **29-30** Wuna aapa mayé apa wa tiyaandén, wuné néma du rate du dakwaké kurkale vewuténngé. Tiyaandén mayé

apa kéraae gunat kwayékawutékwa, guné wunale yaréte wunale kakému kulak kate, Israelna kém tambavétik maanmba kaayék vétikngé (12) néma du téte véngunénngé.” Naandén Jisas déku dunyansat.

*Jisas wandén Pita dat kuk kwayékwate yandékwanngé*

(Mt 26:31-35; Mk 14:27-31; Jo 13:36-38)

<sup>31</sup> Jisas Saimon Pitat anga wandén, “Saimon, méné ma véku. Satan apamama yandu guné yaange ye kapma kapma yaréte lambiyakngunénngé mawulé yandékwa. Kakému muni waatandakwa pulak, guné wunga muni waataké wa mawulé yandékwa. Satan guné yaavan kurkwate yandékwa. Yate Gorét waatakundén, dé wunga yandénngé. <sup>32</sup> Wuné Gorét wa waatakuwutén. Méno, Saimon, ménéké Gorét wa waatakuwutén, méné wunéké yé kunmba vékulakaménu ména mawulé kurkale tésékéyakndénngé. Téndu méné wunat kuk kwayétake sérémaa waambule yaae méné wuna dunyanna mawulé yé kun yaménu deku mawulé waak kurkale tésékéyak-ngandékwa.” Naandén.

<sup>33</sup> Wunga wandéka Pita dat anga wandén, “Néman Du, wuné ménale yéké mawulé yawutékwa. Wuné ménale yéte kalapus yakawutékwa wan yé kun wa.” <sup>34</sup> Naandéka Jisas dat wandén, “Pita, a vékusékwutékwa. Bulaa gaan séraa waakapuk téndu méné apu kupuk anga wakaménéngwa, ‘Wuné yamba ve wa Jisas.’ Wunga waménu séraa waaké yakwa.” Naandén Jisas Pitat.

*Yéwaa, wut, waariyandakwa kulaa kure  
yéndarénngé wandén Jisas*

<sup>35</sup> Jisas déku dunyansat anga wandén, “Talimba guné wawutéka ye yéwaa, wut, su yamba kure yéngunéngwe. Wani sapak muséké nak guné yapatik kapuk?” Naandéka wandarén, “Yamba wa.” <sup>36</sup> Wunga wandaka det anga wandén, “Bulaa gunat anga wawutékwa. Guné yéwaa kure témunaae yéwaa ma kure yéngunék. Guné wut kure témunaae wut ma kure yéngunék. Waariyanganéngwa kulaa kurerékapuk ye, guna laplap nak kwayéte yéwaa kéraae waariyanganéngwa kulaa ma kéraangunék. <sup>37</sup> Wa wawutékwa. Wunga yangunu Gotna nyéngaamba kwaakwa ani kundi wa sékérékngandékwa. Kundi anga wa kwaakwa: Déké wandarén, ‘Wa kapéremusé yakwa du wa. Dé viyaakanangwa.’ Wani kundi wunéké wa viyaatakandarén.” <sup>38</sup> Wunga wandéka wandarén, “Néman Du, ma véménu. Nané waariyanangwa kulaa vétik kure ranangwa.” Naandaka anga wa vékusékndén. De déké yaaké yakwa kapérandi muséké yékunmba yamba vékusékndakwe. Wunga vékusékte wa deku kundi waambule wate wandén, “Yaak wa.” Naandén.

*Jisas Getsemanimba Gorale bulte dat  
waatakundén*  
(Mt 26:36-46; Mk 14:32-42)

<sup>39</sup> Wani kundi watake Jisas gwaande Oliv némbat yéndén, apapu talimba yandén pulak. Déku dunyansé waak dale yéndarén. <sup>40</sup> Ye

wani taalémba saambake det anga wandén, “Guné Gorét ma waatakungunék, gunat yé kun yandu kapérandi musé gunat yaavan kurkapuk yamuké.” <sup>41-42</sup> Wunga wandéka de rakésndaka dé ayélap yé pulak naandén. Matu kéraae vaanéndaka ye vaakérkwa pulak, wulka yéndén. Ye kwaati se Gorét anga waatakundén, “Wuna aapa, méné akwi muséké wa apamama yaménéngwa. Yaakwate yakwa muséké waké mawulé yamunaae waménu wunéké yaakwate yakwa vakmi wunéké katik yaaké dé. Wunga waatakuwutékwa ménat. Méné wuné mawulé yakwa pulak yaké yambak. Ménékét mawulé yaménéngwa pulak ma yaménu.” <sup>43</sup> [Naandéka Gotna kundi kure gaayakwa du nak Gotna gaayémba gaaye déku mawulémba yé kun yandén. <sup>44</sup> Jisasna kwaminyan kapére yasékéyakndéka Gorét nakapuk waatakundén. Waataku-pékaréndéka waangét nyéki pulak vaakwe képmaamba vaakérén.]

<sup>45</sup> Jisas Gorale bulte waatakutake waarape déku dunyanséké yéndén. Ye véndén de yundé kwaakésndaka. De mawulé sémbéraa yate vékundaka deku mawulémba kapére yate deku ménimba yundé yandéka wa kwaandarén. <sup>46</sup> Kwaandaka vétake det sérkiyaate anga wandén, “Guné kamuké guné yundé kwaakésu? Guné yundé kwaaké yambakate. Ma waarape Gorét waatakungunu, kapérandi musé asé gunat yaavan kurkapuk yamuké.” Naandén Jisas.

*Judas Jisas maamat kwayéndén  
(Mt 26:47-56; Mk 14:43-50; Jo 18:3-11)*

<sup>47</sup> Jisas wayéka téte bulténdéka wa némaamba dunyansé yaakérén. Jisasna du nak Judas yaambu taaléndéka yaandarén. Judas Jisasét taama réng-ngé we Jisas ténét yaae kwambali-sékéyakndén. <sup>48</sup> Kwambali-sékéyakndéka Jisas dat anga wandén, “Judas, méné Duna Nyaan wunat taama rénge maamat kwayéké méné, kapuk yéngä pulak yaké méné?” Naandén.

<sup>49</sup> Jisasna dunyansé dale téte véndarén wa, wani deké yaan dunyansé Jisas kulkiye kure yéké yandakwan. Wunga vétake Jisasét anga wandarén, “Néman Du, de waariyanangwa kulaat viyaaké nané, kapuk méné yéngä méné vékwo?” <sup>50</sup> Naatake deku du nak Gotna gaamba jémbaa yakwa dunyanna néma duké jémbaa yakwa duwat viyaate déku yékutuwa sakuna waan satékyasnyéndéka vaakérén. <sup>51</sup> Yandéka Jisas vétake wandén, “Yaak. Guné wunga yaké yambakate.” Naatake wani duna waanmba kutndéka nakapuk yékun yan.

<sup>52</sup> Gotna gaamba jémbaa yakwa dunyanna néma dunyan, Gotna kundi bulndakwa gaaké séngite kaavétékwá dunyanna néma dunyan, Israelpa maaka dunyan, wunga wa yaandarén, Jisas kulkiye kure yéké. Yaae Jisas wunga yandéka vétake téndaka Jisas det anga wandén, “Guné wuné kurké yaate kamuké guné waariyan-gunéngwa kulaa baangé waak kure yaau? Guné sél yakwa duwat viyaaké guné wani musé kure yaau, kapuk yéngä pulak yaké?” <sup>53</sup> Apapu nyaa Gotna kundi bulndakwa néma gaamba gunale wa yaréwutén. Yaréwutéka wuné yamba kutn-

gunéngwe. Bulaa guna jémbaa a yakangunéngwa. Bulaa ganngunganna néma du Satan apamama yakandékwa.” Naandén Jisas.

*Pita wa wan, “Wuné Jisas yamba vewutékwe wa”*  
*(Mt 26:57-58, 69-75; Mk 14:53-54, 66-72; Jo 18:15-18, 25-27)*

<sup>54</sup> Jisas wani kundi wandéka dé kulkkiye kure yéndarén. Kure ye Gotna gaamba jémbaa yakwa akwi dunyanna néma duna gaat kure wulaandarén. Kure wulaandaka Pita deku kukmba ye lakasatiye apakmba téndén. <sup>55</sup> Téndéka de wani Jisas kure yén dunyan aatmu gisangwandéndarén taalém̄ba wulaae yaa yamungandarén. Yamunge randaka Pita dele yaamba randén. <sup>56</sup> Randéka jémbaa yakwa taakwa nak dat vélén. Vétake déku saawit vésék vésék naate wa anga walén, “Ani du waak Jisasale wa yaténdén.” <sup>57</sup> Naaléka Pita wa wan, “Nyéno, wuné dé yamba vésékwutékwe wa.” Naandén.

<sup>58</sup> Wunga wandéka raré naae kukmba nak du dat vététe wandén, “Méné waak Jisasna du wa.” Naandéka wandén, “Méno, wuné yamba wa.” <sup>59</sup> Naandéka raré naae kukmba nak du waak dat vête némaanmba wandén, “Ani du waak dé Galili du a. Dé waak Jisasale wa yaténdén. Yi wan wanana wa.” Naandén.

<sup>60</sup> Wunga wandéka Pita wa wan, “Méno, wa waménéngwa kundi wuné yamba vékwe wa.” Wunga waké naaténdéka séraa nak bari waan. <sup>61</sup> Waandéka Néman Du Jisas awulaka apakmba pulak téte waalakwe Pitat védén. Véndéka dat wani takamba Jisas wan kundiké vékulakandén.

Takamba Jisas dat anga wandén, “Wuné vékusékwutékwa wa. Bulaa gaan séraa waakapuk téndu méné apu kupuk wakaménéngwa, ‘Wuné yamba vewutékwe wa Jisas.’ Wunga waménu séraa waaké yakwa.”<sup>62</sup> Wani kundiké vékulake Jisasét kuk kwayétake wa Pita gwaande mawulé sémbéraa yate némaamba géraandén.

*Jisasét waangite, wasélékte dat viyaandarén  
(Mt 26:67-68; Mk 14:65)*

<sup>63</sup> Jisas kurin dunyansé dat waangite wasélékte viyaandarén. <sup>64</sup> Viyaate déku méni laplapét gitépétake dat anga wandarén, “Méné Gotna kundi kwayékwa du rate akwi muséké wa vékusékménéngwa. Vékusékte ma wa nanat. Ménat kandé viyaak?”<sup>65</sup> Wunga wate némaamba kapérandi kundi ras waak wandarén dat.

*Jisas Israelséna néma dunyanna ménimba téndén*

*(Mt 26:59-66; Mk 14:55-64; Jo 18:19-24)*

<sup>66</sup> Nyaa yaalandéka Israelséna maaka dunyan, Gotna gaamba jémbaa yakwa dunyanséna néma dunyan, apakundiké vékusékngwa dunyan, de wunga yaae jaawundarén. Jaawuwe téndaka Jisaské séngiye kaavétan dunyan dé kure yaandarén deké. Kure yaae taakandaka deku ménimba téndén. <sup>67</sup> Téndéka dat anga wandarén, “Méné ma wa nanat. Méné Got wan du Krais méné kapuk?” Naandaka det wandén, “Gunat wamunaawutu yékunmba vékulakamuké kalik yakangunéngwa.<sup>68</sup> Wuné gunat waataku-munaawutu guné wuna kundi waambule wa-muké kalik yakangunéngwa.<sup>69</sup> Sérémaa Duna

Nyaan wuné néma du rate, apa tapa yakwa du Gotna yékutuwā taambamba rakawutékwa.” Naandén Jisas.

<sup>70</sup> Wunga wandéka de akwi wandarén, “Yéngä méné wo? Méné Gotna nyaan méné, kapuk yéngä méné?” Naandéka wandén, “Yi. Gunékét guné wa wunga wakwa.” <sup>71</sup> Naandéka wandarén, “Dékét déku kapmang wa kapérandi kundi wandéka vékunanén. Vékutake yandén musé aséké ras waak katik vékuké nané.” Naandarén Israelséna néma dusé Jisaské.

## 23

*Jisas Pailatna ménimba téndén  
(Mt 27:1-2, 11-14; Mk 15:1-5; Jo 18:28-38)*

<sup>1</sup> Wunga ye de wani néma dunyansé akwi waaraape Jisas Romna néma du déku yé Pailat, déké kure yéndarén. <sup>2</sup> Kure ye Jisaské dat anga wandarén, “Ani du dé kapérandi muséké wa nana du dakwat yakwasnyéndén. Yate nanat anga wandén, ‘Guné Romna néma duwat takis kwayéké yambak.’ Naandén. Wunga watake anga wandén, ‘Wuné néma du a rawutékwa. Wuné Got wan du Krais wuñé anana.’ Naandéka wa dé ménéké kure yaananén.” Naandarén.

<sup>3</sup> Wunga wandaka Pailat Jisasét waatakundén, “Méné Judaséna néma du méné kapuk?” Naandéka Jisas wa wan, “Yi. Ménékét ména kapmang wa waménéngwa wunga.” <sup>4</sup> Naandéka Pailat Gotna gaamba jémbaa yakwa dunyanséna néma dunyan, dele tékésén némaamba du dakwat anga wandén, “Ani du kapérandi musé nak

yamba yandékwe wa. Wunga vékusékwutékwa.”

<sup>5</sup> Naandéka de némaanmba nyaarang naate anga wandarén, “Déku kundi Judiamba tékwa akwi du dakwat kwayéndéka kurkale yarékapuk yate waariyaké yandakwa. Taale Galilimba kundi kwayétuke bulaa anga yaae nanat wunga kundi kwayéndékwa.” Naandarén.

### *Jisas Herotna ménimba téndén*

<sup>6</sup> Pailat wani kundi vékutake det anga waatakundén, “Ani du Galili du dé, yi?” <sup>7</sup> Wunga wandéka yi naandarén. Yi naandaka Pailat wa vékusékndén. Talimba Romna néma du wandéka Herot néma du téndén Galili distrikmba. Jisas Galili du wa. Yaténdéka Herot Jisasna néma du téndén. Wani sapak Herot waak Jerusalemmba wa yaréndén. Wunga vékuséktake Pailat wandéka Jisas Herotké kure yéndarén.

<sup>8</sup> Talimba Herot Jisaské kundi vékutake dé véqué wa mawulé yaréndén. Ye késépéri baapmu Jisas vékapuk yaréndéka wani sapak dé déké kure yaandaka Herot dat véte mawulé tawulé wa yandén. Jisas talimba vékapuk yandén kulé apanjémba nak déku ménimba yandu véqué wa mawulé yate dusék yandén. <sup>9</sup> Yate Jisasét késépéri muséké waatakundén. Waatakundéka Jisas déku kundi nak yamba waambule wandékwe.

<sup>10</sup> Yandéka Gotna gaamba jémbaa yakwa dunyanséna néma dunyan, apakundiké vékusékngwa dunyan waak wamba téte némaamba saték naate kapérandi kundi Jisaské wandarén Herorét. <sup>11</sup> Wandaka Jisas Herotna kundi waambule wakapuk yandéka Herot

déku waariyakwa dunyansale Jisasét waangite wasélékndarén. Dat “Gandéndu” waate Herot dat waangite wasélékndén. Yate anga wandén, “Du dakwana néma du dé yéku laplap male wa saawundékwa.” Naatake wandéka paapu ye yéku laplap kéraae Jisasét saawutake dat waangiye waambule Pailatké dé kure yéndarén. <sup>12</sup> Talimba Pailat Herorale maama yaténdén. Pailat Herotna yé kavérékte wandéka Jisas Herotké kure yéndarén sapak, Herot wani muséké dusék yate Pilarale naawi kure yékunmba yarémbérén.

*Jisas takwemimba baangtakandarénngé wa  
Pailat watakandén*

(Mt 27:15-26; Mk 15:6-15; Jo 18:39-19:16)

<sup>13</sup> Pailat wandéka de Gotna gaamba jémbaa yakwa dunyanséna néma dunyan, Israelséna néma dunyan, némaamba du dakwa waak yaae jaawundarén. <sup>14</sup> Jaawundaka det wandén, “Guné ani du wunéké kure yaae anga wanguén, ‘Dé du dakwana yéku mawulé yaavan kutndékwa. Dé asa kapérandi musé wa yandén.’ Naanganénéngé wuné guna ménimba téte dat ani muséké waatakuwutén. Waatakutake gunat anga wawutékwa. Dé wani wangunén kapérandi musé yamba yandékwe wa. <sup>15</sup> Herot waak wungat male wandékwa. Wunga wandéka wa dé waambule nanéké kure yaandarén. Ma véku. Kapérandi musé nak yamba yandékwe wa. Dat katik viyaandékngé nané. <sup>16</sup> Watakawutu wuna dunyan dat viyaandaru baka yékandékwa.” Naandén.

**17** [Akwi kwaaré Pasovana kakému kandakwa sapak Romna néma du Pailat kalapusmba kwaan du nak watakandéka kalapus yaasékatake baka gwaande yéndén.]

**18** Pailat wani kundi wandéka wamba tékésén du dakwa de akwi némaanmba nyaarangte anga waandarén, “Wani duwat viyaandéktake ma Barabasét waménu kalapus yaasékatake yaale baka yékandékwa.” Naandarén.

**19** Talimba wani du Barabas Romna dunyanngé kalik yate Jerusalemmba tékwa du dakwat watakandéka Romna dunyansale waariyandarén. Nakapuk Barabas du nakét viyaandékndén. Wunga yandéka wa dé kalapusmba taakandaka kwaandén.

**20** Wamba tékésén du dakwa wunga waandaka Pailat Jisas baka yéndénngé mawulé yandén. Ye det nakapuk wandén, Jisas baka yéndénngé.

**21** Wandéka de kalik yan. Yate némaamba waate anga wandarén, “Dé takwemimba ma baangtaka. Dé takwemimba ma baangtaka.”

**22** Naandaka det nakapuk wandén, “Kamuké? Kamu kapérandi musé dé yak? Dat katik viyaandékngé nané. Kapérandi musé nak yamba yandékwe wa. Watakawutu wuna dunyan dat viyaae taakandaru yaale yékandékwa.” Naandén.

**23** Wunga wandéka de kalik yate némaamba waate wandarén, dé watakandu de Jisas takwemimba baangndarénngé. Wunga wate Pailatna kundi yamba vékundakwe. **24** Yandaka Pailat deku kundimba vékwe wa wandarén pulak yandén. **25** Ye wandéka wani mawulé yandarén du Barabas kalapus yaasékatake gwaande baka

yéndén. Talimba Barabas Romna dunyanngé kalik ye du dakwat watakandéka Romna dunyansale waariyandarén. Nakapuk Barabas du nakét viyaandékndén. Wunga yandéka wa dé kalapusmba taakandaka kwaandén. Pailat Barabas baka yéndénngé watake wa Jisas takwemimba baangndarénngé watakandén.

*Jisas takwemimba baangndarén*  
*(Mt 27:32-44; Mk 15:21-32; Jo 19:17-27)*

<sup>26</sup> Romna waariyakwa dunyansé Jisas kure yéte véndarén Sairini du nak déku yé Saimon Jerusalemét wulaaké yaandéka. Vétake dé kulkiye Jisas baangtakandara takwemi yaate Jisasna kukmba yéndénngé wandarén. Wandaka yaate dele yéndén. <sup>27</sup> Yéténdaka némaamba du dakwa wa Jisasna kukmba yéténdarén. Yététe dakwa ras mawulé sémbéraa yate déké géraandarén. <sup>28</sup> Géraandaka Jisas waalakwe det anga wandén, “Guné Jerusalemma yarékwá dakwa, guné wunéké géraaké yambak. Gunékét gunéké, guna nyambaléché waak ma géraangu. <sup>29</sup> Kapérandi sapak yaandu du dakwa anga wakandakwa, ‘Ani kapérandi sapak dakwa deku nyambaléséké néma sémbéraa yandakwa. Sémbéraa yandakwanngé vékulakate nyaan kéraaké yapatikwa dakwa, nyaan kéraakapuk yan dakwa, nyambalé munyaa kwayékapuk yan dakwa, wani dakwa ani kapérandi sapak deku nyambalé yarékapuk yandaru mawulé tawulé yéngé yandaru.’ Naakandakwa. <sup>30</sup> Wani kapérandi sapak du dakwa déké yaaké yakwa kapérandi muséké wup yate anga wakandakwa,

‘Némbu ma vaakére nanat tekéténdaru.’ Naakandakwa. <sup>31</sup> Wuné kapérandi musé nak yamba yawutékwe wa. De wunat ani kapérandi musé baka yate yénga pulak yaké daré, Jerusalemma yaréte kapérandi musé yakwa du dakwat? Det némaamba kapérandi musé wa yakandakwa.” Wani dakwat wunga wandén Jisas.

<sup>32</sup> Waariyakwa dunyan kapérandi musé yan du vétik waak kure yéndarén. Bét Jisasale sékét viyaaké we kure yéndarén. <sup>33</sup> Kure ye Duna Maaka Apa waandakwa taalémba saambakndarén. Saambake wamba Jisas takwemimba baangndarén. Yatake wani kapérandi musé yan du vétik waak takwemimba baangndarén. Nak du Jisasna yékutuwa sakumba baangtakandarén. Nak du déku akituwa sakumba baangtakandarén.

<sup>34</sup> Jisas takwemimba baangtakandaka anga wandén, “Aapa, ani wunat yandakwa kapérandi muséké vékulakate méné det waambule yakataké yambak. De yamba vékusékndakwe wa yandakwa muséké.” Naandén Jisas. Jisas takwemimba baangtake de rate déku laplap muni waataké satu pulak pilai yandarén. Yandaka det taalékéran du wa déku laplap kéraan. <sup>35</sup> Yaténdaka du dakwa téte vésékndarén. Véténdaka Israelna néma dunyan Jisasét waangite wasélékte anga wandarén, “Dé du dakwat yékun yandén. Dé nanat yékunmba yandénngé Got wani wan du Krais yarémunaae, wa dé dékét déku sépat déku kapmang yékun yakandékwa.” <sup>36</sup> Naandaka de waariyakwa dunyansé waak dat waangite wasélékte yaae

dat nyéngi yakwa wain kulak kwayéndarén.  
**37** Kwayéte wandarén, “Méné Judaséna néma du témunaae ma ména kapmang ména sépat yékun yaménu.” Naandarén.

**38** Jisas baangtakandarén wani takwemina waambumba anjoré anga viyaatakandarén: Ani du an Judaséna néma du a. Naatakandarén.

**39** Jisasale takwemimba baangtakandarén du nak Jisasét waarute anga wandén, “Méné waménén, ‘Wuné gunat yékun yawuténngé Got wan du a.’ Waménén wani kundi sékérékmunaandu, ma ména kapmang ména sépat yékun yate aana sépat waak yékun yaménu.”

**40** Wunga wandéka Jisasale takwemimba baangtakandarén nak du wani kundi vékutake dat waarute anga wandén, “Jisas kiyaana pulak méné kiyaaké yate Gorké wup yakapuk yate méné wani kapérandi kundi wo, yi? **41** Kapérandi musé yaténngé aané viyaandaru wan yékun wa. Ani du kapérandi musé nak yamba yandékwe wa.” **42** Naandéka wandén, “Jisas, méné apamama ye du dakwaké néma du raké waambule yaate wunéké ma vékulakaménu.” **43** Wunga wandéka Jisas wa wan, “Bulaa ani nyaa méné wunale yéku taalémba rakaménéngwa. Yi wan wanana wa.” Naandén Jisas dat.

### *Jisas wa kiyaan*

(Mt 27:45-56; Mk 15:33-41; Jo 19:28-30)

**44-45** Nyaa naawure kayéndéng téndéka akwi képmaa gaan yan. Ye téndéka nyaa yamba ve wa. Kukmba nyaa tépatekwe daawuliké

yaténdéka (3 klok) Gotna kundi bulndakwa néma gaamba wani lékitakandarén sémény laplap nyéndémba gérike aangé vétik yan. <sup>46</sup> Yandéka Jisas némaanmba anga waandén, “Aapa wa, wuna kwaminyan ména taambamba a taakawutékwa.” Watake wunga kiyaandén. <sup>47</sup> Kiyaandéka waariyakwa dunyanséna néma du vétake Gotna yé kavérékte wandén, “Ani du yéku musé male yan du a. Yi wan wanana wa.” Naandén.

<sup>48</sup> Wani musé véké yaae jaawuwe tékésén akwi du dakwa Jisas kiyaandéka vétake mawulé sémbéraa yate deku gaayét waambule yéndarén. <sup>49</sup> Yéndaka de wani Jisas vésékén dunyansé, dakwa ras waak de wunga apakmba pulak téte wani musé yandéka véndarén. Talimba Jisas Galili taakatake yéndéka de wani dakwasé wa dale sékét yéndarén.

*Jisasna pusaa matumba vaandarén  
kwaawumba taakandarén*  
(Mt 27:57-61; Mk 15:42-47; Jo 19:38-42)

<sup>50-51</sup> Du nak yaréndén. Déku yé Josep wa. Judamba tékwa gaayé Arimatea du wa. Dé yéku musé yakwa du yaréte, Got néma du rate du dakwaké vérénda sapakngé wa kaavéréndén. Dé néma du téte talimba nak néma dunyansale jaawuwe rate Jisas viyaandékngé bulndarén kundi dele bulte dé yamba yi naandékwe wa. <sup>52</sup> Wani du ye Romna néma du Pailarét waatakundén Jisasna pusaa kéraamuké. <sup>53</sup> Waatakundéka yi naandéka ye Jisasna pusaa lepékwe kure gaaye waama laplapét saape kwaawumba taakandén. Wani kwaawu talimba

Josep dékét déku jémbaa yakwa dunyansé wa matumba vaae wulaan. Talimba wani kwaawumba kiyaan duna pusaa nak yamba taakandakwe wa. <sup>54</sup> Garambu Josep Jisasna pusaa kwaawumba taakandén. Judana yaap yaré nyaa yaaké yandéka wa wunga yandén.

<sup>55</sup> Galilimba Jisasale yaan dakwasé Josepna kukmba ye véndarén dé Jisasna pusaamba yéku yaama yakwa musé kurkapuk baka taakandéka. Taakandén taalé waak véndarén. <sup>56</sup> Vétake gaayét waambule ye pusaamba kurké watake yéku yaama yakwa musé kéraatakandarén. Kéraae taakatake yaap yaré nyaa Moses wan apakundi wandékwa pulak wa yaap yaréndarén.

## 24

### *Jisas nakapuk taamale waarpndén (Mt 28:1-10; Mk 16:1-8; Jo 20:1-10)*

<sup>1</sup> Yaap yaré nyaa yéndéka Sande ganmbamba nyaa yaalaké yaténdéka wani dakwasé taakandarén yéku yaama yakwa musé kéraae kure yéndarén, Jisasna pusaa rémndarén taalat. <sup>2</sup> Ye véndarén wani kwaawumba kétaaktépendarén matu varémansati-takandaka randéka. <sup>3</sup> Vétake kwaawumba wulaae Néman Du Jisasna pusaaké vépatikndarén. Yamba re. <sup>4</sup> Yatake wani muséké wamba téte vékulaka vékulaka naaténdaka du vétik gaaye dele témbérén. Bérku laplap wamatama ye kalkal naan. <sup>5</sup> Témbéréka de wup ye kwaati se saawi képmaat tindarén. Yandaka anga wambérén, “Kamu yaké guné waaku kiyangambana taalémba taamale waarape kulé

rakwa duké? <sup>6</sup> Dé amba yamba re wa. Dé wa nakapuk taamale waarpén. Dé Galilimba yatéte gunat wani wandén kundiké ma vékulakangunék. <sup>7</sup> Dé anga wa wandén, ‘De Duna Nyaan wuné kwayékandakwa kapérandi musé yakwa dunyanét. Kwayéndaru wuné takwemimba baangtakandaru kiyaawutu nyaa vétik yéndu kupuk yambanmba nakapuk taamale waarpkawutékwa.’ Wunga wandén kundiké ma vékulakangunu.” Naambérén.

<sup>8</sup> Bérku kundi vékutake wani dakwasé Jisas talimba wandén kundiké vékulakandarén. <sup>9</sup> Vékulake pusaa rémndarén kwaawu taakatake nakapuk waambule yéndarén. Ye Jisasna dunyan tambavétik maanmba kaayék nakurak (11) det wani muséké wandarén. De Jisasna jémbaamba yaalan ras du dakwat waak wani muséké wandarén. <sup>10</sup> Wani kundi Jisasna dunyansat saapan dakwasé, wan Makdala taakwa Maria, Joana, nak Maria lé Jemsna aasa, ras dele sékét yaréndarén dakwa waak. <sup>11</sup> Wani kundi saapéndaka vékutake de Jisasna dunyan wa wan, “Wa paapu wa yandakwa. Wa yaambumba kundi wa.” Naatake deku kundi yamba vékundakwe. <sup>12</sup> [Yandaka Pita waarape pétépété yéndén Jisasna pusaa rémndarén kwaawut. Ye kwaatambe yaasole véndén pusaamba saaptakandarén laplap male randéka. Vétake waambule déku gaat yéte vékulaka vékulaka naayéndén wani muséké.]

*Jisasna du vétik Emeusét yéte Jisas vémbérén  
(Mk 16:12-13)*

<sup>13</sup> Wani nyaa talimba Jisasale yeyé yaayatan du vétik bét Emeusét yéndakwa yaambumba yémbérén. Du dakwa Jerusalem taakatake wani gaayét yéte kulém̄ba pulak wa yékandakwa (11 kilomita pulak). <sup>14</sup> Bét yéte Jisas kiyaannngé saapélaakét yétémbérén. Saapéte Jisaské dakwasé wan muséké waak saapé yémbérén. <sup>15</sup> Saapélaakét yétémbéréka Jisas dékét déku kapmang yaae béraleyéndén. <sup>16</sup> Yéténdéka dat véte yamba vésékmbérékwé. <sup>17</sup> Yambéréka bérét anga wandén, “Béné kamuké béné buaakét yu?” Wunga wandéka bét Jisas kiyaannngé vékulakate mawulé sémbéraa yatémbérén. <sup>18</sup> Téte du nak déku yék Kliopas déku kundi waambule anga wandén, “Késpulak nakpulak gaayém̄ba yaan némaamba du dakwa Jerusalemma bulaarate wa vékusékdakwa wani yandarén muséké. Méné, nak gaayém̄ba yaan du, méné nakurak méné ani nyaa Jerusalemma yandarén muséké vékusékngapuk yo kapuk?” Naandén.

<sup>19</sup> Wani kundi wandéka Jisas bérét anga waatakundén, “Kamu daré yak?” Wunga waatakundéka bét yékéyaakmba téte dat wambérén, “Nasaret du Jisasét wa wani musé yandarén. Dé Gotna yémba kundi kwayétan du nak wa. Dé Gotna ménimba, akwi du dakwana ménimba waak téte dé yéku apanjém̄ba yate néma kundi waténdén. <sup>20</sup> Yaténdéka Gotna gaamba jémbaa yakwa dunyanséna néma dunyan, nana néma dunyan waak dé kwayéndarén Romna duwat, dé viyaandékndaru kiyaandénngé. Kwayéndaka dé takwemimba baangndaka

kiyaandén. <sup>21</sup> Talimba nana mawulémba anga wanánén, ‘Wani du nané Israelsat kéraae yékun yakandékwa.’ Wunga warénanga dé wa viyaandékndarén. Wani muséké wa bulte ani muséké waak watékwa. Dékény Jisasét viyaandékndaka nyaa vétik yéndéka bulaa a nyaa kupuk yakwa. <sup>22</sup> Nak muséké waak bultékwa. Bulaa nanale Jisasna jémbaamba yaalan dakwa ras wan kundiké vatvat naananén. Ganmbamba déku pusaa rémndarén taalat yéndarén. <sup>23</sup> Ye déku pusaa yamba véndakwe. Yatake waambule yaae nanat anga wandarén, ‘Nané ye Gotna kundi kure gaayakwa duwat vénanga anga wambérén, “Dé wa nakapuk taamale waarpén.” Naambérén.’ <sup>24</sup> Wani dakwasé yaae nanat wunga saapéndaka nana du ras yén, Jisasna pusaa rémndarén taalat. Ye wani dakwa saapan pulak véndarén. Ye vétake Jisas yamba véndakwe wa.” Naambérén.

<sup>25</sup> Wani kundi wambéréka Jisas bérét anga wandén, “Béné yamba yékunmba vékulakambénéngwe wa. Béna mawulé yékunmba tékapuk yandéka wa béné Gotna yém̄ba talimba kundi kwayétan dunyanna kundi ayélapkéri wa vékumbénén. <sup>26</sup> Wani dunyan anga wandarén, ‘Taale kapérandi musé Got wan du Kraiské yaandu kukmba dé néma du randu de déku yé kavérék-*ngandakwa*.’ Wunga wandén kundi béné yamba kurkale vékumbénéngwe wa.” Naandén. <sup>27</sup> Wunga watake Moses déké viyaatakandén kundi, Gotna yém̄ba kundi kwayétan akwi dunyan déké viyaatakandarén kundiké waak bérét wandén.

<sup>28</sup> Yambuyambu bulaakét ye bét yéké yén gaayémba saambakngé yaténdarén. Ye saambake Jisas nakapuk yékwate yandén. <sup>29</sup> Yandéka dat wambérén, “Yémbak. Nyaa daawulindu gaan a yaké yakwa. Yandu méné aanale kwaaké ya.” Wunga wambéréka wulaae bérale randén. <sup>30</sup> Rate kakému kaké yate bret kéraae Gorét anga wandén, “Yéku kakému a tiyaaménén nanat. Wan yékun wa.” Wunga watake bret bule bérét kwayéndén. <sup>31</sup> Kwayéndéka bét bari dé vésék naambérén. Vésékmbéréka wamba yamba randékwe. Bét dé yamba vémbérékwe. <sup>32</sup> Yatake bérku kapmang bulte anga wambérén, “Aané yaambumba yaatéka Gotna nyéngaamba kwaakwa kundiké aanat wandéka, wa aanä mawulé yékun yan. Yi wan wanana wa.” Naambérén.

<sup>33</sup> Wunga watake bari waarape Jerusalemét nakapuk waambule yémbérén. Ye vémbérén Jisasna dunyan tambavétik maanmba kaayék nakurak (11), déku jémbaamba gwaandan du dakwale jaawuve randaka. <sup>34</sup> Vémbéréka bérét wandarén, “Nana Némán Du dé wa nakapuk taamale waarpén. Yi wan wanana wa. Taamale waarpndéka Saimon wa vén dé.” <sup>35</sup> Wunga wandaka bét yaambumba yétémbéréka Jisas bérké yaandénngé saapémbérén. Jisas béraleyrate bret buléndéka wani nyaa male dé vésékmbérénngé waak det wani kundi saapémbérén.

*Jisas déku dunyanngé yaandéka véndarén  
(Mt 28:16-20; Mk 16:14-18; Jo 20:19-23)*

<sup>36</sup> Bét wani kundi watémbéréka dékét Jisas déku kapmang yaae deku nyéndémba téndén.  
<sup>37</sup> Téndéka de vatvat naae wup yate deku mawulémba anga wandarén, “Wa gaamba dé.”  
<sup>38</sup> Wunga wandaka det wandén, “Kamuké guné vatvat naau? Kamuké guné guna mawulémba vékulaka vékulaka naau?” <sup>39</sup> Wuna maan taambat ma véngunu raaményét baangndarén katak. Véte guné vésékngé ya. A wuné a tékwa. Wunat ma kutte guné véké ya. Véte vésék-ngangunéngwa. Gaamba yamba wa. A wuné a tékwa. Gaamba de sépémaalé yamba kure téndakwe wa, wuné kure tékwa pulak. An wunat a véténgunéngwa.” Naandén. <sup>40</sup> [Wunga watake déku maan taamba det wakwasnyéndén, raaményét baangndarén wani katak véndarénngé].

<sup>41</sup> Jisasna dunyan dat vétake vékulaka vékulaka naandarén. Yate mawulé tawulé yate deku mawulémba anga wandarén, “Yénga véké? A kiyaae taamale waarpén du Jisas dé, kapuk kandé?” Wunga vékulakandaka det waatakundén, “Guné amba kakému ras guné taakak?” <sup>42</sup> Wunga waatakundéka tutakandaka ran gukwami dat kwayéndarén. <sup>43</sup> Kwayéndaka kérage kandéka véndarén.

<sup>44</sup> Wani kwaami katake det anga wandén, “Talimba wuné gunale yatéte gunat anga wa wawutén, ‘Talimba Moses kundi wunéké wandéka, Gotna yém̄ba kundi kwayétan dunyan waak wunéké wa kundi kwayétendarén. Talimba gwaaré waatan dunyan de waak wunéké wa wandarén. Wandarén kundi Gotna nyéngaamba wa kwaakwa. Wunéké viyaatakandarén kundi

akwi sékérék-*ngandékwa*.' Wunga wawutéka bulaa wani kundi wa sékérékén. Yi wan wanana wa." <sup>45</sup> Wunga wate deku mawulé kutélangndén, de Gotna nyéngaaamba kwaakwa kundi yékunmba vékusék naandarénngé.

<sup>46</sup> Yate det anga wandén, "Gotna nyéngaaamba ani kundi wa kwaakwa: Got wan du Krais néma kaangél kure kiyaakandékwa. Kiyaae nyaa vétik yéndu kupuk yambanmba wa nakapuk taamale waarapkandékwa. <sup>47</sup> Déku apu déku yém̄ba ani kundi ma kwayéndarék akwi du dakwat: 'Guné yangunén kapéremuséké kalik ye ma yaasékangunu. Yaasékangunu Got yangunén kapéremusé yasnyéputi-kandékwa.' Wani kundi Jerusalemm̄ba tékwa du dakwat taale baasnyé ye kwayéte nak gaayémba tékwa du dakwa, képmaana akwi taalémba tékwa du dakwat waak ma kwayéndarék. <sup>48</sup> Guné wani musé akwi wa véngunén. <sup>49</sup> Talimba wuna aapa anga wandén, 'Sérémaa wuna Yaamambi gunat kwayékawutékwa. Yi wan wanana wa.' Wunga wandénngé wuné wawutu wuna aapana Yaamambi guna mawulémba wulaae rakandékwa. Taale Jerusalemm̄ba ma kaavéréngunu déké. Kaavéréngunu Gotna Yaamambi anjorémba gaaye gunat mayé apa kwayéndu nak gaayét yékangunéngwa." Naandén Jisas det.

*Got wandéka Jisas Gotna gaayét waaréndén  
(Mk 16:19-20; Ap 1:9-12)*

<sup>50</sup> Jisas wunga watake de kure Jerusalem taakatake ayélap yépulak naae Betanimba

saambakndarén. Saambake déku taamba kusoréte Gorét waatakundén, det yékun yandénngé. <sup>51</sup> Waatakutéte de yaasékandéka Got dé déku gaayét kure waaréndén. <sup>52</sup> Waaréndéka de mawulé tawulé yate waambule yéndarén Jerusalemét. <sup>53</sup> Ye apapu Gotna kundi bulndakwa néma gaamba téte Gotna yé kavérék-téndarén.

**Gotna Kundi  
The New Testament in the Wosara-Kamu Dialect of  
the Ambulas Language of Papua New Guinea  
Nupela Testamen long tokples Ambulas (Wosera) long  
Niugini**

copyright © 1996 Wycliffe Bible Translators, Inc.

Language: Ambulas (Wosera) (Wosera-Kamu dialect of Ambulas)

Dialect: Wosera-Kamu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-07

---

PDF generated using Haiola and XeLaTeX on 21 Feb 2024 from source files  
dated 31 Aug 2023

642fc614-c768-54bd-ae38-31184977f6f6